

# NAPWIYA, TI YEELA

## ETHOONYERYO YA

### WOOMALELONI?



Kooxukhuru, vanci-ene, Munna Neville.

Muhiileliwa, axipatthani aka oophenteya. Kooteeliwa murima otthikela emara ekina, ohiy'ula, mmutekoni mw'Apwiya, Muluku ahu.

<sup>2</sup> [Munna Neville onimuhimeerya Munna Branham, "Ola t'ori mukumi, *va.*"—Mol.] Ola mmosa e. . . Ti *yoola*. Oh, ayo. Ti yooreera.

<sup>3</sup> Miyo nkireere woopisihani, voosiis'ula, mpakha sinoon'aka wira kaahaana waakuvaxa ohiy'ula. Um-hum, uh-huh, uh-huh. Wulu, moota yaary'aya yoonyoonyiha, ni weemela, ni ti yoonanara ohiy'ula. Vano, khenrowa opisa mpakha onrow'ahu okhalana opuro wa nyuwo, moone, ekereja emalakaruru. Nnari, masi hiyo khannuupuwelela okhala okathi munci-enexa ohiy'ula.

<sup>4</sup> Masi, meelo ohiyu, ninnuupuwelela olekela vakhani. Meelo ohiyu, amosa amosa a nyuwo mwaweryaru orwa, meelo ohiyu, vano, ninniwehererya okhalana okathi muulupale mw'Apwiya. Anookhala axilopwana amosa amosa ooreera murima wa meelo ohiyu. Hiyo, othene hiyo ninoorowa okhalana okathi. . .

<sup>5</sup> [Munn'awe Munna Branham, Edgar Branham, oniira, "Oh, oophenteya, mulipelele! Kookhalana yooveka wira koovekeleni. Kaahiliyala wooleelani. Masi, atthu anci-ene va ahimnye wira khula okathi nyuwo munimwaakuva, mukhumaka vamutekoni. Masi meelo ohiyu munoowerya okhalana okathi wothene nyuwo mwaatthun'anyu, okhuma ewora ya neethanu na piili mpakha yanamuloko ni piili, nyuwo mwaatthunaru mukuxe paahi. Vano, ti yeeyo muthukumano va okivekenly'aya wira koovekeleni. Nto vano nyuwo mwaahimeerye, mwahuupuweleke siiso."—Mol.]

<sup>6</sup> Hiyo nnoorowa okawa ekomunyau ohiyu eriyari, meelo ohiyu. Miyo kookupali wira nyuwo—nyuwo munootthuna okhalana. . . okhala mu ni yeeyo. Okathi atthu akina anrow'aya okhala akhuwelaka ni atuphaka, ni yoopaka ikapwitthi, ni awuryaka, ni sikina, hiyo ninrowa wuurama ni nttittimiho ohoolo wa Muluku [Nipuro vahiitthu mufiitani—Mol.] ni waakhela ekomunyau, ni wira nipacerye mwakha n'uvekela wahu, ovahererya mirima wa Muluku, mwa wiivahererya wa Yowo.

7 Nto anookhala alipa-oolavula oratteene amosa amosa vaava meelo ohiyu, vekeekhai. Aakhala amosa amosa ooreera... Munna onikhuma oGeorgia ori vaava, Munna Palmer, mulipa-oolavula oothamaleya. Munna Junior Jackson onookhala vaava meelo ohiyu; Munna Beeler, Munna Neville. Oh, wulu, wulu! Nto mmosa ni mukina, alopwana ooreera murima a Muluku anrowa okhala va, Munna Willard Collins, ni axinna othene awo annivahaka mitthaka suulupale. Nto alakela akina anrowa ophiyaka, vano hiyo nnoowehererya okathi muulupale meelo ohiyu.

8 Vano, amwaar'aka yaahimye wira, "Muhihimye ela," masi miyo kihaana ohimya wakhula enamuna. Kileveleliwe miyo kiirale *empire*, [Omwene—Mot.] voosiis'ula, ohiya wira *umpire* [Mulipa-oolamula—Mot.] [Munna Branham ni muthukumano anootheyasa—Mol.]

Billy, okilanthi ottuli iwe, iirale, "Ole onrowa vale."

9 Miyo khwira, "Empire; owo ohaana okhalana empire." Kaatthuna wira, *umpire*.

10 Miyo kiri ntoko ole awo anihimya'aya mwaha wa mulopwana a Olanda, moosuwela. "Nto muhikikuxeke mwaha wa etthu enlavul'aka, masi mwa ele entthun'aka ohimya."

11 Miyo khwira, "Miyo kinoona wira awo anookiiwa sana, vaviraly'aya miyakha iya sothene." Nyuwo moosuwela, ela mwaha wa...

12 Sinivira miyakha miloko miraru kikhalaka ottuli w'epulpitu ila va. Miyakha miloko miraru mutapernakulu mu! Nyuwo mwaahaana wira mukisuwenleene okathi ula wothe, khamwaarina y'okisuwela? Oh, wulu! Osoa waka vekeekhai ti waamukhaani. Masi miyo—miyo koosuwela wira nkinwerya olavula, masi kinkumiha manyakunyaku eekeekhai w'Apwiya.

13 Nto, munna, kookupali wira aari Totori Lamsa, a Bibilia Lamsa, yaari motaphuleliwani, iirale...

14 Emara emosa miyo kaamulavula, nave nkaasuwela wira owo aari vaavo. Nto owo khuhokolowa ni aalavula mwaha wa Urimi Tumimi, nto vo owo aalavula mwaha wa Warya iwe. Nto owo khwira, "Exeni eniwiira atthu ala olelo?" Nto miyo khwira... Owo khwira, "Etthu aya atthu, ataphuleli, yahaawery'aya omutaphulela Bibilia oratta-ene, okhala wira ataphuleli yaatthuna omutaphulela ni ntaava n'aYuta noorikaxa. Ni Yesu, alavulaka, aalavula eriyari y'atthu pure, vekeekhai ntoko atthu a mmuttettheni saalavul'aya."

15 Nto, nyuwo moosuwela, yookhala Yolempwa mwa Luka, ehimye wira, "Atthu othene yaanimwiiwa Yowo n'usiveliwa." Owo aalavula ni ntaava naya. Miyo kinroromela wira ti siiso, tho.

16 Hiyo ninnitthapa mwaha w'Apwiya. Vano, miyo koosuwela, kinniwoona axithiyana ale yeemenleene mapuro othene. Ti yoonanarexa owoona alopwana yeemenleene, waahiya aximwali ale ni amiravo, n'athiyana, n'akina, yeemenleene muxirini, n'anamwane axikhaani. Masi, vekeekhai hiyo khanrina opuro wooreerela okilaathi. Vano, hiyo ninvekela wira, wira okathi mukina onrow'ahu okhalana mithukumano, numala esumana ela, numala okathi ula . . .

17 Nyuwo moosuwela, etthu enttharelana, ntoko sinsuwel'ahu, Ikanyero iye Thanu na piili. Nto, Apwiya yatthuna vale, hiyo ninoopacerya naanaanoru emalakaruru ekereja, otekiwa, wira niwerye okela mu. Nnookela-mo wira nitthikele ovahererya. Nto alakela nnookhalana esumana emosa mpakha piili, ni alakela isumana tthaaru, soottharana, sa mithukumano vano, nirowelaka i—Ikhanyero Thanu na piili. Vano, hiyo ninwehererya okathi muulupale mw'Apwiya, okathi ene yoowo. Nto hiyo nno. . . Nyuwo othene muhikhanle atthu a muttetthe yola, hiyo nnimooveleeliani ittikitti n'itthu sothene, ni woosuweliani okathi ene, alakela esumana emosa, wala piili, nihinatthi.

18 Mulipa-ooteka, ntoko simwiiwaly'aka Billy ahimiyaka ohiy'ula, onoomaliha nihiku nanamuloko na Fevereiro. Vano, owo amaliharuru nihiku nanamuloko, hiyo nnoopacerya nihiku nanamuloko ni mathanu, nto. Vano, awo amalihakaru, hiyo nnoopacerya ni yeeyo naanaanoru.

19 Munna Kidd mutokweene aahikilikarela, okathi vakhani ovinre, owo aahala wunla. Owo khwira, "Munna Branham, hiyo khanreere wehererya otthukula ekaaro ele, nave khiyaatthukuwa. Vano," owo khwira, "muvekele wira etthukuwe, nto miyo kinimoorwa meelo." Nto owo khwira, "Kaanitthuna osuwela sinto kinoowerya ophwanya nipuro n'omaka?"

20 Miyo khwira, "Muhixanke, hiyo nnookhalana ekatthi wira nyuwo mukhale, Munna Kidd, mmalakaruru ophiya . . ."

21 Owo khwira, "Mureerihiwe murim'anyu." Khwira, "Nyuwo moosuwela, vakhala wira munookhalana muteko w'okokhorela mpakha ewora yanamuloko ni piili," khwira, "Miyo nkinthuna okhuma ewoora yanamuloko ni piili."

22 Nyuwo moosuwela, owo ni Munna Kidd arinasa miyakha soophiyaka miloko mithanu na mirarau ni mithanu, khula mmosa, nave nlelo arisa mmutekoni. Nyuwo moosuwela etthu awo anir'aya? Awo arinasa ekaravatoro, nto awo ankuxasa Mitthaka saka n'urowa exipiritali n'ixipiritali, empa t'impa, arumihaka ifiita. Vano, eyo yaahikhale, ohihyererya! Khehiyo otthikela ottuli. Eyo t'ukhapelela Wamini, mpakha wookiseryani, okhwa ni Xoowa mmatatani. Eyo t'inamuna yo weetta. Eyo t'inamuna miyo entthun'aka wira. Uh-huh.

<sup>23</sup> Nto vo, nto owo khwira, “Nyuwo moosuwela, miyo kakhumela, muramphani, ewoora yanamuloko ni piili,” owo khwira, “nto vanivir’aya ewoora yanamuloko ni piili ohiyu, kitthunaka ophiya owaani, nto axetwani ale othene oohapalasiwa,” owo khwira, “yeetthasaka,” khwira, “atthyawasaka khula ephiro, awuryasaka.” Owo khwira, “Axetwani ale atthyawasaka nno ni nno,” owo khwira, “Miyo kaamututhuwa mpakha ohalela okhwa.”

<sup>24</sup> Munna Pat, owo vekeekhai mutthu mwaamukhani. Akavi animusuwela Munna Kidd? [Muthukumano onira, “Amen.”—Mol.] Owo okilanthi va, ntoko, vekeekhai ethu enooneya okhala ooreera murima.

<sup>25</sup> Nto, okathi, muupuwele paahi, miyakha iyo miyo kihinatthi oyariwa (nto miyo ka mulopwana mutokweene), owo aari osulu iwe mmwaakoni mme, owo ni Munna Kidd mulopwana. Owo aamukattha, nihiku ntero, vanikulani, wira aphwanye isentavo muloko ni thanu wala miloko miili mwaha w’okattha, wira iy’awe arowe nipuro nno, ohiyu ule, wira alaleerye. Mmikotini mme mwa makhala oKentucky, weiwo nyuwo... waatthuneya mutthu wira ookhapeleleni ni ekapwitthi, wira muwele mwako, weiwo waarow’anyu olaleerya. Oh, wulu! Nto, miyo kinnuupuwela:

Miyo kihaana okuxiwa orowa owaani Wirimu,  
 voolilini voomumula wa maluwa,  
 Akina ewanne-ene wira ephwanye otthuveliwa  
 ni yeettale-ene mphareya mw’ephome?  
 Miyo kihaana wiilipiha kaatthunaka wira  
 kixintte; muncererye okhomaala waka,  
 Pwiya!

<sup>26</sup> Eyo ti, nto miyo kinthuna mukhaliheryo Awe, mwa Masu Awe. Ti yeeyo miyo entthun’aka ohiy’ula. Vano, miyo kinoona wira okaravariwa onimwiiraneya vano.

<sup>27</sup> [Munna mmosa onira, “Muhiliyale omuvahererya mwana.”—Mol.] Oh, ayo. Kookhalana... Kileveleliwe.

<sup>28</sup> Mwaamunna mmosa aahikhalana mwana va, voosiis’ula, owo aatthuna wira avahereriwe. Nto miyo kimuleela wira vekeekhai hiyo naamwiira siiso ohiy’ula, ni naanaano. Nto, meelo ohiyu, onookhala ovahereriwa w’anamwane, miteko s’ovoniha, itthu sothene sinrow’ahu owerya wira. Nnookhalana okathi munci-ene. Vano, mwaamunna owo aakhanleene vaava, ni mwan’awe ene.

<sup>29</sup> Ni miyo kinoona wira aakhala atthu anikhuma ottaiwene, ni yaari vaava voosiis’ula wira ekhalane ovaanela w’omekh’aya, ni w’ethu emosa emosa. Nto yaatthuneya wira awo ekumane mme voosiis’ula, ni Billy aahaana waalipeleliha mpakha ohiy’ula. Vano owo khaawerya waaphwanyana hata nipuro, moone, ohiy’ula. Nyuwo mwaari ene vaava, munna, miyo kinootthikela iwe

okathi vakhani, kiwehereryaka, ni koonaka sinto onoowerya omuphwanya muthiyan'owo. Yaari anli yaawo, woona waka, yaari woovaanelani w'omeekh'aya akhumme ottai wa muttethe. Vano, hiyo—hiyo ninroromela wira, kaahiwooneni, kinoowerya woophwanyani vowaakuveya sinwery'aka, khino meelo ohiyu, okathi onikel'ahu.

<sup>30</sup> Vano, miyo kookupali, t'ula muthiyana ene, onoorwa, ni mwana ni e—ekamisoola yooripelela?

<sup>31</sup> “Ekamisoola”? Meda, miyo—miyo—miyo nkaahimya yeeyo, kinoophent'akani, enakhaleru etthu p'itthu. Enikhala ntoko ekuwo ya mmosa. . . Ekamisoola, akavi answela e—ekamisoola exeni? Vano, vekeekhai. Ekuwo y'erutthu yothene, wa miyo. Vano—vano. . .

<sup>32</sup> Vano, owo mwana a oDallas. Wulu, ti yooreera. Munna, mwaanitthuna weetta mpakha va. Mukilevelele. [Munna Branham onihiya mikrofone khurwa epante ekina y'epulpitu—Mol.]

<sup>33</sup> Vano, vano, okisivela mukhoyi ule mwaamukhaani vale, omuwarinh'anyu. Nsina nawe ti pani? [Tithi awe onira, “Rebekah Lynn.”—Mol.] Rebekah Lynn, L-y-n-n. Ankhi nsi—nsina nanyu nookiserya ti nvi vano? Stayton. Rebekah Lynn Stayton. Ti yeeyo? Pooti omukuxa? [“Vekeekhai.”] Koosuwela wira ti yoolipa, omuhiya mmosa siiso. Oosivela? Rebekah Lynn Stayton.

<sup>34</sup> Amusi ala khareere ohaawasa. Mwaamuthiyan'ola, mwaamukhaani va, n'aiy'awe, aroomalaru woopowa owanli n'uruuhiwa waasuwela Apwiya. Nto vano, moopatthaana waya, Muluku ohaavaha Rebekah ola, mwaamukhaani, ooreera nto awo animuruuha w'Apwiya.

<sup>35</sup> Vano, atthu anci-ene, awo aniihana yoohimala. . . opatiiso w'axinamwane, okereja Metotista ni sinci-ene sikina, nto awo animwaamiserya maasi aryeene axinamwane. Vano, eyo ti yooreera, mpakha va ntoko sinsuwel'aka. Masi hiyo khula okathi nintthuna okhala n'ile Bibilia onihimiy'awe wira niire. Nto mBibiliani, mmo (nnari) khenakhaleke-mo etthu ntoko omupatisa mwanamwane; hata nipuro nimoso voomutthariha wahala, mpakha ekereja Katolika yoopacerya, ntoko sinsuwel'ahu mpakha va, yeeyo yaari ottai mpakha Muthukumano w'Onicea.

<sup>36</sup> [Mwana onimunla, “Ba!”—Mol.] Vano eyo p'inamuna yo wira, “Amen.” Yeeyo, moone, nyuwo muhaana. . . Moone, nyuwo muhaana okhalana otaphuleliwa waya.

<sup>37</sup> Vano, masi, mBibiliani, atthu yanaaruuha anamwane wa Yesu, wira Owo aareerihe. Nto Owo aaniwiixatherya matata Awe yawo ni waareeriha. Nto, eyo, hiyo nlelo nintthikela yeeyo.

Vano nuuramihe muru ahu.

<sup>38</sup> Tith'ihu a Wirimu, mwamuthiyana ola ni mwamulopwana ola anoorwasa ohiy'ula ni Rebekah ola mwaamukhaani oophenteya yowo avahasiw'aya, wira amusuke, wira amulele ni miruku sa Muluku. Nto awo animuruuhasa ohiy'ula wira amuvahererye w'Apwiya. Nto okathi amey'awe amuvaherenry'aya okhuma mmoononi mwaya mpakha mw'awaka, vano miyo kinimuvahererya okhuma mmoononi mwaka mpakha wa Nyuwo, Rebekah ola mwaamukhaani. Muluku, mukhale ni yola ni mmureerihe. Mwaareerihe atithi awe n'amey'awe. Wira awo othene akhale makhalelo oororomeleya, ni oolekela, ni, yaaweryaneyaka, yoone Orwa w'Apwiya Yesu. Wira mwan'ola annuwe aasuwelaka Apwiya. Ni wira, nakhalaru nihiku na meelo, ola akhale namoona Anyu muulupale. Munivahe, Pwiya. Vano, Nyuwo mwaari vaava elapo ya vathi, athiyana ala n'alopwana yaamurowa waaruuha ana aya wa Nyuwo. Masi hiyo, arumeyi a Ehapari yooreera, n'arummwa Anyu. Tivo, hiyo nnoovah'ahuni Nyuwo mwan'ola, wa makhalelo a muteko mOmweneni Mwanyu, mwa Nsina na Mwan'Inyu, Pwiya Yesu Kristu. Amen.

<sup>39</sup> Mureerihiwe, Rebekah mwaamukhaani! Etthu xeni yoosivela! Muluku ooreerhaseni nyuwo oowanli, ni mwana, oovaheni ekumi ni makhalelo, oothapa ni oolekela, mmurumeelaka Muluku.

<sup>40</sup> Nkisuwenle sinto kookhalana ikuru vakhaani soophiyerya, wala nnari. Ola mmiravo. Nsina nawe ti pani? [Amey'awe anira, "Stanley Victor Cleveland."—Mol.] Stanley... ["Stanley."] Stanley Victor... ["Cleveland."] Clayland? Clay... ["Cleveland."] Cleveland. Stanley mwaamukhaani, nsina xeni nooreerexa naamukhaani, ni mwammiravo xeni ooreera! Vano, miyo kinaanyiherya wira, ntoko... Nrowe niwehe nno, Stan. Owo mwammiravo ooreera? Oh, nyuwo moosuwela. Hiyo khaninlimalela ela. Hiyo nniimwiira ela paahi, nyuwo moosuwela, khekhanle hat'etthu yookhaleleya mwa yeeyo. Ti yeeyo. Vekeekhai owo mwammiravo ooreera. Kooliyala nsina nookiserya. Kinoona wira nkinromola oratteene. ["Cleveland."] Cleveland. Vaareera.

Nuuramihe miru sahu vano.

<sup>41</sup> Tithi a Wirimu, anaitthoko ala animuruuha mwanamwan'ola, Stanley Cleveland mwaamukhaani, wira ovahereriwe w'Apwiya Yesu. Nto ntoko pastore va, a ekereja, ni miyo, ninkhala vamosa mwa wiiwanana mmitekoni mw'Apwiya, hiyo nnoovahereryani Nyuwo mwan'ola wa makhalelo a muteko. Nyuwo murimwaavaha atithi awe n'amey'awe; nto vano awo anikinnya miyo, mmoononi mwaka; ni miyo kinimukuxa mmoononi mwaka mpakha mw'Awinyu. Muluku, mwaareerihe atithi awe n'amey'awe. Mmureerihe mwammirav'ola, ni wira awo othene akhale makhalelo oolekela, ni oothapa yoorumeelakani Nyuwo. Wira mwan'ola aleliwe ni miruku sa

Muluku, wira amurumeele Yowo, ni amoove Yowo, ni amphente Yowo, mahiku othene a ekumi awe. Vano, awo ahaaruuha anamwane wa Nyuwo, wira Nyuwo mwaareerihe; ni hiyo, ni matata ahu vasulu va mwana, ninnimureeriha mwa Nsina n'Apwiya. Ni wira owo okhale makhalelo oolekela, ni oothapa eekumi ni ikuru, wira oorumeeleni Nyuwo. Mwa Nsina na Yesu. Amen.

Muluku ooreeriheni, Stanley mwaamukhaani. Nyuwo murina mwammiravo ooreera vo.

<sup>42</sup> Vano kinrowa waavara metto vakhani paahi, axipatthani axikhaani ni aximiravo. Ni koosuwela wira ti yoolipa. Nyuwo khamunwerya weemela mmaanleene okathi munciene, okhala wira metto sanyu sinookhalana nantirya. Masi miyo kinaattamela etthu emosa ohiy'ula kihinatoko aka waattamela khalai. Ni yookhala etthu enrow'aka olavula, yeeyo kihinatoko aka wuupuwelela olavula etthu ntoko eyo.

<sup>43</sup> Tivo, voosiis'ula, miyo kahaatthun'aka ohela okathi uwo ohinatthi Mutthaka, ni nkinamaliheke omulavula Oohivaanyiheya aka, ni nkinuupuwela wira kinookhalakhala kimmalihaka. Miyo kinroromela wira nikinimmaliha. Owo t'othamaleya!

<sup>44</sup> Masi, ohiy'ula, kinrowa olavula etthu emosa kihinsuwel'aka. Nto vano, eyo etthu yoomalela, murumeyi ohimya wira onrowa olavula etthu ohinsuwel'awe. Masi miyo kinimwiileva, w'ooreerexa w'osuwela waka, wira . . . wira ekereja ela esuwele sana. Ni miyo nkaarowa, nnakhala, woovitheryani hat'etthu, eri ya maana.

<sup>45</sup> Nave nto, efiita ela, kookupali wira aximiravo anookaravari efiita. Nto yiiraneya nyuwo ophwanya efiita, mutthu ti mutthu oniiwa efiita, uupuwele, yakhala etthu enootikinihani, nyuwo, muhihimye woohikhala wira eri mufiitani. Muhihimye hat'etthu yoovirikana n'ile eri mufiitani.

<sup>46</sup> Anci-ene annilepa ipaphelo, mwaha wa *Epyo y'Enowa*, n'uhimya wira miyo koohimya etthu khata ni khata. Miyo kinoorowa okuxa efiita ene, n'urumiha. Miyo nkihimye eyo siiso. Moone, atthu anlamula voovonyeya itthu iyo.

<sup>47</sup> Nyuwo moosuwela, Yesu, emara emosa vamanly'awe ohihimuwa, aamweetta ophareya, n'arummwa, ni Yohani aaphitenrye vatthirima Vawe. Nto awo khwira, "Exeni enrowa omukhumelela mulopwan'ola?"

Yesu khwira, "Erivo yawinyu exeni Miyo katthuna wira akhale mpakha vanrw'aka?"

<sup>48</sup> "Nto khikhuma yoovuwa, yaahimya wira, 'Yohani aarowa okhala wira amoone Yesu arwaaka.'"

<sup>49</sup> Ni Yolempwa enihimya wira, "Nnya, Owo khanahimyeke siiso." Moone, Owo—Owo khanahimyeke eyo. Owo aahimye

paahi wira, “Erivo yawinyu exeni owo akhala vale mpakha Miyo orwa?” Owo kxanahimyeke wira owo aamukhala. Masi, moone, ohiiwa sana, ti yookhweya.

<sup>50</sup> Nto, vano, kahi—kahi wira miyo kinoomuulumela mutthu mwaha wo wira siiso. Okhala wira, miyo kinniiraka, yoomi. Ni atthu othene anniira; vaari wira arummwa, yawo yeetta ni Pwiya’ahu, khayaamwiiwale sana Owo. Ni awo khayaatonko omwiiwa Owo oratteene.

<sup>51</sup> Wookiseryani tu, awo yiirale, “Moone, vano ninniwa sana. Vano hiyo ninnaamini. Ni hiyo nookupali wira khaavo mutthu ori owoohimeeryani Nyuwo etthu, okhala wira Nyuwo munnisuwela itthu sothene.”

<sup>52</sup> Nto Yesu khwira, “Vano nyuwo munnaamini?” Munnona? “Vaviraly’aya okathi ule wothene, nyuwo vo- . . . Vookiserya eyo ehookelani, moone, wira munnaamini?”

<sup>53</sup> Nto eyo ti ya mutthu paahi. Ni hiyo othene n’atthu, vano hiyo nnoovonya wiiwa.

<sup>54</sup> Masi yakhala yo wootikinihani vakhani nyuwo, mutthikele orumiha efiita. Nwiriyaane oratteene nto. Miyo kookupali wira Eroho Yowarya enoowupululelani.

<sup>55</sup> Nto, axipatthani axikhaani, mwaavarele “amen” anyu, anamwane. Mulipelele vakhani paahi, okhala wira miyo—miyo vekeekhai kintthuna wira ela yaakheliwe, ’okhala wira anciene kxanrowa okhalana efiita. Vano, miyo kintthuna wira vekeekhai mwaakhele. Nto nrowe naattamele, maana, miyo kinoohimya minutu miloko miraru ni mithanu, wala miloko mixexe, voottittimihaxa ntoko sinsuwel’ahu wira.

<sup>56</sup> Okhala wira, ola okathi wowoopiha wa miyo. Ti vaavo etthu yiiranan’ye aya, miyo ehinsuwel’aka etthu yo wira. Munnona? Ni miyo kiri mooxankani ohinatoko aka okhala, mahiku a muteko aka, ntoko sinsuwel’aka.

Vano, nrowe nuuramihe miru sahu vano, nihinatthi waattamela Masu.

<sup>57</sup> Tithi a Wirimu, okathi ule, okathi vakhani ovinre, miyo koolaleya mwaha wa *Waanyiherya*. Nto *waanyiherya* “ohimya pure muhirummwe.” Nto khino, ohiy’ula, Pwiya, kihiihelela mmansaka waataphulela etthu atthu, kihikhalanne yoowoona ya yeeyo. Tivo, Pwiya, mukiwehawehe, mapuro ale anthuneya wira kiwehawehiwe; mutthuke eyano aka, Pwiya. Nyuwo mwaahitthuka iyano s’amwatto, munlittini ni Daniyeli, wira ehimwiirihe ehasara. Pwiya, miyo kinvekela, wira, keererya otaphulela etthu voovonyeya-vo, Nyuwo nlelo mookhalana owerya w’otthuka eyano. Masi yaari Ekeekhai, nto, Pwiya, mureerihe Yeeyo, ni mukumiherye. Ni Nyuwo moosuwela mikhalelo ni ele eri yooloka ni ele enikhuveela. Nto tivo miyo onirw’aka, hata okathi ula wookiserya, vapulpitu, wira keererye



otaphulela itthu iya. Nto miyo kinoovekelani Nyuwo wira munikhaliherye.

<sup>58</sup> Mureerihe ekereja ela yaamukhaani. Nikhuru nla nnoorwa va vathi va nipatho, yawo anikhala ni hiyo mu mutteth'ola, akhumaka ilapo sinci-ene. Oh, okathi miyuuttutthi s'ohiyu sinirw'aya, hiyo ninnitthapa okhalana nipuro n'orwa-vo. Okathi olumwenku ory'aya wootikinihiwa ni ahisuwelaka vatthu vary'aya, hiyo ninnitteeliwa murima, wira, "Nsina n'Apwiya ti namukattha oowerya, ni anaxariya antthyawela Vaavo n'ukhala oolipa." Kahi Moolumo manci-ene paahi, masi muupululo!

<sup>59</sup> Vano, hiyo ninvekela, Tithi, okathi Warya wa makaaripi onrw'aya, nsuwa nitupweelaka. Ni hiyo ninnaamini wira owo p'ukathi onikhal'ahu, wootupweelani wa nsuwa. Nto hiyo ninnooxukhuruni Nyuwo ni nttittimiho nuulupale, Pwiya, ni murim'ahu wothene, mwaha wa itthu Nyuwo munniirel'anyu. Nto, Pwiya, muhina w'okathi, miyo kinnooxukhuruni Nyuwo mwaha wa sowoona Nyuwo munivah'anyu, khula emosa voolikana ene, ni khula otaphuleliwa wa yoloha onikhala woolikana siiso. Vano, hiyo noosuwela wira mwaahaana okhala Nyuwo paahi, Pwiya; okhala wira hiyo n'atthu ninkhwa, othene ooyariwa mutampini, ni khiyavo etthu y'ekumi mwa hiyo. Masi, wuupuwela wira Nyuwo mwaamuwerya okuxa etthu siiso, ntoko mutthu, n'urapiha ni maasi a Masu ni ni Ephome ya Kristu; ni wookola ntata nlo mwa enamuna emosa, mpakha mutthu ohirumeela muupuwelo awe mmansawe, masi ohiya muupuwelo wa Kristu, Yowo onsuwela itthu sothene, ohiya Yowo orwa n'ulavula ni orumeela empa. Nooxukhuru, Tithi.

<sup>60</sup> Vano hiyo ninnittotopela Nsina Nanyu Nowarya. Ni hiyo ninnireeriha nikhuru nla naamukhaani, ohiy'ula, mwa Nsina Nanyu. Hiyo ninnimureeriha pasotre, Munna Neville, murumeyi ookhomaala a Muluku. Hiyo ninnaareeriha matiyakono, maatiministaratore, ni khula mutthu a Erutthu ya Kristu, va ni mulaponi mothene, mwa Nsina n'Apwiya Yesu.

<sup>61</sup> Oh, okathi hiyo onoon'ahu epiphi ila, oriipela, eruku yowoopiha ekhuruwelaka owiitho w'oKristu, hiyo noosuwela wira okathi ori vakhiviru. Onookhala Okuxiwa, nto Ekereja enrowa okuxiwa. Pwiya, munihiye nitthikele neettaka, nimuwehaka Mulipa-opacerya ni Oomaliherya, Kristu. Munivahe, Pwiya. Nto okathi onrow'ahu ohoolo vano, mwa Nsina na Pwiya Yesu, niphavele itthu iya siheliwe mmurimani mw'ahu, hiyo ninvekela wira Nyuwo mukhale ni hiyo ni munikhaliherye. Ni muphwaneye ovuwa mwa yeeyo, Pwiya, maana hiyo ninniivahererya wa Nyuwo, ni Masu Anyu, mwa Nsina na Yesu Kristu. Amen.

<sup>62</sup> Vano, nyuwo mwaarineene elaapi ni epaphelo, miyo kaatthuna wira mulepe itthu kamosa kamosa, ntoko...wala etthu p'itthu entthun'anyu. Mukhalane yoolikana ene. Nto vo,

mufiitani, nave tho, mwaatthunaka olepa Solempwa, okathi p'ukathi, okhala wira miyo kookupali wira Yolempwa t'enihimya etthu.

<sup>63</sup> Vano hiyo nintthuna nisome yoosoma emosa ohiy'ula, ahiso osoma Yolempwa emosa, muLiivuruni mwa Wisuupulula wa Yesu Kristu. Ni miyo kookupali wira ola Wisuupulula wa Yesu Kristu, ntoko silempwaly'aya muLiivuruni. Nto muupululo mukina onrowa okhala woovirikana ni Wisuupulula nno, onookhala woovonyeya. Kookupali wira yaahaana ohimmwa. . . ohimya—ohimya tho. Khula muupululo ohinrowa olikana ni Muupululo ola, n'uruuha Muupululo ola mowaryani, muupululo woovonyeya. Ehaana okhala Yolempwa.

<sup>64</sup> Vano, ekapitulu 10 y'Eliivuru ya Wisuupulula wa Yesu Kristu, kintthuna kisome iversikulu vakhani soopacerya, iversikulu thanu na piili soopacerya, 1 mpakha 7. Nto nwiriyane sana vano, ni mukivekelele.

*Nto kaahoona nikina na ikuru—nlaikha nikina na ikuru nikhuruwaka wirimu, naawanre neeku: ekhweyi yaari vasulu vamuru aya, ni owiitho waya. . . waari ntoko nsuwa, ni inawu saya ntoko maripu a mooro:*

*Naahikhalana mmatatani mwaya eliivuru yaamukhaani yookhunuliweene: nto nnawu naya noolopwana naanyakenle ephareya, ni nnawu naya noothiyana naanyakenle etthaya,*

*Vano nlo naahikhuwela niituperiyaka, ntoko mwatto aakhuwelaka: nto okathi nikhuwenly'aya, itari thanu na piili saahilavula masu aya.*

*Vamanly'aya itari thanu na piili olavula masu aya, miyo kaatthuna olepa: nto kaahiiwa nsu naakhuma wirimu nikhimeeryaka wira, Musuke itthu iyo itari thanu na piili silavunly'aya, muhilepe etthu.*

*Nto nlaikha noonalyaaka neemenleene mphareya vatthayani naahittukhulela matata aya osulu,*

*Nto khimulapela ole onkhala mahiku othene, yowo opattunxe erimu, n'itthu sinikhala memmo, n'ilapo ya vathi, n'itthu sinikhala memmo, n'iphareya, n'itthu si. . . sinikhala memmo, wira khivanrowa opisa tho:*

*Masi mahiku a nsu na nlaikha naneethanu nenli, ninrow'aya opacerya woopa nlope, esiiri ya Muluku enoomalitheriwa, ntoko saahimeeraly'awe arumeyi awe maprofeta.*

<sup>65</sup> Nto yoosoma aka, kaawerya wiihana eyo siiso, ohiy'ula, t'ila: *Napwiya, Ti Yeela Ethoonyeryo Ya Woomaleloni?*

<sup>66</sup> Hiyo othene noosuwela wira nnikhala oka—okathi muulupalexwa wa Ekereja, masi okathi wowoopiha wa ole ohinaamini. Ni hiyo nnikhala okathi mmosa wowoopihaxa

w'okathi wothene, wothene otonko okhala, okhuma olumwenku opaceny'aya. Khaavo profeta, nnakhala murummwa, nnakhala, hata okathi mmosa, otonko okhala okathi ntoko ola onikhal'ahu vano. Ela t'imalelo.

<sup>67</sup> Yoolempwa musulu. Yoolempwa elapo ya vathi. Yoolempwa mwa khula epaphelo ya ihapari. Ela ti emalelo, nyuwo mwaaweryaka osoma yoolempwa ni ntata. Maprofeta yaakhanle okathi yoolempwa ni ntata yaary'aya vaxirini wa elapo emosa, masi hiyo ninkhala okathi yoolempwa ni ntata ery'aya vaxirini mwaha w'okathi. Ilapo sothene, elapo ya vathi, itthu sothene, okathi woomala. Vano, hiyo nihaana wavya Solempwa, wira nisuwele okathi hiyo onkhal'ahu.

<sup>68</sup> Okathi wothene, profeta eekeekhai a Muluku onoorowa mwa Solempwa. Tivo owo t'ooihvaanyiheya wira enrowa okhala siiso. Mwa Waataana wa Khalai, maprofeta yahimyaruru etthu, iwe okathi wothene, nipuro nimosa, aanikhala profeta ni Masu, yowo aakhala ni Masu. Owo aanimuweha Muluku ni sowoona. Nto yoowoona awe yakhalaru yoovirikana ni Masu, nto yoowoona awe yaahivonyeya. Eyo p'inamuna ya Muluku waaroihela Masu Awe Athu Awe.

<sup>69</sup> Nyuwo munniwerya okiiwa, ottuli iwo, sana? [Munna Branham onoomaala—Mol.] Vekeekhai nkinsuwela vatthu voopacerya-vo.

<sup>70</sup> Vano, owo onnikhala mureerelo muulupale wa miyo, osuwela wira etapernakulu ila ti yaari ekereja aka yoopacerya. Eyo etthu yoottittiheya. Nto nkinkhalakhala kiliyalaka, hata wira miyo... Yesu aamupisa ni miyo kikhala miyakha imiya sene. Miyo kinnuupuwela nihiku kaahenly'aka nluku noopacerya, vale valoomoni; ni yoowoona Owo aakivahaly'awe voosiis'ule, y'etapernakulu ila. Nto othene anyu munnuupuwela. Yoolempwa mmaliivuruni. Nto eyo vekeekhai ennikhala yoomaliheriwa, oratteene, woohihaleela nnakhala vakhani.

<sup>71</sup> Nto, vano, miyo nkinaamini wira yookhala etthu Owo olavunly'awe, miyakha iya sothene s'ekumi aka, kaahimenry'aka athu, ehiiranen'ye. Nto athu anci-ene annoora ni soloha, seiyo Owo onikivahery'awe, ni mahala Awe, waataphulelela athu. Ni anci-ene annoorwa ni soloha ni ni mikattyamiho seiyo miyo sahaawenry'aka otaphulela.

<sup>72</sup> Masi miyo nkineereryeke wooruuhelani nyuwo athu ethepyelo erina sowaakhula sothene. Miyo kinnitthuna okhala oororomeleya ni wooleelani ele yaari Ekeekhai, ni miyo kaawerya wooleelani paahi ntoko Owo sikihimeeraly'awe. Nave nto moota eyo erwiiy'aya wa miyo, nto kaaniwerya wooleelani.

<sup>73</sup> Nto miyo kintthuna koolopoleni. Nihiku nla hiyo ninkhal'ahu, aakhala anci-ene... Kahi—kahi ohimya etthu yoowuulumela athu. Masi nyuwo mwaamoonaka mutthu orina waakhula wa itthu sothene, eyo ti yoovirikana ni Masu.

<sup>74</sup> Yesu ohimmye wira, “Yaahikhala anamakuttula anci-ene mahiku a Eliya, masi mmosa paahi t’avonihiwe.” Mwa miyakha sinci-ene, miloko mithanu na miraru wala soovikana, Eliya saakhanly’awe, nave namakuttula mmosa t’avonihiwe. Anaamukhweli anci-ene axithiyana mahiku a Eliseu, masi owo aarummwe orowa wa mmosa paahi. Nto hiyo ninnoona wira sookhala itthu sinci-ene Muluku siniir’awe, ni Owo ohiniwuupululel’awe arumeyi Awe. Ni khavo murumeyi ori muulupale onvikana Pwiya awe.

<sup>75</sup> Nave, nto, Muluku khanikawanya ovuwa Wawe ni hata mutthu. Owo ti Muluku. Nto murumeyi aaphiyereryaka nipuro owo oneerery’awe okuxa nipuro na Muluku, vano Muluku onikuxa ekumi awe khimuroiha nipuro nlo, wala etthu siiso. Hiyo nihaana wuupuwela eyo.

<sup>76</sup> Vano, mwa soowoona iyo ni otaphuleliwa, miyo nkinwerya otaphulela yoloha mpakha miyo koone orateene, ni yoowoona, etthu yaari yoloha eyo. Nto anci-ene a nyuwo moosuwela wira mookihimeerya yoloha anyu, ni khuhiwerya hata ohimya yothene. Vano koono yoloha otthikela wa miyo, miyo kaanirukunuwa ni woohimeeryani wira yookhala itthu sinci-ene mwa yeeyo nyuwo muhin’ye anyu, ni wohimeeryani ele nyuwo muhin’yaanyu. Nyuwo moosuwela wira eyo ekeekhai. Yaari ekeekhai, mwiire, “Amen.” Amen. [Muthukumano onira, “Amen.”—Mol.] Itthu nyuwo muhikihimenry’anyu. Tivo, nyuwo moone, vaari wira . . . Ntoko Nabukudonosori iiraly’awe, “Nyuwo mwaahiwerye okileela etthu kilonhe aka, vano kinrowa osuwela sai wira nyuwo mookhalana otaphulela waya?”

<sup>77</sup> Masi miyoonelo sothene iya, hiyo nihikuxeke ni wira, “SIISO ANIHIMYA T’APWIYA.” Nihiireke siiso. Hiyo nihaana okhalana nsu nnoorwa, waakhula onikhuma wa Muluku, nihinatthi ohimya wira ti Muluku. Kahi moonelo, kahi waanyiherya, hata wira enimana murima sai.

Nyuwo pooti wira, “Miyo kookupali wira yaaniweryaneya okhala sa.”

<sup>78</sup> Masi nyuwo mwaairaka, “SIISO ANIHIMYA T’APWIYA,” khamuhiyo nyuwo. Nkawehani vaplataforma. Nyuwo mootoko wona evonyen’ye? SIISO ANIHIMYA T’APWIYA ti yoolikana, khenatoko ovonyeya. Ni eyo yakhalaru SIISO ANIHIMYA T’APWIYA, khivanweryaneya ovonyeya.

<sup>79</sup> Masi, mpakha va, Owo onnikikhapelela, ’okhala wira miyo kinnimuwehereryaka Yowo. Miyo nkinatthuneke ophavela osuweliwa, wala ovuwihwa w’atthu w’ethiru. Miyo kinniilipiha voowerya waka wira kikhale owiiyeviha, ni okhala makhalelo a enamuna emosa kinoon’aka wira muKristu aahaana okhala. Ni miyo nkinaweryeke wira eyo mmansaka, masi Owo t’oniira mpakha nihiku nla. Ntoko sinihimy’aka, wira Owo ti Yoole onikihoolela.

<sup>80</sup> Itthu sinci-ene saamuweryaneya ohimmwa enamuna ela, masi yaamukuxa okathi munci-ene. Masi othene anyu moolopoliwa wa itthu iya. Nto etthu emosa paahi miyo koorumenly'akani wira "amen," okathi ovinre, nyuwo atthu mutonko okihimeerya soloha, miyo n'urwa ni woohimeeryani ele mwaahin'ye anyu, okhala wira Mutthak'ola onookaravariwa. Atthu a ilapo sothene animwiiwa ola. Nto awo yamwiiwaru "amen," uwo nto awo anoosuwela wira aakhala masu vo, ari vathi va muteko ola, ansuwela oratteene ovikana wiirela etthu yoovonyeya, wala wira "amen" etthu yoovonyeya. *Amen* enihimya "ekhale siiso." Eyo olipiherya.

<sup>81</sup> Vano, makhalelo aka othene, okhuma waary'aka mwammiravo, yookhala etthu enikitikiniha. Ni miyo kinikhalana makhalelo ootikiniha, oorika osuwela sana. Hata amwaar'aka annisuna muru aya ni wira. "Bill, nkinkupali wira ookhala mutthu onwerya woosuwelani sana."

<sup>82</sup> Nto miyo khwira, "Miyo nkiniisuwela sana mmansaka." Okhala wira, miyo kihiihela, kihiivahererya wa Kristu, miyakha sinci-ene sivinre. Owo t'onikihoolela. Miyo nkineererya osuwela sana. Miyo kinoorowa paahi vatthu Owo onikihoolel'awe, ensuwel'aka orateene.

<sup>83</sup> Miyo kinnixukhuru mwaha wa muthiyana ooreera murima ni aana, ni mwaha w'amwaar'aka ni aana anroromela wira nkaarowa waahimeerya etthu p'itthu yoovonyeya. Okhala wira, awo annaamini. Khula okathi nyuwo munaahimeery'anyu etthu, awo anvarelela yeeyo. Awo annisuwela wira nkaarowa waahimeerya etthu yoovonyeya.

<sup>84</sup> Nto kaamurowa waahimeerya aana a Muluku etthu yoovonyeya, nto? Kahi mwayiini. Nnari, mulopwana. Muluku onaattuna ana Awe mwa enamuna emosa yoolikana ya mwixuttiho. Ni okhala naxariya ni yawo, ni oororomeleya ni yawo, nto Owo onoooreeriha, miyo kookupali.

<sup>85</sup> Vano, okathi wothene, muhina mwa mukwaha, sookhala itthu sinikhumelela, miyo sahaawery'aka osuwela sana. Nto emosa wa itthu iyo sahaawery'aka osuwela sana, waari okathi waary'aka mwammiravo nto soowoona iye saanikirweela. Nto miyo kaanoona ni waahimeerya axitithi aka itthu saarowa okhumelela. Awo yuupuwela wira miyo kaamunanariwa paahi. Masi, etthu yootikiniha, yiiraneya siiso miyo saahimy'aka Yeeyo.

Nyuwo munira, "Eyo yaari muhinatthi orukunuxa murima?" Ayo.

<sup>86</sup> "Soovaha ni wiihaniwa sinikhala woohirukunuxa murima," Bibilia oohimya. Nyuwo muniyariwa molumwenkuni mu mwaha wa niwoko nimosi. Nto nyuwo khamu...Orukunuxa wanyu murima khoniruuha soovaha; iyo munootthomeliwa.

<sup>87</sup> Vano, mphironi, nto okathi waary'aka mwammiravo, yaatthun'aka yaari. . . Miyo nkaasiveliwa ni elapo kaakhal'aka. Miyo kaawehererya, khula enamuna, orowa Onikela nsuwa.

<sup>88</sup> Nto miyo kaahooperariwa, okathi woopeliw'aka, kiryeene mwammiravo. Nto okathi okhumm'aka, mw'anestesiyani oopacerya, miyo koono wira kaari muhukhumuni, kirowaka vathi. Murette eeteri waahikihileiha. Nto kaahihileya iwora thanu na tthaaru, wooka waka. Atthu yaahixanka wira kitthikele tho okhala mwa miyo. Awo yaarina operasawu muulupale, woohikhalana penisilina. Ephome; metto soomiili saari ntoko soowoopeliwa, ni kapwitthi. Mwammiravo mmosa mpatthani aka aaroomuhiya kapwitthi awe woopeya.

<sup>89</sup> Vano nto vaviraly'aya miyeeri soophiyaka mithanu na miili, kiheliliwa-tho anestesiya mukina. Nto okathi okhumm'aka mw'anestesiyani mme, miyo koono wira keemenle ota mmathalani epantte onikela nsuwa. Ni mwikimanyo muulupale wa weero musulu, ni ovuwa wa Muluku waaryaka vaavo. Miyo keemenleene vaavale so.

<sup>90</sup> Okathi Warya, yowo onoon'anyu valataratoni ohiy'ula, yowo wooniheriwe okhala Etthu yoovikana soopattuxiwa, ni waavya wa siensia; wa miyo, Owo waari Warya mmosaru yole wammanne Paulo Owarya. Owo waari Warya mmosaru waahoola aana a Isarayeli, ohiyu. Nyuwo moowehe va, Nlaikha nla? "Nlo naawanre Neeku." Moone, Nlo naari "Neeku othana." Vano, Warya mmosaru yowo.

<sup>91</sup> Nto atthu ahisuwelaka sana, woopaceryani yoono wira yaari yoovonyeya, wira miyo kaamuhimya paahi. Masi khiiraneya Eroho Yowarya ovitha ikaruma sa siensia, n'atthu vale, wira elipiherye, nto khikumihela elatarato ya Yeeyo, imara sinci-ene.

<sup>92</sup> Miyo khwira, "Miyo kinnimoona mutthu okhuneeliwe ni eruku ya mokhwani," eruku yooriipa mwa yawo. Isumana vakhani saavinre kiryeene epoma emosa. Nto hiyo naalaleyaka, khivanthuneya nyuwo—nyuwo okumiha ilatarato, nyuwo moosuwela, mutthu alaleyaka. Nto okathi. . . Yaari etthu emosaru okathi ele yaakumihw'aya; masi aahikhala mutthu aarina maakina anikumihela ilatarato. Nto miyo kimuhimeerya muthiyana mmosa aakilanthe vale, oohimusuwela. . . Miyo kaari o—oSouthern Pines. Miyo khwira, "Yookhala eruku vasulu va Muhano *Lexe ni lexe*." Muhano mmosa kihitonko aka omoona makhalelo aka. "Nyuwo munikhuma wa tothoro; ni akankuru anli, mmosa mwa khula nipele, ni nyuwo moohiwa. Nyuwo mookhuneeliwa ni kapuxu ooriipa, a mokhwani."

<sup>93</sup> Nto Etthu emosa khimwiirela munna mmosa muthiyana aakilanthe vakhiviru, aarina makina anikumihela ilatarato ni aniverunya, khwira, "Mukumihe elatarato." Nave owo khaatthuna wira siiso. Nnakhala vo, "Mukumihe elatarato," nto owo nlelo khwiisumaaliha. Nave tho khurwa, nto owo khikuxa

elatarato . . . khikumihya elatarato. Nto ele eri vale, mwa siensia. Eri nipuro siniheliwa ihapari; eruku yooriipa ntoko kapuxu.

<sup>94</sup> Nto, okathi muthiyani'ole aaminni awe ni khwiiriwa mavekelo, khikumihya elatarato naanaanoru ottuli waya, yoowooneya. Miyo khwira, "Eruku ile yoorowa." Munnona? Muthiyani'owo mukumii, ni mahala a Muluku.

<sup>95</sup> Munnoona enihimy'aka? [Muthukumano onira, "Amen."—Mol.] Nyuwo mwahimyaruru ekeekhai, nyuwo pooti otheiwa okathi vakhani, nyuwo pooti ohiiwiwa sana okathi vakhani. Masi, Muluku onoolipiherya eyo, wira eyo ekeekhai, nyuwo mwakhalaru ni yeeyo paahi. Munnona? Nyuwo nwehererye paahi. Pooti ovira miyakha, masi, ntoko mwa Abrahamu n'akina, masi Owo okathi wothene onookhaliha ekeekhai.

<sup>96</sup> Okathi Nlaikha nle iwe . . . Ni miyo kinoona wira, waahiya amwaar'aka, aakhala athu va ohiy'ula, mwa miyakha miloko miraru sivinre, yeemenle vakhiviru okathi Nlo nikhurunw'aya. Ookhala mutthu vamuthukumanoni naanaano aari weiwe okathi Nlaikha n'Apwiya, nenno naaruule omurathhini emara yoopacerya, ohoolo w'athu? Muvenxe matata anyu. Ayo, awo ari vo. Munnona? Vano, kinnimoona Muhano Wilson ovenxa ntata nawe. Owo aari weiwe. Amwaar'aka, vale, awo yaari weiwe. Nto nkinaasuwela akina w'athu, yaari mukerekhere mwa muratthi va, ohoolo w'athu anci-ene, anci-ene, okathi wapatis'aka ewora yanenli oxekuwa.

<sup>97</sup> Nto naanaanoru musulu ntoko epronse, weiwo wahaakhanle epula isumana isumana sene, va Owo onoorwa n'ukhuwela, khwira, "Ntoko Yohani Mpatisa aarummwe awe, wira ahoolele Orwa Woopacerya wa Kristu, nyuwo munirummwa ni Mutthaka, wira ohoolele Orwa wa nenli wa Kristu."

<sup>98</sup> Alopwana anci-ene, mwa alipa a nakoso, mmuttettheni, yeemenle mukerekhere wa muratthi, khukikoha etthu Nlo naahimy'aya. Miyo khwira, "Eyo khayaari yawaka miyo. Eyo ti yawinyu. Kookupali." Uh-huh. Nlo khurowa. Nto okathi Nlaikha nle nirowaly'aya, nyuwo muupuwela vale, Nlo naaronwe onikhuma nsuwa okathi Nlo naarow'aya; naanaanoru, osulu, vasulu v'eponti, khurowa onikela nsuwa.

<sup>99</sup> Ohoolo waya, kikumanana muthiyana mmosa onsoma ittheneri, yowo ori Namaxiitta. Nto awo khukihimeerya mwaha wa muloko wa ittheneeri saathukumanne vamosa muhina wa muloko owo.

<sup>100</sup> Okathi, asuweli oPapiloniya woonaly'aya oPalestina, ittheneeri iya tthaaru muhina mwa muloko. Nyuwo mookiiwa miyo ohimya yeeyo, imara sinci-ene. Nyuwo moosuwela wira eyo ehooniheriwa, isumana iya piili sookiserya, okhala ekeekhai? Munna Sothmann, nyuwo mookhalana epaphelo ele ni nyuwo ohiy'ula, nipuro pi nipuro mury'aynu? Eyo eri mpapheloni, epaphelo ya xornale y'Ettiminku, nihiku na neethanu na

maxexe na Dezembro, wira, mulipa-oolepa ihapari aaronwe iwe, nto khuwehaweha itthu sothene iya. Nto hiyo ninooona seiyo vano, wooniheriwa, wira hiyo nri. . .Mwakha ola onoorwa 1970. Miyakha mithanu na miili woohiya mahiku, woothipula miyala, ni khooniheriwa wira ti yoovonyeya. Vahooxa ovikana sinuupuwel'anyu. Nkimoonne Munna Fred, nnakhala. Munna Sothmann, muri vaava? Mookhalana epaphelo ele ni nyuwo, Munna Sothmann? Mookhalana. Owo ookhalana epaphelo eyo. Khino meelo ohiyu kinimooleelani wira musome. Khanirina okathi, ohiy'ula. Wira, nyuwo muwerye wona.

<sup>101</sup> Nto, nkaaweheni, vekeekhai. Asuweli ale, Asuweli aYuta oPapiloniya, asomaka ittheneeri, yaahoonna ittheneeri iye omorela muhina mwa muloko aya. Nto vairanen'ye aya, awo yaahisuwela wira Mesiya aari elapo ya vathi. Nto awo khurwaasa, mpakha oYerusalemu, yiipaka. Mukwaha wa miyakha miili! "Ori vai Ole oniyariwa Mwene a aYuta?" Yaaneetta nno ni nno mphironi. Nto, vano, Is- . . .

Atthu a Isarayeli yaanaatheyasa, "Nikhuru nla n'anamathipelela!" Awo khayaasuwela hat'etthu wa yeeyo, masi Mesiya aari elapo ya vathi. Nto vano nyuwo munnimusuwela wahala ene onihala, etthu awo yaahimaly'aya.

Vano, hiyo nnoosoma yeeyo, meelo ohiyu.

<sup>102</sup> Vano, nirweelaka yeela, wira soowona khasinvonyeya, okhala wira iyo sinikhuma wa Muluku. Nto mukwaha wothene, yookhala etthu enikipurula, ekisukhumaka.

<sup>103</sup> Vano, okathi Namaxiitta owo okihimeeraly'awe itthu iya, okathi waary'aka mmiravo paahi, musunka a etakhwa munixaiwa-mo; ahiso ehinatthi yeeyo, kookupali wira yaari yeeyo, mwaha wa itthu iya. Nto eyo yaahikitutuxa, okhala wira miyo kaanoova ele aari Namaxiitta. Masi ohoolo waya kaahiphwanya wira Asuweli a mBibiliani yaahikhalana exariya, okhala wira Muluku onihimya wirimu Owo ohinatthi ohimya vathi, awehaka irutthu iye sa wirimu.

<sup>104</sup> "Muluku khanimuthanla mutthu, a maloko othene," ohimnye ti Pedru. Vano, masi ale animoova Yowo, mwa maloko othene, Muluku onniwaakhela. [Nipuro vahiitthi mufiitani—Mol.]

<sup>105</sup> Ni hiyo ninnoona, nto, kaahitthuna ohiya muupuwelo owo. Masi, oh, yaamukuxa iwora, okela mwa mwaha owo, moota eyo yeett'aya siiso voohihyererya, yeett'aya siiso. Masi miyo kaahituthuwa.

<sup>106</sup> Namaxiitta ola khukileela, "Nyuwu khamunkhalakhala mukelaka ohoolo epante Onikhuma nsuwa." Khwira, "Nyuwu muyariwe vathi va ekanyero." Nto khwira, "Nyuwu . . .Ekanyero ele, muloko ole wa ittheneeri, okathi sikumanne aya, vale, nihiku niyariw'anyu, iyo saari epante onikela nsuwa. Nto nyuwu muhaana orowa epante onikela nsuwa."



Miyo khwira, “Muliyaale.”

107 Miyo—miyo nkaarina naata ni yeeyo. Nto okathi wothene, nnakhala vo, nlelo, ele khiyaakhumme vamurimani vaka.

108 Nto, okathi waary’aka iwe ohiy’ule, mwaha wa soowoona iya. Miyo nkaawerya osuwela sana. Axinna aka aPatista khukihimeerya wira ele yaari ya xetwani. Nave nto varuuly’aya Nlaikha nle, Owo vekeekhai khukiroiha mwa Solempwa, khwira, “Ntoko saary’aya okathi ule!”

109 Okathi anamukuttho yaanyakulihan’aya mwaha wa itthu, ahisuwelaka hat’etthu wa mithinto sa ikhasako saatthuneya awo owara, n’ikuwo ni itthu sothene, ni anyakulihanaka mwaha wa ivirikanelo saya, Asuweli yaathara ettheneeri arowaka wa Kristu.

110 Okathi alaleyi yiir’aya wira Yesu aari namawoka, Pelizepuli, xetwani khuyenya khwira, “Hiyo noosuwela Nyuwo mw’ani, Ole Owarya a Muluku. Munirweelani onihaawiha ohinatthi ophiya okathi?”

111 Okathi Paulo ni Sila jaarwanse aya, alaleyaka Ehapari yooreera, nahako mwaamukhaani akilantheene mphironi. . . Nto alaleyi a elapo ele khwira, “Axilopwana ala anamawoka. Awo anoopwexakasa ikereja sahu, ni sikina, atepanyaka olumwenku, n’uhonona waya.”

112 Masi exeni yiiranen’ye? Namaxiitta ole mwaamukhaani, nahako ole mwaamukhaani, khwira, “Ala atthu a Muluku, annihimeerya ephiro y’Ekumi.” Nto Paulo khuulumela eroho ele mwa yowo. Owo khaathunne hata mukhaliheryo wira okhalele onamoona wa mutthu owo aary’awe.

113 Yesu okathi wothene aanaahimeerya wira amaale. Masi eyo eri wira yooniherye wira, imara sikina, axetwani annisuwelaxa itthu sa Muluku waavikana alaleyi; awo anikhala oovariwa n’unamukuttho vanci-ene. Yaari siiso, mBibiliani, ni Muluku khanrukunuwa.

114 Nihiku nimosa, kirwaaka, miyakha mithanu sivinre, kikhumaka owanny’awe Munna Norman, kaamweettiha kikhuruwelaka ohitto. Nto miyo kaahikhalana muthukumano iwe, nto Apwiya Muluku khukikhumelela mwa yoowoona. Nto miyo kaakilanthi ohoolo wa mukhor’aka, owannyaka nno. Nto yaakhala wira okathi khawaari sana.

115 Anci-ene a nyuwo atthu munimuupuwela yoowoona ene. Yolempwa muliivuruni mwaka mwa soowoona. Miyo kiroolepa wira kikupali wira nkinliyala.

116 Nto mwa yoowoona yeela miyo koonaly’aka, yaahikhala etthu emosa jaaruule mphironi, ni yaahikhala maluku yaamwaramwaren’ye vapuwani vaka wothene. Ni yaahikhala miyaapattho ni sookhurupa, nno ni nno eriyari y’ephiro, ni miri sahiikitthiwa n’upheliwa. Nto miyo kipacerya orukunuwela

vamukhora, nave owo waari wothene woottiyeliwa ni maluku. Nto miyo kikhuma, wira kimuhimeerye mulopwan'ole, "Mwaha wa xeni ila?"

Nto owo khukhala ooviruwa vancipale, khukisukhumela ottuli, khwira, "Ti siiso ery'aya ni nyuwo alaleyi!"

117 Miyo khwira, "Miyo kirimookohani paahi, 'Mwiireneni yeela?' Nyuwo mu—nyuwo munoorwa epantte aka y'ephiro, nno. Muniirelani ila?" Nto owo aahalela okimana, nto khukisukhumela ottuli.

118 Nto miyo kuupuwela, "Miyo kinrowa omuleela paahi wira khansuwela etthu enihimy'awe."

119 Nto Nsu nimosa khulavula, khwira, "Muhiire siiso. Nyuwo mwa murumeyi."

Nto miyo khwira, "Vaareera."

120 Nto miyo kirukunuwela, nto, moonoo aka woolopwana, kikilanthi ene ohoolo wa mukhora, yaahikhala ekarosa. Moosuwela, ekarosa yookhuneeliwa, n'ikhavalo sitthukeleliweene vaavo. Nto amwaar'aka yaakilanthi epantte yoovirikana ni ya mulipa-oweettiha. Miyo kiweha ottuli, ni an'aka yaakilanthi ottuli iwe. Miyo kiwela vasulu vakarosa. Miyo khuwiirela amwaar'aka, "Mwaar'aka, miyo koovilela sothene saawery'aka ovilela." Nto miyo kittotta mikhoyi kitotha ekhavalo, kipacerya weettiha kirowaka onikela nsuwa.

121 Nto Nsu nimosa khukiirela, "Ela yiiraneyaru, nto murowe onikela nsuwa."

122 Munna Wood, namateka va mukereja mwahu, ni atiministaratore. Akavi anuupuwela yoowoona vano, anuupuwela miyo kooleelakani? Vekeekhai. Yoolempwa vapapheloni. Nto miyo kimuleela Munna Wood...Owo t'othumme, nthala nle, n'okereja vale. Nto owo aarowa oteka empa ya maluku vale. Miyo khwira, "Muhiire siiso, Munna Wood, 'okhala wira awo khanrowa woovahani musurukhu anyu wa yeeyo. Khino, alakela..." Eyo yiiranen'ye miyakha sivinre, miyakha mithanu sivinre. Miyo khwira, "Alakela, awo anoorowa, oviriha eponti ile va, ni maluku ale alakela alisensu aka, ni weetta waka n'itthu, siry'ene va." Ohiya okhala maluku, yaari mapattuuxa a kokotto. "Nave nto awo anrowa ohelasa eyo vathi va, 'okhala wira awo yaahihimyasa mpapheloni wira ti yeeyo awo yaatthun'aya wira." Vano, owo khuhiteka. Vookiserya awo khulakelasa, wira mwakha mmosa ohoolo waya, wala miili, yaarowa opwanyulasa, vathi *siisa* sa. Vano eyo khutthokihwiwa, vano miyo kiliyala, khumala.

123 Vano, etthu yootikiniha ekhumelenle mwakha mmosa ovinre. Miyo kaarina miteko sookokhorela ohiyu umosa okereja wa Munna Junior Jackson. Okilanthi va, murumeyi Metotista

aakhenle Eroho Yowarya, ni opatisiwe ni Nsina na Yesu Kristu, ni oneettiherya kamosa kamosa wa ikereja axinn'ihu.

<sup>124</sup> Wira niwooniheryeni paahi moota Muluku onivar'awe muteko n'atthu ala, miyo kinihimya ela ni murima aka wothene. Miyo nkinsuwela hata muthukumano mukina mulaponi mothene, muthukumano onikhala vamosa hata mukina, vaavo onkupaly'aka wira Eroho ya Muluku yookhala-vo, ovikana muthukumano ola. Awo aakhalana ivirikanelo saya. Vekeekhai awo khakhanle vatthu vaatthuneya wira ekhale, khavo hata mmosa wa hiyo, masi awo ari vakhiviruxa ntoko mutthu ti mutthu mukina miyo onimusuwel'aka.

Miyo kinoowoonihani, kisuwelaka etthu yaarowa okhumelela.

<sup>125</sup> Munna Jackson khuloha yoloha. Owo khaawerya oliyala; ni miyo kiira kihiyaka ekereja awe, nto owo khaawerya ovilela eyo.

<sup>126</sup> Ovinre okathi xeni, Munna Jackson? [Munna Jackson onira, "Miyo kaalonhe mweri wa Fevereiro wa 61, Munna Branham."—Mol.] Fevereiro wa '61, owo aalonhe awe.

<sup>127</sup> Nto owo khukirweela miyo, nto owo khwira, "Yookhala etthu eri vamurimani vaka. Kihaana wooleelani, Munna Branham."

Miyo kwira, "Muroweke ohoolo, Munna Jackson."

<sup>128</sup> Nto owo khwira, "Yookhala elonhe aka." Nto yaari yeeyo! Miyo kikhala oomaala paahi, n'uwiriyana n'uweha. Owo khwira, "Kilonhe wira waahikhala mwako muulupale, ntoko mmathalani, mwemmo waari-mo malaxi ooripelela wala etthu siiso." Nto khwira, "Vasulu vamwako ola, vaavo maasi yaaworokhonly'aya etthaya, naahikhala nluku vasulu, vasulu vamwako owo, ntoko vethokani vamwako. Naari nluku; kahi malaxi. Nto vaavo maasi yaaworokhonly'aya-vo, yaahikhaliha muthinto mmosa wa yoosoma vamaalukuni vaava. Ni nyuwo mweemenle vaavo, mutaphulelaka yoosoma vamaalukuni vaava." Nto khwira, "Othene ahu," ni va eri enamuna owo aahimme awe, khwira, "axinna a oGeorgia, ni mapuro othene mukerekhere, hiyo othene naari vamosa, noowiriyanakani nyuwo otaphulela mwiiriirya ole waalempwe vanlukuni vale, mwako ole."

<sup>129</sup> Nto khwira, "Vano nyuwo muttotta etthu, ntoko yaakhuma musulu, etthu emosa ntoko ekaruma, wala—wala mukwala." Khayaari yeeyo, munna? "Etthu emosa ntoko yeeyo, ekaruma, yoothokolowa sana." Nto khwira, "Eyo, mwiirale sai yeeyo, nkinsuwela." Nto khwira, "Nyuwo muroomana ethoka ya mwako ole, khupwexakaserya vaavo, khukumihia ethoka aya. Yaarina ekhalelo y'epiraamite. Nto nyuwo mupwexakasa ethoka aya." Vano, eyo yaari miyeri ni miyeri ni miyeri ohinatthi olaleeriwa Mutthaka w'epiraamite. Nto khwira, "Vathi vaya naahikhala nluku nootteela, mukwili. Nto nyuwo khwira, 'Nsuwa, wala warya, khiwaatonko waaryela Ela khalai. Nkawehani Ila. Nwehaxaxe Yeela.'"

<sup>130</sup> Nto eyo ekeekhahi, okhala wira, woopakiwani w'olumwenku, olumwenku opakiwe ohinatthi okhala warya. Hiyo othene ninnisuwela eyo. Muluku eettaka vasulu va maasi. Nto—nto vo, wopaceryani, Owo khulavula wira okhale warya. Nto, yookhweya, vathi vaya, okathi woopakiwa weiwo, warya iwe khiwaatonko orwa vasulu va nluku nle.

<sup>131</sup> Nto owo khwira, “Nkawehani vasulu v'etthu Ila. Warya khonatoko orwa vasulu Vaya khalai.” Nto okathi othene awo avenyans'aya, miyo khwaahimeerya wira aweheke Yeele, nto othene aya khurwa wira awehe.

<sup>132</sup> Masi owo khwira, okathi awo yaaweh'aya, owo khuweha n'ixeri, kookupali wira yaari siiso, nto khukiweha miyo. Miyo kihuluwela epante emosa, kipacerya orowa epante Onikela nsuwa, nsuwa nitupweelaka; kiwelaka mwako, kikhuruwaka mwako; kiwelaka mwako, kikhuruwaka mwako; oyevaka oyevaka, mpakha orimeela khuhinooneya.

<sup>133</sup> Nto owo khwira, nto, okathi wiiraly'aka siiso, owo khwira, “Vano axinna khurukunuwa, n'uvira okathi vakhani, khwira, ‘Owo oolakaseya? Oronwe vai?’” Nto khwira, “Akina aronwe ephiro *ele*; akina khurowa ephiro ekina, n'akina ekina.” Masi, atthu vakhani paahi khuhala awehaka ele miyo kaahimeenry'aka.

<sup>134</sup> Vano nwehe otaphuleliwa wa yoloha. Yeeyo, kihinatoko aka omuhimeerya etthu, wala hata emosa wa itthu iya nkinamuleele, hata mmosa wa yawo. Masi, miyo khwira, “Ayo.” Nto murim'aka, otuphaka. Miyo kaamuweha. Vano, yoolempwa yootikiniha. . . Mulipelele, miyo kinoohiya eyo okathi vakhani.

<sup>135</sup> Kahi khalai, Munna Beeler. . . Munna Beeler imara sinciene onikhala ni hiyo. Nyuwo muri vaava, Munna Beeler? Ayo, ottuli nno. Billy khwira, “Munna Beeler ori othene ooxanka. Owo olonhe etthu yootikiniha.”

<sup>136</sup> Miyo kimuwela Munna Beeler, nto owo khwira, owanny'awe ohiyu umosa, okathi waarow'aka owaakhula atelefoni kamosa kamosa. Nto owo khwira, “Munna Branham, yookhala elonhe aka yootikiniha.” Khwira, “Kilonhe wira kaamukhuruwela kittharaka muro, kirowaka onikela nsuwa. Ni yaahikhala ephiro moonoo woohiyana. Ni miyo kaari moonoo woohiyana, kirowaka onikela nsuwa mphironi, ekhalaka ntoko, kaarowela nikoto na inyompe. Nto moonoo woolopwana, khwiiraneya okathi oronw'aka-wo, nyuwo mwaari weiwo. Nto nyuwo mwaakuttela nikoto nuulupale na inyompe, ni yaahikhala yolya yoophiyerya vale.” Nto khwira, “Vano nyuwo muthukumanya nikoto nle munaroiha omuro.” Nto, vaakhala ntoko, khino kaaroomukwata ni muru wira aweheke makoto ale. Nto owo khwira, “Vano, enookhala yookhweya ni makoto ale, miyo koosuwela wira awo anoorowa epante yookhweya. Masi Munna Branham onthuna wira awo akhale

moonoo woolopwana wa muro ole, vano miyo kinoowelega ephiro ela nno ni kaakhottiherye otthara muro epantte ela, ni kaakhottiherye orowa epantte ele.” Masi, owo khuweha wira, miyo nkinatthareke nikoto nlo, masi kaahirowa, onikela nsuwa. Owo khwira, “Alakela owo onrowela ale athweelenle.”

<sup>137</sup> Vamanly’awe ohimya yoloha awe, miyo khoona. Nave nto, nwehe, owo ohimye wira aanihovela mwaha wa miyo, vano owo khutthika wira owehe. Nto khwira wira miyo kaarwa mpakha mwako woolipa, nto naanaanoru kilakaseya. Nto owo aanitikinihiwa exeni yaavonyen’ye. Owo khikhuruwa. Nto vo waahikhala muro mwaamukhaani epantte awe, waakawanyeya orowaka moonoo woohiyana. Miyo kinoona wira eyo ekeekhai, Munna Beeler. Ayo. Nto owo khuweha wira okhuma... Nto epantte aka yaahikhala ekhwarara yowooiha. Vano nto owo uupuwela wira kaakenle mukhwararani memme nto—nto kipweteya. Vano owo khuweha wira, nto kuhimya wira aarowehaweha, khoona ekhumelelo ya ikhwarara iye, yaamukhuruwela so ni wiirha ehimye ya naattuutu okaphulela, masi maasi khayaamorela vathi. Owo khuwehaweha muratthi mwaamukhaani, wala muro mwaamukhaani, ni owoona axinama kamosa axikhaani ni maaru oovilikeya. Nto khwira, “Kookupali wira kinoomuvara mmosa.” Nto owo khulapuwa.

<sup>138</sup> Vano owo khuhala akuupuwelaka miyo. Khweemela vantumuxani naamukhaani, wira awehe ni oone sinto waahikhala mphito, mwaamukhaani, woophunyeya, nyuwo moosuwela, waakhanly’aka wooviraka. Masi, khwira, “Khayaakhanle hat’etthu.” Vano owo khukhala ooxanka. Owo khwira, “Exeni emukhumelenle munn’ihu? Kaatthuna kisuwele etthu emukhumelenle Munna Branham?” Vano vatuthuwaly’awe, ohimye wira aanikiwa olavula. Nto miyo keemenle vethokani ya mwako. Nto khumuleela Munna Beeler otaphuleliwa wa yoloha yeyo kaamuvahaly’aka woohikhala khalai, ni kaamulenly’aka wira aawehererye Apwiya, wira nihiku nno kaamurowa omukumanana vasisironi. Nto vale aaniphwanyaneya.

<sup>139</sup> Vano, otaphuleliwa wa yoloha eyo t’ula: Okhala wira muro owo waari muulupale, waari muro w’ekumi. Miyo kaarowa epantte onikela nsuwa wa yowo, n’uwo aarowa siiso; okhala wira, owo aari mphironi, owo aamutthyawa vakhani... akhuruwelaka ephiro yela. Nto epantte ekina yaahikhala malaxi manci-ene, masi muhuru munci-ene, ni miiwa, etakhwa; masi mme khiyaareere malaxi. Nto ti siiso hiyo nnaaphavel’ahu Apwiya, ni Yolya y’Apwiya, muhina mwa mikattyamiho. Othukumanya nikoto na inyompe, yaari ekereja ela, waakhaliha epantte ele. Nikoto vekeekhai nnootthara ephiro yookhweya, muromolelo, nawerya vale; yeeyo, ephiro yaathoonyerya

muromolelo. Miyo kipacerya ottikiherya mphironi, wira kaakhoottiherye orowa mmuromoleloni.

<sup>140</sup> Mpakha voonaly'awe exiri yeeyo yaari yoohiweryaneyi ovira mara, yaakikhoottiherya orowa onikela nsuwa, waari mwah'ole wa mposito ni kuvernu. Khaavo onwerya osuwela sana moota okhumme aka-mo. Yaari exiri yaakittiyela, masi Apwiya khukiviriha muhina, nto kaari vasulu vaya. Miyo kinimoophwanyani, Munna Beeler, osisironi.

<sup>141</sup> Nto vano, nto, naanaanoru numala yeeyo, Munna Roy Roberson. Munna Roy, muri vaava ohiy'ula? Ayo, miyo—miyo kookupali wira... Exeni? [Munna mmosa onira, "Epannte ekina."—Mol.] Epannte ekina. Owo aarookiihana, ni yookhala aalonhe awe. Nto owo aalonhe wira hiyo naathukumanya makoto a inyompe. (Vano, eyo ti yaneeraru.) Nithukumanyaka nikoto na inyompe. Nto yaahikhala malaxi, yaaphiya muyuununi, yolya yoowaatta. Othene ahu axinna naari vamosa. Vano niphya nipuro nlo wira nilye ohiyu, nto Munna Fred Sothmann khuyenya khwira, "Eliya, profeta muulupale, onoolavula vaava olelo, othana eriyari." Vano nto othene ahu valiy'ahu, athu othene khurowa, nto owo khuxanka mwaha wa xeni athu yahaawehereny'aya wiiwa Ele yaarowa olavuliwa.

<sup>142</sup> Vano, nkoonani moota eyo eniiwanan'aya sana ni Munna Jackson! Moone, vekeekhai enlikan'aya, enlikan'aya, n'ile Munna Beeler aahimmy'awe! Khaavo mmosa aalipelenle, wira asuwele.

<sup>143</sup> Nwehe, naanaanoru numala eyo. Munna Collins, muri vaava? Munna Collins aahiloha aryeene vaava okereja, naahikhala niira noothelana naarowa wiraneyi. Nto okathi yiiranan'ye aya, owo aahimoona Mutheli ovolowa, oolikana; masi Mwaakameliwa khaari oolikana sana, enamwi aari Mwaakameliwa; vano, eyo Ekerejaa. Ni yaahikhala etthu ntoko ekomunyau, wala mu—muteko wookokhorela wiiraneyi va, ntoko yolya y'ohiyu etthokihiwaka. Nto eyo yaari vakhiviru ni yowo okhala wira Munna Neville aakawa yolya mukereja, masi owo ohimnye wira yaari Yolya yoomalela oreera aatonko awe wona. Owo khaareere ovoliwa. Masi owo uupuwela wira khino, molohani, owo khaarowa okawa Eyo, ni wira owo ni Munna Willard yaamurowa murestante wira yalye. Nto okathi arowanse aya, Warya waari epantte ya moonoo woolopwana khuttiha. Vano, nyuwo moosuwela exeni Iyo.

<sup>144</sup> Vano, Yolya. Mwaakameliwa kahiyo oolikana, masi Mutheli t'olikana. Mwaakameliwa khanatthi olikana nlelo, masi Yolya yaakaiwa khayaaari yolya ene, eyo Yolya ya eroho yeeyo nyuwo enikhalanak'anyu, okathi wothene.

Mukihye keemele vaava yoloha eyo ya neexexe, okathi vakhani.

<sup>145</sup> Nyuwo khamunuupuwela, Munna Fred Sothmann, Munna Banks Wood, okathi waary’ahu w’Arizona mwaisana, okathi naaxayaahu oophako, nto Apwiya khulavula? Khamunsuwela itthu Awo yiiralyaaya oratteene, yooniheryaka ele yaarowa okhumelela, okathi naarowa’ahu nittharaka ephiro? Yaari ekeekhai, nyuwo axinna anli mwiire, “Amen.” [Axinna awo anli anira, “Amen.”—Mol.] Khenatoko ohaleela.

<sup>146</sup> Nto miyo kaahoono mwa yoowoona okathi neettih’ahu ekaro, nihiku nlo, yo—yoowoona emosa yaakhumme w’Apwiya khukirweela, nto miyo kaamwiitthokiha wira, okathi ule, okathi otthikenly’aka owani, wira kirowe ilapo s’okhopela. Nto okathi oronwe aka ilapo s’okhopela, vano, miyo kaahoono mupaketini...ahiso epantte y’ephareya, weiwo apaketi yaakhumel’aya-wo. Nto aahikhala mulopwana mmosa, ookhuvuya vaavale, nto owo khwira, “Miyi kihootthokiheryani mwatiya, Munna Branham.” Nto naari nikula naamukhaani, noophiyaka—noophiyaka ntoko meeturu nuusu orakama waya, masi naari nootteela ntoko nakutu. Nto owo khukiirela, “Nla ti nawinyu wira mulapuwe.”

“Oh,” miyo khwira, “khani—khani—khanimphiyerya.”

<sup>147</sup> Owo khwira, “Nlo ninoorowa ikilomo miloko mithanu na mosa ni xexe khula ewora, osulu ni vathi *siisa* sa.” Eyo ti, osulu ni vathi mukerekhere w’ephareya.

“Masi,” miyo khwira, “nlo khaninrowa okilapuxa.”

<sup>148</sup> Nto vo owo khuweha vathi, khwira, “Muroweke sintoko awo anrow’aya.” Nto miyo kiweha, ni Munna Fred Sothmann ni Munna Banks Wood yaarisa vale, akilaathanse ene vanikulani noopintariwa nooripelela, ni ikaruma s’opakela iheema ottuli waya. Munna Banks ni ekofiyo yookhuneliwa osulu ntoko *sa*; Munna Fred avarenleene eleemi. Nto owo khwira, “Muroweke ntoko ale.”

Miyi khwira, “Nnari. Nkinrowa.”

<sup>149</sup> Nto mulopwan’ola khwaahimeeryasa, mulopwan’ola mwamukhaani, khwira, “Nyuwo mw’anahota?”

Munna Banks khwira, “Ayo.” Munna Fred khwira, “Ayo.”

<sup>150</sup> Masi miyo khwira, “Awo kahiyo. Miyi ki nahota, nave miyo koosuwela wira nkaarowa ni yeeyo, ni kookupali wira nkinrowa siiso.”

Khwira, “Khamunrowa ni yawo?”

Miyi khwira, “Nnari. Nnari.”

<sup>151</sup> Vano, miyo kirukunuwa. Nto, varukununwe aka, mwamulopwan’ole vapatari khwiiraneya owo okhala munn’aka ooreera murima, Munna Arganbright.

<sup>152</sup> Nto miyo kitthikela yoowoona ela, nto yaahikhala empa, yaamukhaani yoorakama. Nto Nsu nimosa khukiirela...Ni

othene anyu munnuupuwela ela, wala, anci-ene a nyuwo. Nsu nimosa khukiirela, “Muvoloihe Yolya. Muthukumanye Yeeyo. Eyo t’inamuna emosa yowaakhalaha va, waavaha Yolya.” Nto miyo kiruuha, kaaruuhale mpaani, mapipha maalupale asaren’yeene isenoora soomalela oreera ni mihokorokho sikithi soomalela oreera, n’itthu sikina, sahaatonko aka wona. Nyuwo munnuupuwela vano, yoowoona eyo? [Muthukumano onira, “Amen.”—Mol.]

<sup>153</sup> Vano, ni miyo kaahooelani ohoolo waya ele waari otaphuleliwa waya. Vaatthuneya wira kirowe oZuriki, oSuisa, ni Munna Arganbright, wira nakhalane mithukumano mahiku mathanu ohiyu. Miyo kaahimeerya axinna ehinathi wiiraneya, “Nkinrowa.” Nto kaari ni Munna Welch Evans ohitto iwe, okathi Eyo evaheriw’aya otaphuleliwa waya.

<sup>154</sup> Ohiyu umosa, kookupali Munna Welch aarookirweela, hiyo naarowa mukwaha mmosa w’orowa omiserya, nto khwira wira Munna Arganbright aamukilikarela. Miyo khwira, “Vaareera, ela eri va. Awo anoorowa okinteiha.” Nto imara sinci-ene . . .

<sup>155</sup> Kahi ni Munna Miner; owo mmosa w’apatthani aka oomalela oreera murima. Masi imara sikina, awo yaweryaru paahi . . . Awo yuupuwelaka wira nyuwo munrowa olaleerya etthu emosa eri yoovirikana ni mwixuttiho aya, awo aniira paahi munrowa okhala vale, wira mukumane n’apatthan’inyu vale. Nto awo khwira . . .

<sup>156</sup> Munna Arganbright khukilikarela khwira, “Munna Branham,” ele Eroho ehimmy’aya paahi. Khwira, “Murwe, mwaaruhe amwaar’inyu ni nyuwo,” khwira, “okhala wira khamunrowa olaleya vanci-enexa,” khwira, “okhala wira miyo kinona wira awo anootthunani ohiyu umosa paahi.” Ni khwira, “Nyuwo pooti ohikhala wira mulaleye ohiy’uwo.”

Nto miyo khwira, “Nnari.”

<sup>157</sup> “Vano,” khwira, “murwe, nyuwo n’amwaar’inyu, nyuwo othene murwe, moone, nto nyuwo mwarwa vale, kinimookuxani wira neette mukwaha. Oh, amwaar’aka, amwaar’inyu, n’atthu othene, nnoorowa mpakha oSuisa, mpakha oPalestina.”

Miyo khwira, “Nnari.”

<sup>158</sup> Miyo kaahikhalana otaphuleliwa. Kimuhimeerya Munna Welch, wala Munna Fred n’akina, “Miyo kinimooleelani voosiisu, masi amwaar’aka toko ahaana ohimya etthu.” Nto okathi waalikarenly’aka, nto awo khukhootta orowa. Miyo khwira, “Ela eri va.” Munnona?

<sup>159</sup> Vano, mwaatiy’ole, mwaamukhaani wootteela waari muthukumano yole. Ti yooreera orowa khula nipuro va, olimani, ni muthukumano mmosa, masi eyo kheniphiyerya, enamwi yaari yootteela ni yooreera, okiihana orowa ilapo s’okhopela.



<sup>160</sup> Munna Fred, ni munna ole vale, yooniherya mowoonani, awo yooniherya, “Murowe ntoko turista, wira mwathweele.” Masi miyo khiyaakicali wira siiso. Nto waakhoottela okhala anahota, yaahimya wira awo khayaari alaleyi. Masi, miyo kaari mulaleyi.

<sup>161</sup> Nto vo Yolya yaari emp’ele yaamukhaani, yoorakama. Nkaaronwe ilapo s’okhopela; nto kaatthikenle empa yeela yaamukhaani, khupaka ifiita ituusia sene, sa ipiraamite ni ithu sothene, wira siwooniherye athu okathi hiyo onikhal’ahu.

<sup>162</sup> Vano mulikanyihe nlelo yeeyo ni sikina, soloha. Ela yaari yoowoona. Yolya, Ela eri va. Nla ti nri nipuro.

<sup>163</sup> Nkawehani nto etthu yaakhumelenle. Nto naanaanoru numala orwa yoowoona ele ya neexexe, wala yoloha ya neexexe kaahimeeriw’aka, khurwa Munna Parnell. Owo ori vaava, nipuro nlo, vaava tu. Nto Billy khaari vaava, nave mulopwan’owo aari ookutakutheya. Owo onikhuma oBloomington, kookupali, wala oBedford? [Munna mmosa onira, “Lafayette.”—Mol.] Lafayette, apakaka mithukumano. Ni owo yookhala aalonhe awe, nto owo khurwa mpakha wa Munna Wood. Nto owo khwira, “Miyo vekeekhai nkinwerya ohiya ela orowa. Kihaana othariha, kihaana omuhimeerya Munna Branham. Enookihaaxa.”

<sup>164</sup> Ni Muluku onnisuwela, khiyaavo hata yoloha emosa mwa seiyo. Sirimoorwa paahi, emosa, piili, tthaaru, xexe, thanu, thanu na mosa.

<sup>165</sup> Munna Parnell khwira, “Yookhala elonhe aka yootikiniha. Kilonhe wira kaarowa okhalana muthukumano iwe. Nave enamuna emosa wala ekina, wookhala muthukumano wa mukereja esya, ntoko siiso.” Nto khwira, “Ekereja ela esya,” moota epacenry’aya, wira owo aatthuna osuwela mwaha wa xeni sahiivanan’aya iyo piili, wala etthu ntoko siiso. Nto khuhimya wira owo eemenle vaava, mpakha, “Ahe, miyo keemenle va. Kinoolipelela paahi, ni kinoowehererya muteko.” Nto khwira, “Mulopwana mmosa khuvira mpaani, owanre-ene ikuwo sookhwila, ni eliivuru. Miyo kinoona wira aamulepa.” Nto owo khumuhimeerya Munna Parnell, khwira, “Ola muthukumano w’athu vakhani. Ola ti wa matiyakono ni maatinistratore.” Vano, owo khwisoono ntoko oonyakeliwa. Vano owo khikhumela mukhora wa ekereja esya, ekereja yaatekiwe, wala ela yaatthokihiwe, oreheriwa. Nto okathi owo okhumenly’awe ota, yaari etthapwe, okathi woohiloka, eyiita.

Nto khaavo mmosa w’athu ala aasuwela etthu wa yeela.

<sup>166</sup> Nto vakhumenly’awe vamukhora, miyo keemenle vaavo, kiwehaka onikela nsuwa. Miyo khwira, “Muhiisoone onyakeliwa, Munna Parnell. Miyo kinooweetiheryani, etthu entthuneya nyuwo wira.”

<sup>167</sup> Nto Munna Parnell, ni khula mmosa a yawo akina, yaanisuwela wira nkinatoko waaleela hata otaphuleliwa. Naanaano va; enamwi, koonaka okathi awo yaalavul’aya.

Nyuwo mooweha moota waakhumme aka vowaakuva vale, Munna Parnell? Wira kixake woohimeeryani. Nto kirowa, nkinatoko omuleela hat'etthu Munna Wood wala mutthu mukina, hata mutthu. Kiroohiya paahi, 'okhala wira kaatthuna koone etthu yaakeetihery'aya. Nyuwo mootoko okiiwa miyo ohimya mahiku ala wira, "Koohaaxeya"? Yaari yeeyo.

<sup>168</sup> Nto vo, Munna Parnell, owo khwira wira miyo kaamuleenle wira, "Munna Parnell, mpacerye. Nto nipuro noopacerya nyuwo onrow'anyu orwa-wo ninrowa okhala Sefora." Sefora, "Sefora," neno nnihimya mukweretho, wala weemela, wala etthu siiso. Miyo khwira, "Muhikhale vaavo. Nto murowe, ohoolo, nto munoomuphwanya muthiyana mmosa mutokwene; nto vo muheemele vaavo. Murowe tho, munoomuphwanya muthiyana motokwene eekeekhai; muheemele vaavo." Nto okathi wothene hiyo naari, miyo kaamulavula, hiyo neetta eriyari ya nakhutu. Nto miyo khwira, "Murowe mpakha waaphwanya Amwaar'aka. Nto mwaaphwanyaru Amwaar'aka, mweemele vaavo!" Nto khwira owo aarowe, nto hiyo naari ota wa nakhutu, mothakoni. Ni miyo kaahilakaseya. Nto owo khuweha otuli, khiwoona amwaar'awe axekulaka maasi vehimeni, ni murumeyi mmosa aapurulaka, wira aapurulele ota wa mpompe. Owo aammuweha. Nto owo khuvenya.

<sup>169</sup> Va ori otaphuleliwa wa yoloha anyu. Nto miyo kaamuwerya woohimeeryani, ohiy'ule, masi kaaroorukunuwa paahi. Tivo nto Sefora, ni muthiyana mutokwene, ni muthiyana mutokwenexa, mukina, iyo ikerejaa. Munnona? Nto Sefora akhanleene vekeekhai mwa—mwaara a Moise, Sefora, nto hiyo ninnoona wira miyo kaamuleenle wira aheemele wa yawo, hata wira yuululanse sai. Saari mitthenkeso. Muheemele memmo. Awo aakhala okathi aya. Masi okathi oruuly'awe w'Amwaar'aka, yeeyo ekhanle Ekereja aka Yesu Kristu okiveleeliheny'awe, ela nihiku nla nookiserya, ni t'Ila eri va, "Mweemele vaavo!" Nto miyo kirowa onkela nsuwa.

<sup>170</sup> Nto Munna Steffy. Owo pooti ahikhanle vaava, okhala wira aari oxipiritali. Miyo nkinsuwela vatthu. . . Ookhala Munna Ste- . . .? Ayo, ola ori va. Munna Steffy onrwa owanny'aka wira nilompe, ohinatthi orowa oxipiritali wira ooperariwe, wira Muluku amukhaliherye ni amureerihe. Ni veekeekhai Owo ohiira.

Nto owo khwira, "Yookhala elonhe aka yootikiniha, Munna Branham."

Miyo khwira, "Ayo?"

<sup>171</sup> Nto owo khwira, "Miyo kilonhe kiryeene epantte Onikela nsuwa. Nto miyo. . ." Eyo ti ya neethanu na mosa. Nto owo khwira, "Miyo kilonhe kiryeene epantte Onikela nsuwa, nto yaahikhala elapo ya matumuxa. Nto okathi owehaly'aka, keemenleene vasulu va ntumuxa, aahikhala mulopwana mmosa

owuuluvala sana aarina ireru soorekama, sootteela, ni maihi ooreera aarin'awe yaannuwa akhuruwelaka owiitho wawe. Ni owo aahikhalana ekhasako yootteela, etthu emosa, nlaya," khwira, "ettheke yaamuvekhulela." Miyo kinoona wira eyo ekeekhaii, Munna Steffy, siiso. Nto khwira, "Miyo kitthikela kaattamelaka. Owo aarimweemela, vasulu vethokani va mwako, awehaka onikhuma nsuwa." Nto khwira, "Miyo kixanka, 'T'ani mulopwan'ola owuuluvala?" Nto owo khuruwa vakhiviru, vakhiviru. Nto vaphiyaly'awe vakhiviru, khusuwela wira aari pani. Aari Eliya ohinookhwa, profeta, eemenleene vale awehaka epantte Onikhuma nsuwa.

172 Owo khwira, "Kihaana omoona." Owo aanitthuna etthu. Nto owo khutthyawa arowaka vasulu va ntumuxa khumorela vaavale, wira alavule ni yowo, mwa nsina na Eliya. Nto khwira, okathi owo olavunly'awe. . . Owo aahiiwa nsu, niirale, "Munthuna exeni, Munna Steffy?" Nto kaari miyo.

173 Yoloha anyu yaamaliheriwe vaavale vene, Munna Steffy. Maana, naanaanoru numala yeeyo, kaahirowa oLouisville. Etthu owo aathun'awe yaari mavekelo. Munnona? Vano owo oovira oratteene, oxipiritali; nto ethoonyeryo ya miyo orowa onikhuma nsuwa, oweha onikhuma nsuwa, mwaha wa nikoto naka. Nwehe. Okathi . . .

174 Miyo kaahirowa oLouisville. Nto okathi ohokolonw'aka, vaphiyaly'aka vamukhora, yaahikhala mapattuuxa vale, vamukhora vaka. Mwenye Goynes, a ephiro y'opoma va, aawelega mphito. Owo khwira, "Billy, murwe nno." Khwira, "Muhaana othamiha mikhora sanyu n'itthu, ekintaali, ekintaali ya maluku ni mikhora."

Miyo khwira, "Ahe, vaareera, Bill." Miyo khwira, "Kini—kinimwiira. Silini?"

175 Owo khwira, "Kinimooleelani. Kinimoosuvelihani okathi aya." Miyo khwira. . . "Wopaceryani wa mwakha, awo anoopacerya wira."

Miyo khwira, "Vaareera."

176 Vano miyo kipacerya otthikela owani, nto amwaar'aka khwira, "Kihaana orowa olooxa voowaakuva." Nto miyo kirowa kittharaka mphito. Nto mmiravo mmosa, Raymond King, yowo ori nxinyeero a mpoma. Miyo kweekwe kaamwiihanaka "Mud Ear [Nttaava n'Enkelesi: Mud enihimya ottophe, Ear enihimya niyaru—Mot.]" Okhala wira, hiyo naari anamwane, naarapelelaka vamosa, owo aammanne mmiravo mmosa owaruni nnikotto n'otoppe. Nto hiyo kweekwe naamwiihanaka, "Mud Ear." Owo onikhala vakhiviru ni vatthu onikhal'aka, vakhiviru-vakhiviru wa mukhora wa nenli n'uvikana wa Munna Wood.

Nto siiso miyo khwira, "Mud, murwe va minutu mmosa."

Owo khwira, “Vaareera, Billy.” Nto owo khurwa vale.

Miyo khwira, “Ekhomu ele muthipenly’anyu?”

<sup>177</sup> Owo khwira, “Billy, eyo, awo anrowa okuxa etthu yothene.” Khwira, “Miri iya sothene, ikintaali iya, n’itthu sothene sikina, sihaana okumihwa.”

<sup>178</sup> Miyo khwira, “Vano, nxinyeero okihimeenrye wira empa aka yaaniphiya mpakha eriyari y’ephiro.”

<sup>179</sup> Khwira, “Ayo, masi awo anrowa omwarya. Anoorowa ophwanya, mwa khula enamuna.” Khwira, “Yawaka nave.”

<sup>180</sup> Miyo khwira, “Vano, Munna Wood na—namateka ipa, ni,” miyo khwira, “Miyo ki—miyo kinoomwiirela wira asusiherye ottuli.”

<sup>181</sup> Khwira, “Billy, muhikwanye etthu iyo. Mmuhiye mulipaooteka iire. Owo t’ori mukhulupale aya, kahiyo?”

Miyo khwira, “Ayo, mulopwana.”

Khwira, “Mmuhiye iire.” Khwira, “Nyuwo moosuwela enihimy’aka.”

Miyo khwira, “Ayo.”

<sup>182</sup> Nto miyo kikhuma, vano, waakuva *weiwe*, etthu ekimana. [Munna Branham oruminhe ekatha awe—Mol.] Kirowa owani, kirowa okatthi waka w’osoma, kikuxa eliivuru ile, nto yaari memmo. Khasaari ipulooku sa kokotto; yaari maluku. Miyo khwira, “Meda, mwiilikanyihe.”

<sup>183</sup> Soloha thanu na mosa soolikana, vano nto yoowoona khumaliherya. “Itthu iya sakhumelelaru, murukunuwele onikela nsuwa.”

<sup>184</sup> Miyo kilikarela oTucson. Munna Norman ookhalana nipuro nimosa. Miyo nkinsuwela otthu onrow’aka. Nkinsuwela etthu yo wira. Miyo paahi kiri mu. . . Miyo kirimweemela. Nkinsuwela etthu yo wira. Kinihiya empa ehirin’aka yooliva. Kinaakhela itoolare emiya emosa khula esumana. Ni miyo kihaana oliva empa itoolare emiya emosa khula mweri. Miyo kiri va n’axinn’aka alopwana n’athiyana, nipuro oniphentiw’aka-vo. Nto miyo kinoorowa, nkisuwenle vaavi. Nkisuwenle mwaha wa xeni. Nkinwerya wooleelani mwaha aya. Masi yookhala etthu emosa paahi ensuwel’aka, ottharaa ele Owo onihimy’awe wira kiire. Miyo nkinsuwela, nkinsuwela ephiro xeni yoothara, etthu yowiira. Kahi hata emosa yawaka. . .

<sup>185</sup> Miyo kinoona wira Abrahamu onne siiso okathi Awo yaamuhimenry’aya, “Murowe, epantte ekina ya muratthi.” Owo khaasuwela etthu yowiira woohikhala wetta, khwiivalaanya. Nkaasuwela etthu yowiira.

<sup>186</sup> Esaapatu evinre voosiisu, esumana emosa okhuma nsana, woophiyaka iwoora ttharu sa voosiisu, kaaroovenya kiwurya maasi, ni kimukhuneela Joseph, okatthi wawe. Nto

kitthika, kirupaathi. Kirowa orupa. Nto varupaly'aka. . . Miyo kinoolikanyiha soloha iya sikhani n'itthu, wira nyuwo moone mulipiheryo w'etthu miyo entthun'aka ohimya. Miyo—miyo kimukhuneela Joseph, kitthika kirupaathi, kirowa orupa. Nto kiloha etthu.

<sup>187</sup> Nto kiloha wira kaamoona mulopwana mmosa aari ntoko atithi aka, enamwi aari mulopwana mmosa muulupale. Ni kimoona muthiyana mmosa aari ntoko amey'aka, paahi owo khaalattanne n'amey'aka. Nto mulopwan'ola aari oomutakhalela murima mwaar'awe. Ni owo aahikkhalana ekopo yoothokolowa ipantte tthaaru, vaavo owo aathikinly'awe mwiri ula. Nto khupaka. . . Nyuwo moosuwela, othikila niwuni, vanttoroni, nyuwo moosuwela, enikhuma ekopo yoothokolowa ipantte tthaaru. Nto khula okathi muthiyan'ola aapacery'awe ovenya, owo aanimuvara nuxikoni n'ummana vamuru, n'umuhileiha. Vano nto owo aamorela vaavale, oonanarasa ni wunla, vano nto owo aanitthikela ovenya-tho. Owo aaneetta, owiisoona, ni avenxaleene eththirama awe, mutthu muulupale. Nto okathi owo aavany'awe tho, owo aanimuvara muxikoni, n'ukuxa ekopo ele yoothokolowa ipantte tthaaru, n'ummana vamuru ni yeeyo, n'ummoroxela vathi. Otthikela ottuli n'ovenyiha eththirim'awe, ntoko wira iirale etthu yuulupale.

<sup>188</sup> Nto miyo keemenle sivaavale, koonaka. Miyo kuupuwela, "Miyo nkinwerya omutuphela mulopwan'ole. Ole khoreere wunnuwa. Vano, nto, ole onikhala ntoko atithi aka, masi kahiyu atithi aka." Nto miyo khwira, "Owo kharina hata nakoso wo omwiiriha muthiyan'ole siisaale." Ni miyo kikhala ookattamiheya vakhani ni yowo. Vano, nto, naanaanoru, kiphwanya omyiyala voophiyerya, nto kirowa kimwaattamela, kimuvara mmukalani kimurukunxa. Nto miyo khwira, "Nyuwo khamurina ehakhi yo ommana." Nto vahimaly'aka yeeyo, mitika sinnuwa. Kaakhala ntoko mutthu oorekama ni muulupale. Nto mulopwan'owo khuweha mitika iye, vano khukituthuwa. Nto miyo khwira, "Mwattikelaru ommana tho, munrowa owana ni miyo." Nto owo khoova ommana tho. Nto miyo kivenya.

<sup>189</sup> Vano miyo kirupaathi vale okathi vakhani. Miyo kuupuwela, "Exeni ile? Ti yootikinini miyo omuloherya muthiyan'ole." Nto okathi vakhani paahi, Owo onoorwa va. Kiphwanya otaphuleliwa waya.

<sup>190</sup> Muthiyana onthoonyerya ekereja ya molumwenkuni, olelo, olumwenku wothene. Miyo vekeekhai kiyariwe mw'evitakavitika yela, ni kimpwhanyaneya va. Owo onikhala ntoko ma—maama a. . . vaari wira aari mai a anamararuwa, masi enamwi miyo kiyariwe ene memmo. Ni e. . . Aiy'awe ti miromolelo iye sinimuruma. Ekopo yoothokolowa ipantte tthaaru owo aarin'awe, opatiiso ulé w'oraaru vamosa ni masina oohikhala eekeekhai, wira, khula okathi owo aapacery'awe ovenya,

muthukumano, wira waakhele Ela, owo onimmoroxela vathi ni yeela. Nto, vekeekhai, owo aryeene muulupalexa, miyo kaahirukunuwa, kaanimoova vakhani. Vano nto kaahimutuphela, khula enamuna, nto mitika iye saari mitika sa wamini. Yowo wakuupuwelinhe wira, “Vaari wira Muluku ori ni miyo, ni onniwerya okivaha mitika, mukihye kimukhaliherye. ‘Owo khuhiya ommana!’”

<sup>191</sup> Khino yaari ewora ya namuloko nihiku nlo, okathi amwaar’aka yaatthun’aya ovolowa okatthi, vano eyo khwiiraneya. Miyo kikkhalana yoowoona voosiis’ule, nto miyo mwa enamuna emosa. . . Vano, muupuwele, khayaari yoloha.

<sup>192</sup> Vaakhala ovirikana soloha ni soowoona. Oloha okathi oniir’anyu murupaka. Soowoona, okathi ohinrow’anyu orupa. Hiyo niniyariwa siiso. Mutthu ti mutthu pure, okathi onloh’awe, eyo eri muupuwelo awe wa vathi. Ni muupuwelo awe wa vathi onikhala ottaiwene ni yoowo. Itthu sawe sa verutthuni siri sootthukuwa, okathi onikhal’awe mw’ankhili awe oopacerya. Mwa muupuwelo yoola, nyuwo, nyuwo munikhala oolikana; nyuwo munnoona, munnoona osiva, munnaapapela, munnoona wunkha, munniiwa. Masi mwakhala muupuwelo wa vathi, oorupa, nyuwo hata khamunona, khamunona osiva, khamunaapapela, khamunona wunkha, wala wiiwa. Masi yookhala etthu emosa, mwaalohaka vale, nyuwo munihokolowela muupuwelo yoola. Yookhala eyuupuxeryo, nyuwo munuupuwel’anyu etthu mulonhe anyu, miyakha sivinre. Mutthu ti mutthu pure ti siiso.

<sup>193</sup> Masi Muluku atthomelaru etthu, muupuwel’ola wa vathi khonikhala ottaiwene ni va, wa namoona, masi miyuupuwelo soomiili sinikhala vamosa. Nto namoona, mwa yoowoona, khanrupa. Owo nlelo onikhala ni miruku sawe, ni woona.

<sup>194</sup> Miyo kaahimeerya yeeyo matothoro kamosa kamosa, nihiku nlo. Vano awo khuvenyasa khwira, “Yootikiniha. Hiyo khinnatoko hata wuupuwela etthu iyo.” Okathi wiiriw’aka mayeso a mawimpi, nto awo khwira miyo. . . Awo yiira ahinatoko woona etthu siiso. Munnona? “Vano,” khwira, “yookhala etthu enikhumelela ni nyuwo.” Nto miyo khwira. Miyo khuhimya. Owo khwira, “Ti yeeyo, vekeekhai.” Munnona?

<sup>195</sup> Miyuupuwelo soomiili sinikhala vakhiviruxa. Kehiyo hat’etthu yaawery’aka wira, ni eyo khenikikhaliha oomuvikana mutthu mukina. Eyo paahi, Muluku opanke siiso. Khamunrupa. Nyuwo munikhala va, ntoko munoorupa. Munikhala va, muwehaka, siisa *sa*.

<sup>196</sup> Nto othene anyu muhoona, mulaponi mothene. Khamunrupa. Keemenleene va vaplataforma, kilavulaka n’atthu, nyuwo munnikiwa okela mowoonani n’uhokolowa. Okathi oneettih’aka ekaaro ni nyuwo, nipuro pi nipuro nikina, ni wooleelani itthu sinrowa okhumelela; ni khenivonyeya,

khenatoko ovonyeya. Ookhala mutthu otonko woona evonyeiye? [Muthukumano oniira, “Nnari.”—Mol.] Nnari, mulopwana. Khivanweryaneya ovonyeya. Khenivonyeya, akhalaru Muluku. Nkawehani, vaplataforma vaava, ikonto, ohoolo w’atthu ikonto miloko sene, hata ni mattaava makina kihinwery’aka olavula, nlelo khenivonyeya. Munnona? Ti Muluku!

<sup>197</sup> Vano, mwa yoowoona ela, wala ntoko saalavul’aka, kaahirukunuwa koono etthu yootikiniha.

<sup>198</sup> Vano, yaakhala ntoko mwan’aka mwaamukhaani, Joseph, aari mpararini mwaka. Kaalavula ni yowo. Vano, mwaweharu yoowoona eyo saana, munimoona mwaha wa xeeni Joseph eemenly’awe vale.

<sup>199</sup> Nto miyo kaahiweha, yaahikhala etakhwa yuulupale. Nto mutakhwani mu, muhina wa ni—nikoto n’axipalame, axipalame akhaanixa, oophiyaka isentiimeturu piili ni nuusu orakama waya, ni esentiimeturu emosa wunnuwa waya. Awo yaari atokweene vakhani. Mapururu aya makhaani yaari oomoramora. Ni yaahikhala oophiyaka anli wala araru varinttani y’osulu, athanu na mosa wala athanu n’araru erintta yootharelana, ni muloko n’athanu wala miloko miili erintta yootharelana; akhuruwasaka ntoko epiraamite. Nto axaapara ale axikhaani, anamitthaka axikhaani, ni awo yaari ookhulumuwa. Ni awo yaaweha onikela nsuwa.

<sup>200</sup> Nto miyo kaari oTucson, Arizona, mwa yoowoona, eyo yiiriwe mwaha wowi Owo khaatthuna wira kivonye woona vatthu vaary’aya. Miyo kiikumihia miiwa, sa mothakoni. Nto miyo khwira, “Vano, miyo koosuwela wira ela ti yoowoona, ni koosuwela wira kiri oTucson. Ni koosuwela wira axipalame ale axikhaani anthoonyerya etthu.” Ni awo yaawehasa onikhuma nsuwa. Nto naanaanoru awo khuupuwela ovava, nto khurawasa, onikhuma nsuwa.

<sup>201</sup> Nto emalakaruru okhumasa, nikoto nuulupale n’axipalame naahirwa. Yaakhalasa ntoko ipompa, ni mapupha oothokolowa, oottweelela, muthinto wowarya vakhani ovikana saary’aya anamitthaka ala axikhaani oopacerya. Nto jaarwa onikhuma nsuwa, vowaakuva.

<sup>202</sup> Nto vamanly’aya orimeela owiitho waka, kaahirukunuwa—tho wira kiwehe onikela nsuwa, vano yaahiireya vale. Yaahikhala etthu jaarumme vekeekhai yaattikinnye elapo yothene.

<sup>203</sup> Vano, muhialelele ela. Ni nyuwo, mufiitani, mukupali wira munimwaakhela ela oratteene.

<sup>204</sup> Yoopacerya, etthu jaarumme. Nto miyo koono wira jaarumme ntoko ovikana mukaano wa nsu, wala etthu p’itthu eniihan’anyu matteeke yaavikanaka nsu, nto nsu nintthikela vathi. Vekeekhai jaaroottikinya, ntoko, mukhitto muulupale, itthu sothene. Vano, vaamuweryaneya okhala o—o—oruma

wuulupale w'etari, n'ukukutteya, ntoko yeeyo; miyo nkoonne okukutteya. Miyo kiiwale oruma vancipale paahi wiiraneiyee, waarumme ntoko waari okuusini, okhuma vatthu vaar'yaka, orowaka oMexico.

<sup>205</sup> Masi, yaahittikinya elapo. Nto vattikinyaly'aya, miyo nlelo kaaweha onikela nsuwa. Ni ottaiwene mpakha mahiku Oohimala, kaahoono nikhuru n'etthu nirwaaka. Sooneya ntoko yaari malepa makhaani. Khayaari oohiphiyaka mathanu, ni khayaavikana mathanu na manli. Masi, Awo yaari ntoko epiraamite, ntoko anamitthaka ala arwaaka. Nto vairaly'aya, Owerya wa Muluku Oowerya sothene khukiteexa wira kakumane ni Yaawo.

<sup>206</sup> Nto kinniweya woona Yeeyo. Eyo khenatoko okihiya. Aavira mahiku mathanu na mararu, nave nkinweya oliyala, nlelo. Nkinatoko okhalana etthu yookihaaxa ntoko eyo enikihaax'aya. Amusi aka animooleelani.

<sup>207</sup> Kaaniweya woona Malaikha ale, mapupha ale oorukunuwela ottuli, yeettaka vowaakuva ovikana moota nsu naakhanly'aya weettaka. Awo anikhuma w'Ohimala, vowaakuva, ntoko waaphila. Voohiphiyera wira mukhunle niitho nanyu, waaphila paahi, Awo yaaphwanyaneya vale. Miyo nkaarina okathi wo owaalaka. Nkaarina tho okathi woohikhala oweha paahi. A Ikuru, aalupale, Malaikha oowerya, ooteela ntoko etthapwe; mapupha vasulu, ni miru. Nto Awo yiira, "Uiu uuu!" Nto viiraly'aya, miyo kaahikuxiwa mpakha epiraamite yeela ya nikhuru na malaikha.

<sup>208</sup> Nto miyo kuupuwela, "Vano, ti yeela." Khikuumo nantirya miyo othene. Nto miyo khwira, "Oh, wulu! Ela enihimya wira enookhala etthu enrowa oruma yeeyo enrowa okiiva. Kiri okhomoni w'ephiro aka vano. Nkirina yo waaleela atthu aka, okathi yoowoona ela enrow'aya. Nkinthuna wira asuwele yeela. Masi, Atithi a Wirimu aakihiya osuwela vano wira okathi aka woomala. Ni nkinrowa waaleela amusi aka, okhala wira awo anoookhala ooxanka mwaha wa miyo, 'Okhala wira, owo ohanle orowa.' Nto Malaikha ala ahoorwa mwaha wa miyo, ni kinimwiiviwa naanaanoxa vano mwa etthu emosa enrowa oruma."

<sup>209</sup> Vano eyo khukirweela, okathi waary'aka muhina wa nikhuru nenla na malaikha, "Nnari, kahi yeeyo. Vaari wira yaamuwiivani, yaammwiiva Joseph." Ni kaaniweya omwiiva Joseph akiihanaka.

<sup>210</sup> Vano, nto miyo kirukunuwa-tho. Kuupuwela, "Pwiya Muluku, yoowoona ela enihimya-ni?" Nto miyo kaahitikinihiwa.

<sup>211</sup> Vano nto eyo khukirweela, (kahi nsu) yarookirweela paahi. "Oh! Awo Malaikha a Apwiya, anoorwa okivaha muteko aka musya." Nto okathi kuupuwenly'aka yeeyo, kivenxa matata aka, nto khwira, "O Pwiya Yesu, exeni Nyuwo murin'anyu wira



kiire?” Nto yoowoona eyo khukihiya. Okathi woophiyaka ewora ntero, okummeene nantirya.

<sup>212</sup> Vano, nyuwo atthu moosuwela wira iparakha s’Apwiya xeeni. Masi, Owerya w’Apwiya ti woovirikana voomalela, Owerya w’Apwiya mapuro ntoko ale. Miyo kihoona Owo, imaara, imaara sene, khalayi, mwa yoowoona, masi nkinatoko woona siiso. Enooneya ntoko woova woottittimiha. Miyo kaahituthuwa vanci-ene mpakha okuuma nantirya, ohoolo wa Itthu iye.

<sup>213</sup> Miyo kinihimya Ekeekhaii. Ntoko Paulo sihimmy’awe, “Miyo nkinootha.” Nyuwo khamunakiphwanyeke kihimiyaka etthu yoovonyeya y’etthu ntoko eyo. Yookhala enihala okhumelela.

<sup>214</sup> Vano, okathi vakhani, miyo khwira, “Pwiya Yesu, vakhala wira kinrowa wiiviwa, mukihye kisuwele, wira kihaaleele atthu aka mwaha wa yeela. Masi yaari etthu ekina, mukihye kisuwele.” Masi, hat’etthu khayaakhuliwe.

<sup>215</sup> Eroho vakihin’ye aya, voophiyaka ewora nuusu, woona waka, wala yoovikana, miyo khwira, “Pwiya, yaari yeeyo, nto, wira kinrowa wiiviwa, ni wira Nyuwo moomaliha muteko anyu ni miyo mulaponi, ni—ni wira kinrowa okuxiwa kiroihiwaka Owaani vano; yeeyo, yaari yeeyo, vaareera. Vaareera. Vano,” miyo khwira, “yaari yeeyo, mukihye kisuwele. Muveleelihe Owerya Wanyu wa miyo tho, nto kinoosuwela ni nkinaaleela atthu aka wala mutthu mukina yeela, okhala wira Nyuwo muhanle orwa okikuxa.” Nto miyo...Nto khuhikhumelela hat’etthu. Nto miyo kilipelela vakhani.

<sup>216</sup> Nto miyo khwira, “Pwiya Yesu, vaari wira khayaahimya yeeyo, ni wira enihimya wira Nyuwo mookhalana etthu wira miyo kiire, ni wira kinimuupululeliwa ohoolo waya, vano muveleelihe Owerya Wanyu.” Nto Ele yaahala okikumiha okatthi!

<sup>217</sup> Nto kaaphwanyaneya, nipuro nlo, vanlothoni. Kaaniwerya owiwa amwaar’aka, nipuro nlo, atthunaka ottikinya mukhora. Mukhora w’okatthi waari woowaliwa. Ni kaahikhalana Bibilia okhunliwe-ene, ni owo...Kaamusoma, nkisuwenle, masi kookupali, wira waari, mwa aRoma kapiitulu 9, eversiikulu yookiserya:

*... Vano, kinoopweha oSiyoni nlu ku n’olipiha, nlu ku ninkwattula, nlu ku n’olipiha nooreerexa, nto ole onaamini nenlo khanrowa wuuliwa muru.*

<sup>218</sup> Nto miyo kuupuwela, “Ti yootikiniha okhala kisomaka yeeyo.” Eroho nlelo erylene mwa miyo, okatthi! Kimukhuneela Bibilia kikhala weiwe.

<sup>219</sup> Kirowa mpakha vacanelani. Yaari ntoko ewoora yanamuloko othana, wala ovikana. Nto miyo kivenxa matata aka, nto khwira, “Pwiya Muluku, miyo nkisuwela saana.

Nla nihiku nootikiniha, wa miyo. Ni kiri ntoko, oohiisuwela mmansaka.”

<sup>220</sup> Miyo khwira, “Pwiya, ele enihimya exeni? Mukihiye kisometho, mwaari Nyuwo.” Vano, enikhala ntoko enamwane. Nto miyo kimukuxa Bibilia, kimukhunla. Waari vaavo tho, nipuro nimosaru, Paulo aahimeeryaka aYuta wira awo yaatthuna. . . waaleela aRoma wira aYuta yaatthuna waakhela Yeeyo ni miteko, masi enikhala mwaha wo wamini hiyo onaamini ahu Yeeyo.

<sup>221</sup> Vano, onikhala okathi wowoopiha, okhuma vaavo. Vano nyuwo munnoona vatthu miyo vary’aka. Nkinsuwela eniiraneya. Nkinsuwela etthu yoohimya.

<sup>222</sup> Masi vano mukihiye, vano, okhuma vano mpakha ohoolo, mwa minuutu, muloko ni mithanu, miloko miili, mukihiye keererye ohimya etthu va vano. Muupuwele, hata emara emosa soowoona iye khasinavonyeye. Vano kinrowa okuxa Soolempwa okathi vakhani, nyuwo mwaweha, mwa Wisuupulula ekapiitulu 10. Vano mukihiye kihimye ela. Vaari wira yoowoona ti Yolempwa, ehaana otaphuleliwa ni Yolempwa paahi. Vano nto miyo kintthuna muhele ela vamosa.

<sup>223</sup> Nto, vano, nyuwo muri va, ni nyuwo muniwa mufiitani, mukupali wira munihimya ela ntoko sinihimy’aka, ’okhala wira pooti okhala yookhweya ohiwiriyana oratteene.

<sup>224</sup> Munimwaakuva? [Muthukumano oniira, “Nnari.”—Mol.] Vaareera. Vekeekhai. . . Kinnoxukhuruni mwaha w’okhala oomaala, oreera.

Vano, “Nlaikha na neethanu nenli. . .”

<sup>225</sup> Vano, mwaatthu, (ntoko siihanne aka) ti yeela ethoonyeryo y’okathi wookiserya? Ninkhala vayi? Okathi xeni ula wa nihiku? Ntoko mulipa-oowana otemmwe-ene, ohiyu, avenyaka ni amwaleelaka eroroco, wira awehe oone okathi xeni, apattihaka muthuko. Mavekelo aka t’ala, “Muluku, munihiye nipattihe Muthuko.”

<sup>226</sup> Miyo keemenle nipuro nowoopiha, mwaasuwenle. Muupuwele, miyo kinimooleelani mwa Nsina n’Apwiya, miyo kooleenleni ekeekhaii, ni yookhala ethu ehanle okhumelela.

<sup>227</sup> Miyo nkinsuwenle. Vano, nyuwo muniwa mufiitani, mwiiwe saana yeeyo. Miyo nkiuwenle. Kinrowa wehererya. Etthu yaakirweenle, nsana, kikilaanthi ene okatthi waka w’osoma, nkinihimya wira ela ekeekhaii; yaari etthu paahi yeetta mmurimani mwaka, vaavo keettaly’aka.

<sup>228</sup> Miyo—miyo kaatthuna okhuruwela, okhuma okathi vakhani ni okhuruwela ni Charlie, ni orowa oxaya ni yowo nihiku nimoso, nihinatthi ovalaana mmosa ni mukhw’awe.

<sup>229</sup> Mukihiye kiire, wira, okhala wira kinrowa onikela nsuwa, kahi wira miyo kinoohiya etapernakulu ila. Ele ekereja Apwiya

Muluku akivanhe aya. Va ti nri nipuro naka nuulupale. Va ti nipuro ninkhal'aka. Miyo kinrowa paahi mwaha wo wiiwelela yooruma enivahiw'aka mwa yoowoona. Mwan'aka, Billy Paul, onoothikela okhala sekretaariu aka. Eskiritoorio aka enookhala vaava ekereja yeela. Ni mukhaliheryo wa Muluku, kinookhala vaava okathi eyo. . . etthu ila yamalihwaru, wira kilaleerye Ikanyeryo Thanu na piili. Ni khula ifiita sinipak'aka, wala etthu p'itthu ekina, enrowa opakiwa vaava ekereja yeela. Ni vaava, ntoko sinsuwel'aka, ti nipuro miyo vanwery'aka olaleerya vootaphuwaxa ovikana siniwery'aka nipuro pi nipuro nikina mulaponi, okhala wira nookhala nikhuru n'atthu va anaamini, ni avoliwe etala awehereryaka. Nto wa miyo, kinoona ntoko owaani. Nla ti nri nipuro. Ni nyuwo mwaweha, soloha saahimya etthu emosaru, moone, vaavo Yolya.

<sup>230</sup> Vano, masi, miyo nkinsuwela eri ohoolo, masi miyo kinnimusuwela Ole onivarela ohoolo. Eyo t'eri etthu yuulupalexa.

<sup>231</sup> Vano, Muluku, kavonyaa, mukilevelele, ni nto mutthuke eyano aka, Pwiya, wa etthu p'itthu yahaarowa okhala otthuna Wanyu. Miyo kiniira ela okhala wira kiri ooxanka, Pwiya. Atthu ala yiiwe saana; ooxanka paahi.

<sup>232</sup> Etthu enuupuwelel'aka wira otaphuleliwa khonarweeke naanaanoru, yaari mwaha wa otthuna wa Muluku, okhala wira miyo kookupali wira ti yoolempwa va mBibiliani wa miyo. Vano nto yaari Yolempwa, Yolempwa paahi t'eniwerya otaphulela. Ni yaari-ene ekeekhai, munna mulopwana, muthiyana, nkinthuna wootutuxani, masi vanreerela hiyo okhala ookasoopa vano. Hiyo nniitthokiha o. . . Yookhala etthu ehanle okhumelela. Ni miyo kinihimya ela ni ntittimiho n'umoova Muluku. Nto nyuwo munuupuwela wira miyo kaamweemela va. . . Ni nyuwo atthu hata munnaamini wira miyo ka profeta; miyo nkinihimya okhala.

<sup>233</sup> Wiiniwa waka murima waari ula. Na-. . . Mwaisana, miyo kiirale, "Miyo. . . Etthu emosa paahi yoonne aka, muhakalaliho woomala, mulaponi, ahiso, elapo ela, khula enamuna." Keetta mukwaha wa namalaleya. Anci-ene a nyuwo mwaahirowa ni miyo. Oh, yaari yooreera. Naahikhalana okathi wooreera, mithukumano sooreera, mittitthi s'atthu soowaatta, masi khiyaaphwannye ele yaatthuneya.

<sup>234</sup> Mwakha ola, kinimweetta mukwaha wa murumwa. Naanaanoru kaweryaru, kinoorowa wAfrika, oHintiya, ni mulaponi mothene, kawerya-ru, mukwaha mukina w'omisionariu.

<sup>235</sup> Eyo yaahiirane, weso nkinrowa owurya wala olya, nto kinoowela miyako kamosa kamosa iye soorakama iwe, nto kinoorowa okhala weiwe mpakha Muluku waakhula mwa

enamuna emosa. Nkinwerya okhala siisa. Vekeekhai nkinwerya orowa oholo.

<sup>236</sup> Ela pooti okhala yo waakhula aya va. Miyo nkinsuwela. “Mpakha Owo okirukunxa miyo,” nyuwo munnuupuwela yoowoona ele isumana tthaaru sivinre, “keemenleene vansuwani, kilaleeryaka muthukumano”? Nyuwo othene mwaari vaava Ettiminku evinre. Ittiminku sinci-ene, nyuwo atthu va muniphwanya ifiita, ni—ni munikhala vaava saapakiwaka, nyuwo munnisuwela sana itthu iya. Okhala wira, vano miyo kinoophiya mapuro yaala paahi, nto nyuwo nwehe. Hata khula kapatti wa yeeyo enihimmwaka, enlikanyiha n’ila, nto eyo ehaana okhala otaphuleliwa waya. Nkisuwenle. Tivo miyo kiniir’aka, “Mwaatthu, ti yeela?”

<sup>237</sup> Miyo kookupali wira “nlaikha na neethanu nenli” na Wisuupulula 10 ti namitthaka a okathi wa neethanu nenli wa ekereja a Wisuupulula 3:14. Muupuwele. Vano mukihye kisome. Nkawehani vanwery’aka osoma-vo. Vano, nla naari nlaikha na neethanu nenli.

*Masi mahiku a nsu na nlaikha na neethanu nenli,  
(eversikulu 7) ninrow’aya opacerya woopa nlope, esiiri  
ya Muluku enoomaliheriwa, ntoko owo saahimenry’awe  
arumeyi awe maprofeta.*

<sup>238</sup> Vano, nyuwo munniweha, nla naari nlaikha. Ni nla nlaikha n’okathi wa neethanu nenli wa ekereja, okhala wira enihimya va, nla ti “nlaikha na neethanu nenli,” n’okathi wa neethanu nenli wa ekereja. Muphwanye yeeyo, mwaatthunaka wona t’ani. . . vatthu vari nlaikha ti, Wisuupulula 3:14, ti yeeyo, “Nlaikha wa ekereja ya Lawotiseya.”

<sup>239</sup> Vano, nyuwo munnuupuwela okathi eyo yahimmy’aya iwe, malaikha ni okathi wa ekereja. Nto vano, mwa yeela, eyo enoolikana oratteene ni Ikanyeryo iya Thanu na piili hiyo sinrweel’ahu olavula. Nto Ikanyero Thanu na piili nintthun’ahu olavula, sarwaa-ru ekwah’ela, ti Ikanyeryo thanu na piili silempwe. Nto Ikanyeryo iya Thanu na piili, ntoko sinsuwel’anyu, wooniheriwa paahi wa malaikha mathanu na manli a ikereja thanu na piili; masi, sookhala Ikanyeryo sikina Thanu na piili siri epante y’ottuli w’Eliivuru, Eri ota wa Bibilia. Nwehe. Nnoophiyerya yeeyo okathi vakhani.

<sup>240</sup> Vano, kihinatthi opacerya ela, mookhulumuwa? Mwaanitthuna ovenya, wira murukunuwe? [Muthukumano oniira, “Nnari.”—Mol.] Vano nwiriyane oratteene.

<sup>241</sup> Nlaikha na neethanu nenli na Wisuupulula 10:7 ti namitthaka a okathi wa neethanu nenli wa ekereja. Munnona? Vano nwehe. “Nto mahiku. . .” Vano nwehe va:

*Masi mahiku a nsu na nlaikha na neethanu nenli,  
ninrow’aya opacerya woopa nlope, esiiri ya Muluku  
enoomaliheriwa, . . .*

242 Vano, alaleeryaka, namitthaka ola, nlaikha na neethanu nenli va ninlaleerya Mutthaka aya ekereja ya Lawotiseya. Nkawehani muthinto wa Mutthaka awe. Vano, khawaari wa nlaikha noopacerya, khaavahiwe Yowo; nlaikha na nenli, na neeraru, na neexexe, na neethanu, na neethanu na mosa. Masi ti nlaikha na neethanu nenli naarina muthinto ola wa Mutthaka. Yaari exeni? Nkawehani muthinto wa Mutthaka awe, “Omaliherya miiriirya sothene sa Muluku, silempwe muLiivuruni.” Nlaikha na neethanu nenli nimmaliha isiiri sothene saakhanle soohiwa-hiiwa, muhina mwa mitthenkeso iya ni miromolelo. Nlaikha na neethanu nenli nnoothukumanya seiyo, n’umaliherya esiiri yothene. Eyo t’ile Bibilia ohimmy’awe, “Onimaliherya esiiri ya Eliivuru yoolepwa.”

243 Vano nrowe niwehe isiiri iya kamosa kamosa, ni nyuwo mwaatthunaka olepa. Yoopacerya, kinrowa okuxa ele Scofield enihimy’awe va, mwa Matewu 13. Nyuwo mwaatthunaka olepa kamosa kamosa wa seiyo, mwaahikhalane Bibilia Scofield, nyuwo pooti osoma iye owo onuupuwel’awe wira ti sikhhanle isiiri kamosa kamosa. Vano, eversikulu 11:

*Vano owo aahiwaakhula wira, Okhala wira nyuwo moovahiwa (Awiixutti Awe), okhala wira nyuwo moovahiwa osuwela esiiri y’omwene wa wirimu, masi kahi awo, nto awo khavahiwe.*

244 Isiiri, va t’ori “mwiiriirya.” Mwiiriirya ene Soolempwaa, ti Ekeekhai yaatonko wiipitihwa vano yuupululiwe ni Muluku, masi (yeeyo eri) ethhu yoovikana ephattu enamwi yuupululiweene. Isiiri suulupalexa ni isiiri suulupale t’iya:

245 Yoopacerya, esiiri y’Omwene wa Wirimu. Ti yeeyo hiyo enlavul’ahu vano. 13, Matewu 13:3 mpakha 50.

246 Vano, esiiri yanenli esiiri ya Isarayeli oriipiwa wiitho okathi ula. Ni yoohimya, ya aRoma 11:25.

247 Yaneeraru, esiiri yaneeraru, esiiri y’okuxiwa athu ooreera murima akumi mahiku ookiserya a okathi ula. aKorinto Oopacerya 15, ni tho aTesalonika 4:14 mpakha 17.

248 Yaneexexe, esiiri ya Ekereja ya Waataana wa Naanaano ntoko Erutthu emosa yootakanxeya, aYuta ni Amalapo. aEfeso 3:1 mpakha 11, aRoma 16:25, nave tho aEfeso 6:19, aKolosi 4:3.

249 Esiiri yaneethanu ti ya Ekereja ntoko Mwaakameliwa a Kristu. aEfeso 5:28 mpakha 32.

250 Esiiri yaneethanu na mosa ti ya Kristu mukumi, mmosaru nsana, olelo, ni mahiku othene. aKalasia 2:20, ni aHeperi 13:8, ni mapuro manci-ene makina siiso.

251 Esiiri yaneethanu na piili ti ya Muluku, Kristu ntoko omalela w’oMuluku wowiipaka omutthu mw’erutthuni, mwa Yowo waari osuwela wothene wa Muluku.

Ni nttittimiho onihokoloxeriwa mutthu.

252 Esiiri yaneethanu na xexe esiiri ya sootheka, eniphwanyaneya mwa aTesalonika Anenli, ni sikina.

253 Esiiri yanamuloko ti ya ittheneeri thanu na piili sa Wisuupulula 1:20. Hiyo noovira mwa yeeyo, “Ittheneeri thanu na piili sa ikereja thanu na piili, anamitthaka athanu n’aili,” ni sikina.

254 Nto esiiri yanamuloko n’imosa ti mwiiriirya Papilooniya, namararuwa. Wisuupulula 17:5 mpakha 7.

255 Iyo ti siri isiiri kamosa kamosa sintthuneya wira nlaikha nla nimaliherye, “isiiri,” isiiri sothene sa Muluku.

Ni sikina:

256 Kintthuna kihimye ela ni nttittimiho, ni kihiihimyaka mmansaka, masi kihimiyaka Nlaikha n’Apwiya.

257 Epyo y’enowa, yeeyo yaari esiiri yoovithiwa, iyakha sothene.

258 Mahala, khulakiherya; kahi otakhaliwa, masi mahala eekeekhai, a exariya.

259 Kahi etthu iyo ntoko mooro Woohimala, ovarelaka. Munoorowa opaheya iyakha imilyau sene. Masi, etthu yaari Yoohimala, khenakhalaneke epacerele nnakhala emalelo; nave mooro oroopattuxiwa.

Isiiri sothene iya!

260 Esiiri y’opatiiso wa Eroho Yowarya, woohikhala woona wi, masi oMutthu wa Kristu avaraka mwa nyuwo miteko mimosaru Owo aavar’awe.

261 Esiiri y’opatiiso wa maasi. Vaavo, oraaru wootepa oruhaly’aya mpakha ithoonyeryo sa “Tithi, Mwana, Eroho Yowarya.” Ni esiiri y’oMuluku emaliheriwaka mwa opatiiso ni Nsina na “Yesu Kristu,” ntoko Eliivuru ya Wisuupulula, yeeyo yaari wira Ekereja yaakhele okathi ula.

Vo ti siri isiiri kamosa kamosa.

262 Nlumi na Mooro nitthikaka. Amen! Eyo t’itthu entthuneya wira yiiranye, ni hiyo ninnoona.

Oh, moota waarow’ahu owerya orowa ohoolo, nihimiyaka isiiri iyo!

263 Noonaka Nlumi na Mooro nenlo naaweettinhe aana a Isarayeli, nimosaru Nenlo naammanne Saulo arowaka oTamasiku! Ni nimosaru Nenlo nnoorwa, ni Owerya omosaru, niiraka itthu imosaru, ni nuupululaka Masu mamosaru, nikhalaka oratteene Masu ni Masu ntoko Bibilia!

264 Oruma wa nlope, enihimya nlope na “Ehapari yooreera.” Ni oruma wa nlope, mBibiliani, enihimya, “Mwiilikanyihe mwaha w’ekhotto ya Soolempwa.” Munnilepa? Ekhotto ya Soolempwa!

265 Paulo ohimye wira, mwaatthunaka olepa ela, aKorinto Oopacerya 14:8. Paulo ohimye wira, “Nlope narumiha

nsu noohisuwanyeya, mutthu onrowa osuwela sai etthu yowitthokiherya?” Nto naahikhalane nsu na Soolempwa, noolipiheriwa, o—olipiheriwa wa Masu a Muluku yooniheriwe, ninrowa osuwela sai wira hiyo nri okathi wookiserya?

<sup>266</sup> Yaahimmwaka wira atthu annaamini wira Yesu Kristu mmosaru nsana, olelo, ni mahiku othene, masi n’ukhootta miiriirya Sawe ni mitikiniho seiyo mukhalelo wothene wa soopattuxiwa saamwaamini aya Yowo, ni Ekereja yothene yaamwaamini aya Yowo mwa yeela, ninrowa osuwela sai moota wo wiiitthokiha?

<sup>267</sup> Onookhumelela ni mutthu mukweretho nto khulepa yothene; nto khurwa mutthu, etthu ekina, nto khulepa *ela*, voovirikana *n’ula* mukina. Mukina khurwa khwira *ela* t’Ila, athikelaka *ela*. Nto akina aalepa iliivuru, n’itthu siiso.

<sup>268</sup> Masi, Muluku onrwa mwa Owerya w’ohihimuwa Wawe! Nto t’ani onrowa olavula avirikanyihaka Yeeyo? Vaari wira Yesu Kristu mmosaru nsana, olelo, ni mahiku othene, Owo oniira etthu emosaru Owo airaly’awe nsana, olelo, ni mahiku othene. Eyo t’ile entthuneya wira nlaikha nla niire, okuxa isiiri iyo, ikhomo iyo soohiwa-hiiwa atthu animalih’aya.

<sup>269</sup> Nwehe, yaakumihaka nsu noohisuwanyeya, noohilempwa, t’ani onwerya wiilikanyiha? Masi, nlope, nyuwo mooweha, khula mmosa wa okathi ule, ntoko sohimenry’akani mwaha wa ekereja evolowaka, naahikhala nlope naarumme, Ekanyeryo khutapuwa. Nto nlope nnihimya ekhotto. Nlo naahikumiharu nsu na Soolempwa, enrowa okhala exeni?

Masi mukihye kiwuupuxeryeni ila. Muhihaleele ela vano.

<sup>270</sup> Nwehe, khula okathi w’ekereja waahikhalana namitthaka aya. Hiyo noosuwela eyo. Paulo t’ari namitthaka oopacerya. Nto okathi nirumaly’aya nlope noopacerya, vano Ekanyeryo yoopacerya khutaphuliwa, Paulo t’ari namitthaka oopacerya, ntoko soonaly’ahu, nto owo iirale exeni? Aalalenrye ekhotto ya (xeni?) ekereja Ortotoxa, mwaha wo ohaamini ethoonyeryo ya Mesiya yeyo Yesu aawooniheny’awe. Vano, awo yaahaana osuwela yeeyo. Awo yaahaana omusuwela Owo.

<sup>271</sup> Muupuwele, Paulo aarwiiye wookiseryani w’okathi. Anamitthaka othene jaarwiiye wookiseryani w’okathi. Enikhala wookiseryani w’okathi, itthu iya si—sinikumiheriw’aya.

<sup>272</sup> Paulo, asuwelaka Soolempwa, ni asuwelaka wira Yesu aari Mesiya, nto owo aaniwuulumela atthu ale a mpaani mootthukumana, nipuro pi nipuro, ni Soolempwa, vano aahoomoliwa mwa khula emosa wa seiyo. Mpakha, vookiserya, owo otatha ntthupi na munawoni mwawe khwaarukunuwela Amalapo. Yaari exeni? Oruma wa nlope; nlaikha, namitthaka, eemenleene vale ni Masu! Oh, wulu! Muhihaleele eyo vano. Masu! Nto Paulo, arineene otaphuleliwa wa Masu a

Muluku woohihononeya, aahiwuulumela atthu a khula empa moothukumaniwa. Yaathunanen'ye ekumi awe.

273 Moota naarow'ahu owerya omurowela Irinewu, mmosa ole, namitthaka a okathi w'ekereja wootharelana!

274 Ni Martin Owarya, okathi w'ekereja wootharelana, okathi atthu yaapaceny'aya okuxa mwiixuttiho w'aNikolawo, apaceny'aya okela-mo. Nto awo khuulumela okathi ule. Martin Owarya khuulumela okathi awe.

275 Vano nto Lutero, namitthaka aneethanu, owo aahuulumela ekereja Katolika ele, ni Masu a Muluku. "Naxariya onookhala ni waamini," owo khwira siiso. "Nto *ela* kehiyo erutthu y'ekeekhai ya Kristu," vano owo khurihela ekomunyau vathi, khikhuma ni khuulumela ekereja Katolika ele. Nlope nle naahiruma sana. Ti yeeyo? [Muthukumano oniira, "Amen."—Mol.]

276 John Wesley khuyenya, mahiku a ekereja Anklikana. "Vano," atthu yiira, "khivanthuneya-tho okhalana mihakalaliho," nto eyo yaarowenle epyo. Masi John Wesley khuyenya, ni mutthaka wa muteko wa nenli wa mahala, oreerihwa, ni khuulumela ekereja Anklikana ele ni nlope na Ehapari yooreera, naalikanyiheriwe ekhotto. Ti yeeyo. Owo aahiira.

277 Vano hiyo nri okathi wa Lawotiseya, okathi atthu yitthokinhe aya-tho; Metotista, Patista, Prespiteriyano, Luterano, aPentekosite. Ni hiyo nimmuwehererya profeta orwa, wira uulumele okathi ula, ni aakumihe mwa sootheka saya.

278 Vano, vaari wira eyo t'itthunelo, mwa okathi wothene, Muluku onoorukunuxa otthuna Wawe nihiku nla? [Muthukumano oniira, "Nnari."—Mol.] Khivanweryaneya Owo orukunuxa. Owo ohaana okhala ni mweettelo mmosaru.

279 Nto muupuwele, namitthaka ola naari nlaikha naneethanu nenli, ni naari wira nikuxe isiiri sothene athukumanye. Nwehe, nlaikha naneethanu nenli naari wira nuulumele ekereja, y'othaaciri ya Lawotiseya. "Miyo ka thaaciri, oosareya mireerelo, ni khiyaavo enikihaleela." Owo khwira, "Mwa oothoiwa ootakhaliwa, masikhini, oohoona, oohiwar'etthu, nave khamunsuwela." Owo waari Mutthaka awe.

280 O Muluku, muniveleeliherye profeta oohoova ni SIISO ANIHIMYA T'APWIYA, wira Masu a Muluku oolipihiriwa yeete mwa yowo ni yooniherye wira owo orummwe ni Muluku. Nto owo arwa vale, onimuulumela okathi ule. Vekeekhai onimwiira. Owo onookhaliha ekereja ele ya Lawotiseya omuvirikanya. Vekeekhai, owo onimwiira. Awo yaahiirasa khula okathi mukina. Eyo khenvirikana okathi ula. Ehaana okhala etthu emosaru.

281 Nwehe, vano, ekereja ya Lawotiseya. Namitthaka aya (onoomaliherya) a Lawotiseya, nlaikha naneethanu nenli,



nnoomaliherya miiriirya sothene sirimeenle mukhottoni, khalai, mwaha w'Ekeekhai.

<sup>282</sup> Lutero aahivenya, masi owo khaarina Ekeekhai yothene. Owo aarina okhalihwa naxariya paahi. Vekeekhai.

<sup>283</sup> Ohoolo waya khurwa namitthaka mukina, aihaniwa John Wesley, ni oreerihwa. Owo khaarina Eyo. Bibilia oohimya. Ekereja ya Filatelfia!

<sup>284</sup> Vano onoorwa okathi w'ekereja ya Lawotiseya, n'upatiiso wa Eroho. Masi awo arootapanyasa Eyo yothene, khutthikela mookhaleleyani ntoko siiraly'aya emara yoopacerya.

<sup>285</sup> Okathi, "Owo orin'awe yooweha ntoko Alfa ni Omeka," Ntata Nawe nryeene epantte *emosa*, ni epantte *ekina*, "Oopacerya ni Ookiserya."

Eroho Awe yaahikhuruwa Nihiku na Pentekosite khusariha nikhuru nle.

<sup>286</sup> Eyo khwiisittha vakhani-vakhani, mpakha ophiyererya okathi w'epiphi. Mithuko Mithanu na miili sa Eweero, okathi mithanu na miili sa ekereja, ele yookiserya yaahitepa omurakamela Yowo. Eyo yaari eko-. . .iyaakha soohalelaka ophiya ekonto emosa s'okathi w'epiphi, wa ekereja Katolika.

<sup>287</sup> Lutero khupacerya oruuha warya waattharelana, wookhuveela Masu vakhani.

Warya woottharelana, khukhala wookhuveelaxa.

<sup>288</sup> Warya woottharelana, wa Lawotiseya. Vano khutthikela ntoko siiraly'aya, emara yoopacerya, khutthikela naanaanoru mootapanyeyani memmo yiiraly'aya emara yoopacerya. Khamunoono etthu enihimy'aka? [Muthukumano onira, "Amen."—Mol.]

<sup>289</sup> Vano nkawehani. Yookhala Ekeekhai yinci-ene erimeenle ota iwe, (mwaha wa xeni?) weiwo akina yiisakalelinh'aya n'Ikeekhai. Masi nlaikha nla naneethanu nenli khanniisakaleliha ni hat'etthu. Nlo ninthukumanya ikhomo iya soohiwa-hiwa sothene, onoothukumanya sothene. Nto moolavula wawe, "Esiiri yothene ya Muluku yaahaana omaliheriwa." Oh! Muluku, mmuveleelihe. Isiiri sothene sowiipithihiwa saahimaliheriwa okathi, owo, uupululeliw'awe Yeeyo. Ni xeni? Vaari wira iya isiiri sowiipithihiwa, mulopwana owo ohaana okhala profeta. Nto hiyo khanimanle osoma ni wona wira profeta, aarowa orwa okathi wookiserya, aarowa okhala Eliya ole muulupale hiyo ninkhal'ahu nimulipelelaka? [Muthukumano oniira, "Amen."—Mol.] Okhala wira, isiiri iya siri sowiipithihiwa, mateoloko, sihaana okhala sowlupululiwa; wa Muluku. Ni Masu anoorwa wa profeta paahi. ["Amen."] Ni hiyo noosuwela. Owo onrowa okhala Eliya anenli, ntoko silaiheriw'aya. Oh, wulu! Mutthaka owo—owo onrow'awe oruuha sinrowa okhala isiiri, sothene, ithu iya sothene.

<sup>290</sup> Hiyo nookhalana opatiiso wa maasi. Yothene ti yootapanyeya. Ti yeeyo. Mmosa onoomiserya; mmosa onooyeherya. Mmosa onikuxa “Tithi, Mwana, Eroho Yowarya.” Mmosa onikuxa *ela*. Mmosa onipatisa imara tthaaru, aroiha ohoole; wa, mmosa a Muluku onihaniwa “Tithi,” mukina a Muluku onihaniwa “Mwana,” mukina a Muluku onihaniwa “Eroho Yowarya.” Mukina iirale, “Nyuwo moovonya. Owo ohaana opatisa aroiha ottuli, imara tthaaru, *siiso*.” Nto, oh, otapanyeya xeni!

<sup>291</sup> Masi etthu yothene ti yoomalihiwa, maana ori Muluku mmosa paahi, ni Nsina Nawe ti Yesu Kristu. “Ni khanikhanle Nsina nikina vathi v’Erimu nenlo atthu arin’aya woopowa.” Khekhanle hata yoosoma emosa ya Soolempwa, hata nipuro nimosa mBibiliani, vaavo mutthu otonko awe opatisiwa enamuna ekina woohikhala ni Nsina na Yesu Kristu. Khiivo hata emara emosa etonko aya Ekereja esya, wala Ekereja ya Yesu Kristu, etonko aya omiserya, oyeeherya, wala etthu ekina. Khiivo hata emara emosa niira nitonko aya wira, “Miyo kinoopatisani ni Nsina n’Atithi, Mwana, Eroho Yowarya.” Iyo iyaaminelo n’itthu sikina.

<sup>292</sup> Nto mukhottoni mwaha w’Ekeekhai, ikhomo iye saahirimeela, masi Muluku aahimye wira saamuluuliwa nihiku nookiserya. “Miyo kinimuulula,” anihimya t’Apwiya. Hiyo noolavula eyo, kahi khalai, *Mwiri Mwaakameliwa*. Onrowa otthuneya profeta. Bibilia onihimya wira owo aamurowa okhala va. Ti yeeyo. Malakhiya 4, onlavula wira owo onrowa okhala va, ni hiyo ninnaamini wira owo onookhala. Hiyo nimmulipelela yowo. Ni hiyo ninlapelela wiisooniherya wawe, nto nnimoona Masu a Muluku oolipiheriwa.

<sup>293</sup> Anrowa okhala atthu vakhani oosuwela Yeyo. “Ntoko saary’aya mahiku a Nowe, siiso enookhala orwa wa Mwana a mutthu.” T’ani yooonwe? Atthu athanu. . . Mahiku a Lothi, vekeekhai yaari araru yooonwe. Amwaar’awe yaaroopacerya, khupweteya. “Siiso enookhala orwa wa Mwana a mutthu.” Anrowa okhala vakhani ene owoopowa, ookuxiwa okathi uwo; esiiri emosa, ya Ekereja ele erohiwaka osulu. Ntoko Lothi saakuxiwa’awe, ntoko Lothi saakumihiwa’awe, arowaka; Nowe aairohiwe osulu; ni Ekereja enrowa oroihiwa osulu, nave. Mmosa aaroolowala; nto mmosa khurawa; ni mukina Owo onrowa osulu. Munnona? Eyo vekeekhai, ti yoolikana.

<sup>294</sup> Masu animoorwa. “Eliivuru elempwe muhina,” nto enoomalelihiwa okathi ela, isiiri iya sothene sinimal’aya olavula. Vano mukihye kosome-tho, vano, wira nyuwo mukupali. Vano nkawehani:

*Masi mahiku nsu na nlaikha naneethanu nenli  
(nlaikha nookiserya), ninrow’aya woopa nlope, esiiri ya  
Muluku enoomaliheriwa, . . .*

295 Vano, “esiiri ya Muluku” t’ivi, emosa wa seiyo? Paulo oohimya, mwa Timoteyo Oopacerya 3, kookupali wira aari yowo, ohimye wira, “Vekeekhai mwiiriirya wo wamini ti muulupale: wira Muluku ohiisoniherya mw’erutthu (hiyo noomukwannya Yowo, noomoono Yowo), khwaakheliwa wirimu mOvuwani, oowehiwa ni Malaikha, khwaaminiwa vathi va.” Muluku aari! Vekeekhai, owo mwiiriirya muulupale, masi sothene soolakiheriwa. Kahi “Tithi, Mwana, ni Eroho Yowarya,” Amuluku araru; masi, Muluku mmosa mwa miteko miraru. oTiithi, vathi va Moise; oMwaana, vathi va Kristu; Eroho Yowarya, okathi ula. Okathi miraru sa Muluku mmosaru; kahi Amuluku araru. Mwiiriirya woomalihiwa vano. Bibilia ohimye wira yaahaana okhala siiso. Okathi. . .

296 Nihiku nlo, kaahoona, nipuro siensiya ontthun’aya okivirikanyiha, mwa etthu awo yaahim’aya wira, okathi miyo wiiraly’aka, “Khula mutthu aamini wira Hawa aakhunre masa!” Vano siensiya aya onihimya wira, nyuwo munimoona vapapheloni nihiku nlo, myaha suulupale, “Owo aakhuunre tamasiku.” Kheni maana. Eyo yaamurowa—yaamurowa omootoha? [Muthukumano onira, “Nnari.”—Mol.] Vekeekhai nnari. Munnona? Awo paahi. . .Eyo ti—eyo t’ile Kayini uupuwenly’awe, moosuwela, nto owo aaruuhale etthu emosaru, masi Muluku khaakhenle mukuttho awe. Nto Abeli, naxariya, aarimuupululeliwa wira, “Yaari ephome,” vano owo khiruuha ephome.

O Muluku, ekereja ela ni okathi onkhal’ahu!

297 “Eliivuru elempe muhina” nto enimalihiwa okathi nlaikha nla nnimalih’aya, (vano xontte mwiiwe sana ela), okathi Mutthaka wa nlaikha naneethanu nenli ommalel’aya; esiiri y’oMuluku, esiiri y’epyo y’enowa, isiiri sothene sikina sa itthu iya sothene.

298 oMwaana Ohinimala, ntoko atthu sinihim’aya. Enweryaneya sai Owo okhala Mwana Ohinimala, okathi Ohimala ohinipacery’aya wala ehinimal’aya; nave mwana etthu eniyariwa? Enikhala sai ya maana?

299 Enweryaneya sai okhala omooroni Ohinimala, mooro owo oryeene woopattuxiwa? Miyo kinnaamini omooroni onivarela. Vekeekhai, Bibilia ohimye siiso. Masi, owo ori wira ohonone. Bibilia ohimye wira, “Ooreeriwa t’ule ohiniiri mpantta w’okhwa wanenli.” Munnona? Moone, khamunrowa wiiwiwa n’ukhwa wanenli. Okhwa woopacerya ti w’erutthu. Wanenli okhwa w’eroho, itthu sothene simanle ene. “Munepa ontheke, munep’owo onimookhwa.” Nyuwo munoorowa ohukhummwa mwaha wa itampi sanyu, khino iyakha imiya sene, iyakha ikonto sene. Masi khivanweryaneya okhala omooroni Ohinimala, okhala wira Bibilia ohimye wira mooro oroopattuxiwa. Enweryaneya sai opattuxiwa nave onakhala

Woohimala? Yaatonko okhala . . .Bibilia ohimnye wira, “Mooro owo opattuxeriwe xetwani ni malaikha awe.” Vano nto, vaari wira oroopattuxiwa, khivanweryaneya okhala Woohimala. Okhala wira, Ehinimala, etthu Ehinimala, khenatoko okhalana ephattuwelo nnakhala okhalana emalelo.

<sup>300</sup> Ti siiso ehinweryaney’aya hiyo okhwa, okhala wira hiyo naahikhala okathi wothehe. Hiyo na epantte ya Muluku, milipu sa Muluku, ni Owo t’okhanle etthu emosa Ehinimala. [Munna Branham onimana vapulpitu imara tthaaru—Mol.] Amen. Nyuwo khamunkhwa-tho siiso Muluku ohinikhw’awe, okhala wira nyuwo mw’etthu Ehinimala, ni Yowo. Amen! Muhiye orwe! Aleluya! Kihooceya n’inupa ela y’axiithu, khula enamuna.

<sup>301</sup> Nwehe, “Eliivuru elempwe,” okathi nlaikha nla nimalih’aya ikhomo iya sothene soohiwa-hiiwa sa miteko muhina mw’ekhotto awo awanans’aya, Lutero owanne awe, ni Wesley owanne awe, ni aPentekosite awanne aya. “Masi yookhala emosa enoorwa,” onihimya Bibilia, “wira mahiku oolavula wawe, isiiri iya sothene . . .” Maunisista aroohiya Nsina na Yesu; oraru oroohapuwa ni Tithi, Mwana, Eroho Yowarya, siiso ntoko siiraly’aya Muthukumano w’oNicea, etthu emosaru; owanli aya yaahivonya. Masi, vano, eriyari y’ephiro, mwa Soolempwa, ti muri Ekeekhai. Nyuwo munnoona vatthu vary’ahu? Nlaikha n’Apwiya!

<sup>302</sup> Nwehe Wisuupulula 5:1. Nwiriyanne ela vano:

*Nto kaahoonaa mmatatani mwawe noolopwana yoole  
aakilanthe vasulu veehice eliivuru elempwe muhina  
(yoolempwa yaari muhina) n’uta waya, etthukiwe  
n’ikanyeryo thanu na piili.*

<sup>303</sup> Vano, yookhala elempwe muhina w’Eliivuru. Masi, ottuli waya yaahikhalana Ikanyeryo Thanu na piili, ottuli Waya, sahaalempwe muhina w’Eliivuru. Vano, ola ti mulipa-owuupulula onlavula, Yohani. Vano, muupuwele, Eyo khayaalempwe muLiivuruni. “Nto mahiku a nsu na nlaikha naneethanu nenli, esiiri ila yothehe elempwe muhina yaahaana omaliheriwa.” Eyo yaahaana okhapeleliwa, nihiku nenlo. Vano munnona etthu enihimy’aka? [Muthukumano oniira, “Amen.”—Mol.] Munnikitthara? [“Amen.”] Vano okathi wa masu mathanu na manli a Wisuupulula 10 wuupululiwa. Okathi Eliivuru enimalihiw’aya, eri etthu emosa paahi ehanle, vano awo masu ale a miiriirya a etari yaalempwe ota w’Eliivuru, Yohani aakhottihw’awe olepa. Mukihiye kisome.

*Numala kaahoonaa nlaikha, nlaikha na ikuru  
nikhuruwaka wirimu, naawanre meeku: ekhweyi yaari  
vasulu va muru awe, owiitho waya waari ntoko . . .  
nsuwa, metto saya ntoko maripu a mooro:*

*Naahikuxa mmatatani mwaya eliivuru yaamukhaani  
yookhunliweene:...(Moone, vano nwehe ela)...  
khuhela nnawu naya noolopwana mphareya,...  
noothiyana...vatthayani,*

*Vano naahikhuwela niituperyaka, ntoko wiipa wa  
kharamu: nto okathi nlo...nikhuwenly'aya, itari thanu  
na piili saahilavula n'ukukutteya waya. (Nwehe.)*

*Nto vamanly'aya olavula itari iyo thanu na piili, miyo  
kaatthuna olepa:...*

304 Yaahikhala etthu yaahimmwe. Khawaari onyakula paahi.  
Yaahihimmwa etthu. Owo aatthuna olepa.

*...nto kaahiwa nsu naakhuma wirimu  
nikihimeeryaka wira,...*

305 Nkawehani vatthu masu vaary'aya, Itari. Kahi Wirimu;  
vathi! Itari iyo khasaalavunle okhuma wirimu. Iyo saalavunle  
okhuma vathi.

*...nto miyo kaatthuna olepa: vaiwaly'aka nsu  
naakhuma wirimu nikihimeeryaka wira, Mutthuke  
(yuulupale M-u-t-t-h-u-k-e), Mutthuke itthu iyo itari  
thanu na piili silavunly'aya, muhilepe etthu.*

306 Eyo eri ottuli waya, okathi Eliivuru enimalihw'aya. Owo  
khahimye wira, "Epantte y'ohoolo." Owo ohimye wira,  
"Ottuli waya," numala yothene Eyo opakiwa, omalihiwa. Vano,  
masu a Itari iya Thanu na piili etthu emosaru, emmaleliha  
Eliivuru, ehupululiwe. Eyo nnakhala khelempwe muLiivuruni.

307 Oh, wulu! Kaatthuna wira kiphiyerye yeeyo, wira atthu  
awerye vekeekhai...Muhivonye. Nnari, muhivonye. Xontte  
muhivonye, ekwah'ela. Miyo kihanle woohiyani. Muhivonye.  
Vakhala wira mootoko owiriyana, nwiriyane!

308 Ikanyeryo iya siri epantte y'ottuli w'Eliivuru. "Nto okathi  
nlaikha naneethanu nenli ninlavul'aya, isiiri sothene silempwe  
muLiivuruni sinoomaliheriwa." Nto naananoru Eliivuru,  
yaakhunliwe ni yaalempwe muhina, enookhuneeliwa, "Isiiri  
sa Muluku soomaliheriwa." Nto iya ti isiiri sa Muluku: orowa  
wa Ekereja, ni itthu sothene iya sikina. "Isiiri soomala." Okathi  
nlaikha nle naneethanu nenli ninlavul'aya khula esiiri, vaamala.  
Anakhaleru mutthu ti mutthu, hata wira ti pani. Masu a Muluku  
khanivonya. Nto Owo ohimye wira:

*Masi mahiku a nsu na nlaikha naneethanu nenli,  
ninrow'aya opacerya woopa nlope, isiiri sa Muluku  
sinoomaliheriwa, ntoko saahimenry'awe arumeyi awe  
maprofeta.*

309 Itthu sothene iyo, ntoko, oh, Roma akhalaka na—  
namuttompe, ni ikereja sothene Prustante, miromolelo  
siromolaka numala eyo, khukhala anamararuwa aya. Munnona?

Isiiri iye sothene, maprofeta saahimme aya, sinimuupululiwa vaava vene ewora ela yookiserya.

<sup>310</sup> Nto okathi nlaikha nla naneethanu nenli nniveny'aya okathi wa Lawotiseya nnapacerya orumiha Nlope neekeekhai, okhala wira Nlo ninrowa okhala noovirikana, atthu khanrowa wamini Iyo. Awo veekeekhai khanrowa wamini Iyo. Masi, owo onrowa okhala profeta owuupuxeriwa, okhala wira khekhanle hata enamuna y'otaphulela Eyo.

<sup>311</sup> Atthu aneererya otaphulela oraru, n'ukhala ni maihi oottweelela ni oovahuwa. Khaavo onwerya osuwela sana. Awo nlelo anaamini wira Hawa aakhunre masa, n'itthu sothene iyo. Okhala wira, eyo elimalelo atthu antthar'aya, siiso ntoko Yesu aaphwannye awe ekereja.

<sup>312</sup> Masi ohaana okhala profeta oneettihiwa ni Muluku, wira Masu a Muluku amurweele yowo, n'utaphuleliwa w'ekeekhai wo wiisupulula wa Yesu Kristu. Tivo, nto, eha—ehaana okhala siiso. Muluku anikhaliherye!

<sup>313</sup> Vano, "Okathi owo onlavul'awe," vano, eyo ti SISO ANIHIMYA T'APWIYA. Hiyo nnookhalana eyo yowiiweya. Okathi owo onikhuwel'awe Mutthaka awe, onlaleerya ekhotto; ntoko Paulo iiraly'awe wa Ortotoxa, ntoko akina a awo siiraly'aya, ntoko Lutero, Wesley, avirikanyaka mutthenkeso. Okathi owo onlaleery'awe ekhotto, ni waahimeerya wira, "Awo animootha, ni wira kahi Ekeekhai! Ni wira awo aniwootha atthu!" Okathi owo onilavul'awe Yeyo, khenivonyeya. Khenivonyeya, okhala wira owo onrowa olipiheriwa ni Masu a Muluku. Nyuwo munoosuwela veekeekhai Eyo exenii. Nto owo iiraka, owo onoolavula, wira owiihane okhuma oPapilooniya, "Mukhume eriyari aya, atthu aka, wira muhaataane ni itampi sawe." Muluku, anveleelihe! Muhihaleele.

<sup>314</sup> Vano, "Okathi owo onipacery'awe olavula, esiiri enoomaliheriwa." Vano, nwehe, nto owo okathi wa masu a Ikanyeryo Thanu na piili, sa Wisuupulula 10, wuupululiwa. Nyuwo munniiwa sana? [Muthukumano oniira, "Amen."—Mol.] Okathi isiiri sothene sa Mulivuruni simmaliheriw'aya! Ni Bibilia oohimya, va, wira owo onoomaliherya isiiri.

<sup>315</sup> Okathi, alopwana ottuli okathi mukina yaawanenly'aya Ekeekhai. Awo yaahiwanela okhalihwiwa naxariya. Awo khurrowa okathi vakhani. Oreerihiwa! Awo yaahiwanela *ela*, ni yaahiwanela *ele*. Awo yaahiwanela *ela*. Awo yiirale exeni? Yaahirukunuwa khutthokiha, etthu emosaru. aPentekosite, ni aPatista, Prespiteriyano, aLuterano, othene aya, yiirale etthu emosaru, aroorukunuwa khwira etthu emosaru.

<sup>316</sup> Ni Bibilia oohimya, mwa Wisuupulula 17, ti yeeyo awo yaarow'aya wira, mai a khalai namararuwa n'ana awe, "MWIIRIIRYA, PAPILOONIYA." Bibilia oohimya, va, wira eyo yaarowa okhala emosa wa isiiri saarowa wuupululiwa.

maProtestante, anamararuwa, “eraruwaka muroohoni,” eweetihaka atthu ni miromolelo, ni “mihasa sa sootakhala,” saya sa mwixuttiho woopakiwa ni mutthu; ni yaapurulelaka ottaiwene w’ephattuvelo yoosareya Ephome, vaavo Oweriya wa Muluku Oowerya sothene onikhwalal’aya mahala wira omooniherye Yesu Kristu. Eyo ekeekhaii. Nto, Muluku onoolipiherya Yeeyo, ni Owo onniira, ni Owo onoothikela. Masi, eyo yiiraneyaru, Masu aamaliheriwa.

<sup>317</sup> Vano eri etthu emosa paahi ehanle, ti Itari Thanu na piili, hiyo sihinsuwel’ahu. Ni iyo khasaakhanle ooruma mahala-ene.

<sup>318</sup> Muluku khaniira etthu vari othweela paahi. Hiyo ninnithweela ni wira itthu v’elolo, masi kahi Muluku. Itthu sothene ni Muluku ti “Ayo” ni “Nnari.” Owo khandhweela. Owo khaniira iperwa. Owo onihimya ele Owo onlavul’awe. Ni Owo khanihimya hat’etthu woohikhala wira yookhala etthu, yoochimya wa yeyo.

<sup>319</sup> Nto Itari Thanu na piili, va mwa wisuupulula wa Yesu Kristu, Eyo esiiri. Bibilia khanihimya wira *Ola* “Wiisuupulula wa Yesu Kristu”? [Muthukumano oniira, “Amen.”—Mol.] Vano, yookhala esiiri yowiiipithihiwa, nto, ya Yeeyo. Hum! Exeni Iyo? Itari Thanu na piili ti sirina Yeeyo. Maana, Yohani aahalela olepa, vano Nsu khurwa nikhumaka Wirimu, khwira, “Muhilepe Eyo. Masi, mutthuke. Mutthuke. Muhele ottuli w’Eliivuru.” Ehaana wuupululiwa. Iyo isiirii.

<sup>320</sup> Vano, hiyo noolakiheriya itthu iya, ni Eroho Yowarya, yonihimeerya wira, “Khayaari masa. Yaari ekhapa.” Yonihimeerya itthu iya. Khaavo hata mmosa oniwerya weemela ohoolo wa Yeeyo. Miyo nkinatoko omoona mulaleyi, mwa makhalelo aka, okupanli Yeeyo. Masi, miyo kinnaakoha.

<sup>321</sup> Nyuwo moosuwela, oChicago, veemenly’ahu ohoolo waya, alaleyi oophiyaka imiya tthaaru ni miloko mithanu, nyuwo axithiyana va ooChicago, mwaari weiwe, muhiwa.

<sup>322</sup> Nto Apwiya khukihimeerya, ohiyu miraru ehinatthi, khwira, “Awo anrowa wooreyani ntapha.” Khwira, “Mweemele vacanelani va Miyo kinoowoonihani.” Khwira, “Mwenye Carlson ni—ni Tommy Hicks anookumana ni nyuwo meelo voosiisu, antthuna orowa olya wa voosiisu. Nto nyuwo mmuhimeerye Tommy wira ahale. Masi,” khwira, “ela eri va moota enrow’aya okhala. Mwaahimeerye wira awo khanrowa okhalana muthukumon’owo nipuro awo anupuwelel’aya. Awo anrowa okhala nipuro nikina.” Khwira, “Muhoove. Miyo kinookhala ni nyuwo.” Eyo ti yookiphiyerya miyo.

<sup>323</sup> Voosiisu aya, Mwenye Carlson, mukhulupale a Alipa a Nakoso a Ehapari yooreera Yoomalela, khurwa, khwira... khukiihana, khwira, “Munna Branham, kinthuna orowa w’olyani wa voosiisu ni nyuwo.”

324 Miyo khwira, “Vaareera.” (Miyo khwira, “Nkawehani Tommy Hicks onrowa okhala weiwo, nave.”)

325 Khurowa oTown And Country, nto owo khwira, “Ahe, Munna Branham,” owo khwira, “oh, ela ti emosa . . .”

Miyo khwira, “Tommy, mwaamurowa okiirela exontte?”

“Vekeekhai, Munna Branham.”

Miyo khwira, “Kaatthuna kisuwele sinto munoolavula nipuro naka?”

Owo khwira, “Oh, miyo—miyo nkinwerya wira etthu iyo.”

326 Miyo khwira, “Mwaha wa xeni? Miyo ka naxikola a ekalaase ya neethanu nenli paahi, ni miyo—miyo kinimwiira . . . Kaamwiira *empire* ohiya *umpire*. Munnona? Miyo nkinsuwela moota w’olavula iwe. Ni enoorowa okhala Assosiasao Ministerial Muulupale a oChicago. Kinrowa olavula sai ohoolo w’awo, n’usoma waka w’ekalaase yaneethanu nenli, Tommy? Nyuwo mwa Totori a Divindade.” Miyo khwira, “Nyuwo mwaamusuwela moota w’olavula. Miyo nkinsuwela.”

Owo khwira, “Munna Branham, miyo nkaakhanle owerya wira eyo.”

327 Miyo khwira, “Mwaha wa xeni? Miyo kihoovarelani xontte imara sinci-ene.” Ni miyo kaahimnye eyo wovooneyaxa.

328 Nto Munna Carlson khwira, “Oh, Munna Branham, owo khaakhanle oowerya wira eyo.”

Miyo khwira, “Mwaha wa xeni?”

Owo khwira, “Ahe, owo, e—e—e . . .”

329 Miyo khwira, “Nyuwo moosuwela mwah’aya? Nyuwo moosuwela mwah’aya, masi nyuwo khamunthuna okileela miyo. Awo akireiye ntapha miyo.”

330 Nto miyo khwira, “Munna Carlson, nyuwo mookhalana esaala ele ya w’oteli, khamurina, weiwo waakhalanne ahu niira nle?”

“Ayo.”

Miyo khwira, “Nyuwo khamunrowa okuxa.”

331 Owo khwira, “Ahe, Munna Branham, miyo koosukela eyo.”

332 Miyo khwira, “Miyo nkincala ele erin’anyu. Khunrowa okhala weiwe. Eyo esaala yooripelela. Hiyo ninrowa okhala esaala yookhwila. Miyo kinrowa okhala ottuli valoomoni. Dr. Mead onrowa okilaathi moonoo woolopwana. Mulopwan’ole ooweela n’amwar’awe anrowa okilaathi *va*, ni *lexe ni lexe*. Onookhala namukuttho a Buda okilanthi-ene epantte ya moonoo aka woolopwana,” ni moota awo anrow’aya owara.

333 Nto miyo khwira, “Nyuwo moosuwela exeni iyo, Tommy. Nyuwo mwa . . . Assosiasao Ministerial Muulupale a oChicago onrowa okitharimula mwaha wa ‘opatiiso ni Nsina na Yesu



Kristu.' Assosiasao Ministerial Muulupale a oChicago onrowa okitharimula mwaha wa 'eyooniheryo ya Eroho Yowarya,' olavula ilavulelo. Awo anrowa okitharimula mwaha wa 'epyo y'enowa,' ni mwaha w'olaleya 'mahala.'

<sup>334</sup> Tommy khuweha osulu, ni, "Ikharari! Sa Muluku!" Khwira, "Miyo hata nkinoona wira kinoorowa."

Miyo khwira, "Ayo, nyuwo munoorowa."

<sup>335</sup> Nto mmeeloni mwaya, mulopwana aakhenle musurukhu, khumuhokoloxerya musurukhu, khwira, "Hiyo nookhalana nikhuru-n'alipa owoopa ni wiipa. Hiyo naahitthokiherya, nto khuliyala ni khunirimeela etthu iyo. Nto hiyo naahaana wannya nikhuru-n'alipa owoopa ni wiipa, nto khivanweryaneya nyuwo okhalana." Nto hiyo khurowa oTown And Country.

<sup>336</sup> Khuvolowa, voosiis'ule, ni othene yaaphwanyaneya vale. Okathi weemenly'aka vameesa ottuli iwe, kiwehereryaka, vaamanly'aya awo olya voosiisu, miyo kaaweha awo so. Hiyo naahikhalana olya wa voosiisu musaala. Khikhuma, khukilaathi vale, nto aapwanyaneya Assosiasao Ministerial Muulupale a oChicago. Miyo kaaweha yawo. Khula mmosa aahimya okhala Totori Ph.D., L.L., Q.U.S.T., ni othene aya a itthu siiso. Miyo kikilaathi paahi ni khwaawiriyana, mpakha awo ovira. Nto Munna—Munna Carlson khuvenya. Owo khwira, "Alopwana. . ."

<sup>337</sup> Ni othene nyuwo munnimusuwela Hank Carlson. Nto, vo, mmukohe yowo. Ahe, nyuwo mookhalana eyo mufiitani va. Mwathuna vale othuma efiita, eri va. Amiravo aakhalana yeeyo.

<sup>338</sup> Owo khwira, "Alopwana," owo khwira, "Miyo kinimoosuwelihani, vootharelana, Munna Branham." Owo khwira, "Nyuwo othene pooti ovirikanyana n'owo, mwa Mwixuttiho awe, masi mukihye kooleleni etthu emosa. Mahiku mararu avinre, hiyo naahikilaathi nipuro nlo, ni vaari wira mulopwan'ole khokihimeenrye itthu sothene siiraneieye voosiis'ula, miyo nkeemenle va. Owo ahikihimeerya wira nyuwo othene mwaamwiiwanana wira mmukohe mwaha wa Mwixuttiho awe. Ni owo ahikihimeerya wira miyo kaahaana wunteiha nipuro nle nikina, wira nikhale va. Ni ahikihimeerya vekeekhai vatthu Dr. Mead n'atthu ala vaarow'aya okilaathi, voolikana-ene, ni awo ari va." Owo khwira, "Nyuwo pooti muvirikanyanne-ene n'owo, masi, miyo kinoohimya etthu emosa, t'ohoova ni etthu owo enupuwel'awe."

Owo khwira, "Vano, Munna Branham, nuulumo ti nawinyu."

<sup>339</sup> Miyo khwira, "Nihinatthi opacerya. . ." Miyo kisoma nipuro vasomaly'aka voosiis'ula, "Miyo nkihin'ye wiiwelela yowoona ya Wirimu." Miyo khwira, "Vano nrowe nilakiherye ela. Vano, nyuwo othene munihimya okhala Matotori a Divindade; ni miyo kiri va mmansaka." Miyo khwira, "Vaari siiso, nyuwo muntthuna okikoha, mwaha w'opatiiso ni Nsina na Yesu. Hiyo

ninrowa opacerya ni yeeyo toko. Miyo kintthuna mmosa a nyuwo axilopwana mmuruuhe Bibilia anyu ni mukhale va mpararini mwaka, mwa sothene miyo siniixuttih'aka." Miyo khwira, "Mweemele va mpararini mwaka, nto, ni Masu a Muluku, nvaanye Yeeyo." Miyo kilipelela. Khaavo aahimye etthu. Miyo khwira, "Miyo kinvekela mmosa a nyuwo axilopwana arwe eemele mpararini mwaka." Khwira, "Mulattu anyu xeni? Vano, mukhale ottuli waka, vakhala wira munimoova weemela va vakhiviru ni miyo."

<sup>340</sup> Nkihiyo miyo awo animoovaaya; ti Nlaikha nle na Muluku Oowerya sothene. Nenlo, awo ansuwel'aya, wira vaari wira Nlo naahiwerya okileela khalairu wira kirwe... Awo yaari oosuwelexa ovikana supuwel'aka wira ti yaary'aya. Awo yaanisuwela oratteene ovikana okhala vale. Uh-huh. Nyuwo moosuwela, nyuwo munnikhalaka imara sinci-ene, imara sene seiyo, nave. Masi awo khayiirale. Mulattu aya xeni, vaari wira yuulupalexa, nto awo aasuwela wira ti y'ekeekhaixa?

<sup>341</sup> Miyo koohela eyo mufiitani, ni nipuro pi nipuro nikina; miyo kiri oolikana wira kilavule yeeyo, mwa enamuna y'oKristu, ni khula munna. Miyo nkinthuna ovaanyihana ni mutthu; masi miyo kintthuna nyuwo murwe, muvaanye etthu p'itthu ya Yeeyo, ni Masu. Kahi ni eliivuru anyu, vano; kahi ele Dr. *Lexe ni lexe*, wala *Lexe ni lexe* Owaarya ohimmy'awe. Miyo kintthuna kisuwele ele Muluku ohimmy'awe. Owo ti mulipiheryo. Miyo kintthuna kisuwele ele Eyo ekhanly'aya. Awo khaniira.

<sup>342</sup> Vano, nkawehani, wakhalaru okathi wa masu mathanu na manli. Vano okathi wa masu mathanu na manli, okathi Eliivuru enimaliheriw'aya, ya Wisuupulula 10 omaliheriwa. Vano nwehe. Nwiriwane.

<sup>343</sup> Vano, miyo nkinrowa woopisihani vanci-ene. Miyo koosuwela wira kinoowoceihani, va. Sinihala minutu miloko miili wira ephiye ewora yanamuloko. [Muthukumano oniira, "Nnari. Muroweke ohoolo!"—Mol.] Nwiriwane orateene vano. Miyo koosuwela wira, murimweemela, ni nyuwo othene murukunuwaka ekilaathelo n'itthu sikina. Miyo kinootteliwa murima okathi ekereja enrow'aya olokihiwa wira nihikhaleke oophunyana. Pooti okuxa nihiku nothene wira nilaleerye Yeeyo.

<sup>344</sup> Vano nkawehani. Vano nwehe. Masu mathanu na manli saari itari, oruma.

Muluku, munikhaliherye. Kaavonnye-ene, Pwiya, mukilevelele.

<sup>345</sup> Miyo kinookohani yookoha. Eyo jaarumme ni etari, okathi nsu nla nirumme aya. Nyuwo mooweha, wira, okathi Ikanyeryo Thanu na piili saatthara okathi mithanu na miili sa ekereja, vataphuliw'aya Ekanyeryo Yoopacerya, wira yaahikhala etari? Ekanyeryo Yoopacerya muLiivuruni yaahitaphuliwa, yaahikhala etari; Ekanyeryo ela Yoopacerya ota w'Eliivuru

khayaarowa otaphuliwa enamuna emosaru? [Muthukumano oniira, “Amen.”—Mol.] Muluku khanrukunxa mutthokiheryo Awe. Nrowe nikhunle Wisuupulula 6.

*Vano miyo kaahimoono Mwapwittipwitthi  
ataphulaka emosa wa ikanyeryo iyo, nto kaahiiwa,  
ntoko oruma w'etari, ni mmosa wa akumi awo axexe  
iiraka, Murwe moone.*

<sup>346</sup> Vano, khayaakhanle-tho etari ekina. “Nto Ekanyeryo yookiserya yaahitaphuliwa, Wirimu wahimaaleleya okathi woophiyaka nuusu n'ewora.” Masi, Ekanyeryo Yoopacerya yaahitaphuliwa, waahikhala oruma w'etari.

<sup>347</sup> Oh, ekereja, vaaniweryaneya okhala yeeyo? Hiyo nri vaavo? Axiipathani, muupuwele. Khino. Kinroromela wira kehiyo. Masi ankhi yakhala yeeyo? Oruma iwe yaari exeni? Nto ohoolo wa Muluku, ni Bibilia ola ookhunliwa-ene, miyo nkinootha. Oruma, waattikinnye elapo!

<sup>348</sup> Nto okathi Ekanyeryo Yoopacerya, sa thanu na piili saataphuliwe mBibiliyani, yaahikhumelela, Emosa paahi, oruma waattikinnye etthu yothene; etari. Nto vo vakhala wira Ikanyeryo siri ota saamutaphuwa, khayaarowa okhala etari, nave? Miyo nkisuwenle. Nkinwerya ohimya.

<sup>349</sup> Yaahikhala etari, Ekanyeryo Yoopacerya, nto Ekanyeryo yaari etari. Nlope naataphuliwe okathi yowo. Nto Nlope naarumihiwe oPentekositeni, vekeekhai. Miyo nkirowa okela mwa yeeyo.

<sup>350</sup> Vano, vaari wira yoowoona yaari ya Yoolempwa; yoowoona miyo enlavul'aka, yeeyo koonaly'aka Esaapatu evinre voosiisu. Esumana emosa evinre, vano. Vaari wira, vano muupuwele va, vaari wira yoowoona yaari ya Yoolempwa, ehaana otaphuleliwa ni Yoolempwa, wala otthikela wa Yoolempwa emosaru. [Munna Branham onimweemela vakhani—Mol.] Miyo kiroowehererya paahi, wira ekele muhina. Vaari wira . . .

<sup>351</sup> Ela miyo enoonaaka, yaari yeeyo, miyo nkisuwenle, masi miyo kinoova vohalelaka okhwa. Noomalamala? Nri woomaleloni? Muupuwele, Nlaikha nla niirale, vairanen'ye aya, Nlo naahilapha, “Khiwaarowa okhala-tho okathi.” Miyo kinniikoha sinto hiyo ninniiwa sana ela.

<sup>352</sup> Nyuwo munira, “Ahe, enikhala ntoko yaamukhala oruma mu-...” Munna, Owo onoorwa okathi yoowo ohinuupuwelel'anyu. Nyuwo munimwiiwa Ala emara anyu yookiserya.

<sup>353</sup> Vano Eyo ti yowiiweya sana? Okathi Ekanyeryo Yoopacerya etaphuliw'aya, Ikanyeryo saari muhina mw'Eliivuru, isiiri iya saahimmwe: okhalihiwa naxariya, oreerihwa, ekereja Katolika y'oRoma, maProtestante! Ni okathi ikhotto saya sothene sikhani n'itthu saahiny'aya ikhomo iye mwa Masu a Muluku,

nlaikha naneethanu nenli nniimoorwa n'uthukumanya sothene iyo n'utaphulela. Munnona? Nto vo, owo onoomaliha, Itari Thanu na piili sinoolavula.

<sup>354</sup> Yohani vapaceny'awe olepa, khwira, "Muhilepe. Masi, mutthuke."

<sup>355</sup> "Nto Ekanyeryo Yoopacerya yahitaphuliwa," wa Ikanyeryo sa muhina mw'Eliivuru, Eyo yaataphunwe ni etari. Uh!

<sup>356</sup> Vaari wira Yolempwa ela, eyo eniwerya okhala paahi... Vaari wira khula Yolempwa ti...Ettu p'itthu entthuneya okhala ya Bibilia...

<sup>357</sup> Eyo eri paahi ntoko, nyuwo muhikileeleke wira yookhala etthu ntoko "epurukatorio" n'itthu siiso. Khekanle hata Yolempwa mBibiliani wira elipiherye yeeyo. Khivanweryaneya okileela itthu iya, ntoko eliivuru ya Makabeyo, seiyo alakela sikhanel sana... "Ni Eliivuru iyo ya neexexe ya Daniyeli, vaavo Nlaikha nimosa naamuvanry'aya maihi a mmuruni, khwira... khimukilaathiha." Khekanle hat'etthu ntoko eyo etonko wiiraneya mBibiliani, vaavo, "Yesu a oNasareti aamuupaly'awe mwaapalame ooloko, khimuhela metto, khwira, 'Uau! Nkavava, mwaxipalame,'" khena maana. Khekanle hat'etthu mBibiliani wira elipiherye yeeyo. Tivo eyo kheniwoototha... A—ataphuleli, Muluku aahikhapelela wira ataphuleli ahincererye hata makano ale ni ithiru. Pooti yaakanle atthu ooreera murima, axinna aMakabeyo. Awo yaari yeeyo. Miyo nkinihimya wira khayaari atthu ooreera murima. Masi khayaari ya Yolempwa.

<sup>358</sup> *Ola* ti wisuupulula woomalela wa Yesu Kristu. "Khiyaavo hat'etthu enweryaneya wincereriwa mwa Yeeyo wala okumihiwa mwa Yeeyo." Nto hiyo nahelaru iyo Mmo, eyo khenivara etthu ni Yolempwa ekina. Siri Eliivuru miloko mithanu na mosa ni thanu mosa sa Bibilia ola, nave hata Nuulumo nimosa khaninvanyiha Nikina.

<sup>359</sup> Nto vo, vakhala wira ola otthikela, wira arume malope ala ookiserya, wala Itari Thanu na piili iya sookiserya seiyo sinoorwa, isiiri, Ikanyeryo sookiserya, Eyo ehaana oxintana, kiireke olikana, ni Solempwa sikina. Vakhala wira Iye soopacerya vale saataphuliwe ni oruma w'etari, Ele yanenli enimwiira siiso, nave, ele eri ota. Nkawehani etthu enikhumelela. Vakhala wira yoowoona yaari Yolempwa, vano ehaana otaphuleliwa ni Yolempwa, wala otthikela wa Yolempwa emosaru.

<sup>360</sup> Nwehe, Wisuupulula, 3 ni 4, "Itari Thanu na piili." Itari Thanu na piili, nto vo nwehe, 3 ni 4, nto vo (exeni?) olapa waakhumme wa Nlaikha nle noowerya, wira, "Okathi waahimala." Okathi Itari iya, moone, silavunly'aya masu aya, nto Nlaikha...

<sup>361</sup> Muupuwele paahi! "Nlaikha, niwanreene neeku, ni waataana wa ekhweyi vamuru Vawe." Vano, nyuwo moosuwela

owo ti Pani. “Aahenle nnawo nimosa mutthayani, ni mphareya, khuvenxa ntata Nawe khulapa, wira, ‘Itari iye Thanu na piili valavunly’aya masu aya,’ wira, ‘khivaapisa tho.’”

<sup>362</sup> Nto vakhala wira muteko wa isiiri sa Muluku woomaliheriwa, ankhi isiiri iye thanu na piili sinkhumelela ti sivi? Ni ekereja yowiiyeviha, yaamukhaani ntoko yawihu, wira ole Oowerya sothene ohoorwa khuweha mukhalelo woomora wa atthu Awe! Nyuwo munira, “Exeni? Miyo nkinuupuwela siiso.” Pooti ehikhanle. Masi ankhi yakhala? Vano okathi woomala. Nyuwo mwahuupuwela eyo? Mukhale oothokererya. Pooti vaxiyeene sihinuupuwele’ahu.

<sup>363</sup> Ittheneeri iya simorelaka nnikhuruni mwaya ottuli wu! Nlaikha nle nirwaaka, khwira, “Ntoko Yohani saarumiw’awe wira amaliherye Waataana wa Khalayi ni wooniherya okela wa Kristu, Mutthaka mmosa onoomaliherya ikhomo sihiwe ni onoomooniherya Mesiya okathi vakhani ohinatthi Orwa Wawe, Mutthaka wa mahiku ookiserya.”

<sup>364</sup> Nwehe, Nlaikha noowerya naahilapha, ni elaphelo, wira, “Khivaapisa tho.”

<sup>365</sup> Vano, miyo nkinthuna woopisihani vanci-ene. Muupuwele ela paahi, minutu mmosa vano.

<sup>366</sup> Vano nwiriyane. Nlaikha nla naakhurunwe nikhumaka Wirimu. Munnona? Makina, malaikha mathanu na manli a ikereja thanu na piili, yaari anamitthaka a elapo ya vathi. Masi Nlaikha nla. . . Mutthaka wothene woomalihiwa; nlaikha na neethanu nenli nroomaliherya etthu yothene. Ni Nlaikha nla khaninrwa mulaponi; Owo kahiyo mutthu a elapo ya vathi, ntoko malaikha a okathi wa ekereja; eyo yoomaliheriwa. Masi, Nlaikha nla ninruha muhupi onttharelana. Vano *nlaikha* enihimya “namitthaka.” Nto Nlo nnoorwa nikhumaka Wirimu, niwanreene Nlumi nle na Warya, Neeku, ni ekhweyi vamuru Vaya. Nto ekhweyi ti waataana. Aari Kristu, “Ni nnawo nimosa mutthayani, ni nimosa mphareya, nto khulapa, wira, ‘Khivampisa tho.’”

Nri vai hiyo, mwaatthu? Yothene ela mwaha wa xeni? Miyo kinimookohani.

<sup>367</sup> Malaikha makina yaari anamitthaka, atthu a elapo ya vathi. Masi Nlaikha nla. . . Ala, yiirale, “Nlaikha na ekereja y’oLawotiseya,” “Nlaikha na ekereja ya w’Efeso,” anamitthaka a elapo ya vathi; moone, atthu, anamitthaka, maprofeta, ni akina, a ekereja.

<sup>368</sup> Masi, nla Nimosa khinaakhumme elapo ya vathi. Nlo naakhumme Wirimu, okhala wira esiiri yothene yoomaliheriwa. Nto vamaaliheryw’aya esiiri, Nlaikha niirale, “Khivampisa tho,” nto Itari Thanu na piili khikumiherya masu aya ota.

<sup>369</sup> Ankhi ela yakhala etthu wira enisuwelihe moota w'okela moWaminini w'Okuxiwa? Ti yeeyo? Hiyo nnoothyawa, n'utuphela ixiri? Nto yookhala etthu enihalela wiiraneya, ni irutthu iya sowuuluvala, soohononeya, sootakhala sinoorowa otatuxiwa? Kinoowerya okhala wira koone, O Pwiya? Eri vakhiviruxa vanrow'aka wona? Nla ti nloko? Mwaatthu, axinn'aka, okathi xeni ula? Nri vai hiyo?

<sup>370</sup> Nrowe niwehe eroroco, ekalentario, noone nihiku xeni hiyo ninkhal'ahu. Isarayeli ori oPalestina, owanny'aya. Nlepa, ettheneri ya Davidi ya ikhomo thanu na mosa (iyakha ikonto piili sivinre, ayo, yoophiyaka iyakha ikonto piili ni imiya thanu sivinre), epantera ya khalaxa, enooveveleya. Isarayeli oothikela owanny'awe. "Mwiri wa efiku wamelaru makukhu aya, nloko nla khaninkhwa, khaninvira, omala, mpakha itthu iya sothene omaliheriwa."

Maloko anoophweeyasa, Isarayeli onooventya,  
Ithoonyeryo yaahimye maprofeta;  
Mahiku a Amalapo t'owaalakeya, oosareya  
wova;  
"Muhokolowele, yawinyu, O nyuwo  
oomwaramwareya."

Nihiku na ovuluxiwa nri vakhiviru,  
Mirima s'atthu sinoohileya mwaha wo wova;  
Musarihiwe ni Eroho, mithuko sanyu  
sootthokihiwa ni sowooneela,  
Nwehe osulu, ovuluwa wanyu ori vakhiviru!  
Maprofeta oowootha animootha, Ekeekhai ya  
Muluku awo anoookhootta,  
Wira Yesu Kristu ti Muluku ahu.

Nyuwo moosuwela wira Eyo Ekeekhai! Ayo.

Masi hiyo ninrowa weetta vaavo arummwa  
anyakenly'aya-vo.  
Maana Nihiku na ovuluxiwa nri vakhiviru,  
Mirima s'atthu sinoohileya mwaha wo wova;  
Musarihiwe ni Eroho, mithuko sanyu  
sootthokihiwa ni sowooneela,  
Nwehe osulu, ovuluwa wanyu ori vakhiviru!

<sup>371</sup> Siiso eryeene vakhiviruxa sihinuupuwelel'anyu okhala. Eyo ennikitutuxa. Oh, miyo nkiniira voophiyerya. Nri vai hiyo?

<sup>372</sup> "Khivampisa tho." Owo onoohimya wira okathi woomala. Exeni enikhumelela? Exeni enikhumelela? Vaaniweryaneya eyo okhala naanaanoxa, axinna? Muupuwele sana. Yaari yeeyo, vano epiraamite enimaliheriwa ni Itari Thanu na piili.

<sup>373</sup> Nyuwo munnuupuwela Mutthaka w'epiraamite? Eyo ti Ekhatu. Eyo yiirale exeni? Eroho Yowarya eroomumaliherya mutthu n'umutthitta, okathi hiyo oncerenry'ahu mowaminini

mwahu; oreera murima, ni othunku, ni wamini, ni sikina, ni khukhala nincereryaka vaavo mpakha hiyo okhalana itthu thanu na piili. Nto ya neethanu na piili waari ophenta, yowo okhanle Muluku. Ti siiso Owo onimukhalih'awe mutthu, ni omukhuneela ni omutthitta ni Eroho Yowarya.

<sup>374</sup> Nto, vaari siiso, Owo ookhalana okathi mithanu na miili sa ekereja, wira Owo ookhalana isiiri thanu na piili sinlavula, ni awo ahiilipiha wira, ehokoloxe. Nto vano Nluku noomaliha nnimoorwa, wira nimaliherye Ekereja. Itari iye sinihimya yeeyo, axinn'aka? Mwaatthu, ti yeeyo hiyo vary'ahu-vo?

<sup>375</sup> Junie, kintthuna kikuxe yoloha anyu. Nkawehani. Junior, epiraamite ehinatthi olaleeriwa, miyeri sene ehinatthi, aahoona yoloha ela.

Nyuwo muniira, "Ankhi yoloha?"

<sup>376</sup> Nabukudonosori aahiloha yoloha yeeyo Daniyeli aataphulenly'awe, khuhimya opacerya w'okathi wa Amalapo ni waarow'aya omala. Nto eyo vekeekhai yiiraneiyee siisaale. Khevonyeiyee hata vakhani.

<sup>377</sup> Nyuwo mooweha? Yoolempwa wira e...yaari mmyalani, miyo kaamwaataphulelela Yeeyo awo. Awo yaahitthapa. Eyo "esiiri ya Muluku" enikhala ehisuweliwaka, mwa iyakha sinciene. Vaaniweryaneyya okhala yeeyo?

<sup>378</sup> Nto vo nwehe. Mwa enamuna emosa ya mwiiriirya, hiyo naahikuxa, mutthekuni, ekaruma yoothokolowa yaatthukunle ekhato. Nto mmo waahikhala-mo mukwili wootteela, masi Eyo khiyaataphuleliwe. Khasaakhanle-mo ileetera. Miyo nkaataphulenle Eyo, Junior. Miyo kaarooweha paahi Yeeyo, nto khwaahimeerya axinna, "Nkawehani Ila." Nto eyo yoomaliheriwa, ohiy'ula.

<sup>379</sup> Nto okathi awo yaasom'aya Yeeyo, miyo keetta kirowaka onikela nsuwa. Mwaha wa xeni? Khino wira kisuwele sana otaphuleliwa wa ethu elempwe vasulu Vaya. Vaaniweryaneyya okhala yeeyo?

<sup>380</sup> Nto Ale, oruma, voosiis'ule, yoowo waakittikinnye voomalela mpakha miyo ovenya musulu, voorakama ntoko emp'ela, nikhuru nle na Malaikha, Malaikha mathanu na manli mwa ekhalelo y'epiraamite. Eyo Itari iye Thanu na piili sinoorwa? Vaaniweryaneyya okhala yeeyo?

<sup>381</sup> Ela yothene yootaphuleliwa. Ntoko yoloha awe, eyo yothene yoomaliheriwa. Ntoko Masu a Muluku, namitthaka a neethanu nenli onoomaliherya, Mutthaka wa neethanu nenli onoomaliheriwa, nto numala Itari Thanu na piili. Ni owo aahoona nluku na vasulu ophirikeya.

<sup>382</sup> Yeeyo, atthu anci-ene hata ahinsuwel'aya wira sookhala Ikanyeryo Thanu na piili wira sitaphuleliwe. Miyo koosoma iliivuru s'atthu anci-ene sinihimya mwaha wa Wisuupulula,

nkinatoko wiiwa olavuliwa Yeeyo. Awo anootupha Eyo. Masi nyuwo moohimeeriwa wira Eyo eri memmo.

<sup>383</sup> Miyo nkinsuwela eyo exeni. Vaaniweryaneya okhala yeeyo? Muluku animorele ikharari! Yaari yeeyo, hiyo nri okathi muulupalexa. Vano, minutu mmosa paahi, nkawehani. Eyo yakhala siiso, ni wira esiiri yoomaliheriwa, yeeyo yaalempwe mmyalani mu.

<sup>384</sup> Miyo kinnitteeliwa murima okilaathi mukereja erina atthu ooreera murima yawo Muluku onwery'awe waavahererya yoloha. Miyo kinnitteeliwa murima owooniherya alopwana ala n'axithiyana anrowa okereja wa Junior, ni ekereja ela, ya Munna Neville, n'akina, wira aakhala atthu akilaanthi vamuthukumanoni va, ni Bibilia oohimya wira, "Awo yaamukhalana soloha mahiku ookiserya." Nto ela eri va. Nto nkawehani yeeyo, enoolikana ni Masu.

<sup>385</sup> Kihisuwelaka hat'etthu mwaha wa yeeyo, oruma waahiiraneya, nto va anoorwa Malaikha mathanu na manli akhumaka m'Ohimala. Miyo khwira, "Pwiya, exeni Nyuwo murin'anyu wira kiire?" Khuhihimmwa. Khino kihaana orowa, toko, wira kasuwele. Miyo nkisuwenle. Pooti hata ehikhanle yeeyo. Miyo nkisuwenle. Miyo kinoohimya paahi, "Ankhi yakhala?" Vakhala wira ti Yoolempwa, eyo eniweya ntoko vakhiviru ni yeeyo. Nyuwo khamunuupuwela siiso? [Muthukumano oniira, "Amen."—Mol.]

<sup>386</sup> Nkawehani. Nto, nkawehani, nluku na vasulu khinaataphuleliwe. Munnona? "Murowe onikela nsuwa, muhokolowe." Wala, ti yeela, ti Malaikha ala mathanu na manli munikhuruni mu yaakirwenle?

<sup>387</sup> Nto kakumanaru ni nyuwo Nihiku na ohihimuwa, munimoona wira nkinootha; Muluku, Mphuki aka.

<sup>388</sup> Wala, ela ti emalelo ele ya nenli yeeyo kaahimme aka nihiku nlo? Eyo ti y'etthu enoorwa mwaha wa Ekereja? Miyo nkisuwenle. Kaamuwerya okhala vaavo vakhani, masi kinoorowa ohoolo.

<sup>389</sup> Vaaniweryaneya okhala yeeyo, etari ya ikuru, wala Nlaikha na neethanu nenli mwa mathanu na manli, nikhuru, nikhuru na okathi wa neethanu nenli, epiraamite aya yoopakiwa mwa ekhalelo (araru epantte emosa, nto nimos a vasulu), nto awo yaakhuma mOvuwani? Vaaniweryaneya okhala yeeyo?

<sup>390</sup> Ela t'eri esiiri, ya Itari, enrowa ohokoloxa Nluku noomaliha? Nyuwo moosuwela, epiraamite khiyaatonko omaliheriwa. Nluku noomaliha nlelo nihaana orwa. Nlo ninookhoottiwa. Vaaniweryaneya okhala yeeyo, axinna, alopwana n'athiyana?

<sup>391</sup> Wala, ti yoola Mulipiheryo ole wa Neeraru yole Owo okihimenry'awe, iyakha tthaaru wala xexe sivinre?



392 Mulipiheryo Woopacerya, nyuwo munnuupuwela exeni yaakhumelenle? Miyo kaaheererya otaphulela Eyo. Owo khwira, “Muhiire.”

393 Mulipiheryo wa Nenli, Owo khwira, “Muheererye.” Vano miyo kiilipiha, khula enamuna. Nyuwo munnuupuwela? [Muthukumano oniira, “Ayo.”—Mol.] Othene anyu munnuupuwela. Eri mufiitani n’itthu sothene.

394 Nto vo Owo khwira, “Wookhala Mulipiheryo wa Neeraru onoorwa, masi muheererye otaphulela Owo.” Nyuwo muhoona moota waattamenly’aka Yela, ohiy’ula? Miyo nkisuwenle. Masi, miyo kinnoona wira kihaana, ohimya etthu, mukereja mwaka. Nyuwo mukhalaneke mmaliheryo anyu.

395 Vano, ela enrowa okhala esiiri enrowa otaphuwa, yeeyo enrowa omuruuha Kristu, oruhela Owerya Ekereja? Munnona? Hiyo noomala . . .

396 Hiyo ninnaamini orukunuxa murima, opatisiwa ni Nsina na Yesu Kristu. Hiyo ninnaamini waakhela Eroho Yowarya. Hiyo nookhalana ithoonyeryo, mitikiniho, miiriirya, olavula ilavulelo, n’itthu Ekereja yoopacerya saarin’aya. Nto, vookhikuwa, sookhala sinci-ene siiriwe, vaava va, ovikana iye silempwe muLiivuruni mwa Miteko, mwa nikhuru nenla naamukhaani n’atthu, mwa muteko ahu yoola mwaamukhaani va. Ankhi mulaponi mothene? Munnona? Ovikana iye silempwe muLiivuruni mwa Miteko, enamuna emosaru! Ohihimuxiwa w’alipa ookhwa! Muupuwele, yaahikhala atthu oophiyaka araru yaahihimuxiwe, mokhwani, ni Yesu Kristu. Vano hiyo nookhalana oolempwa, oolempwa ni matothoro, athanu. Munnona?

397 “Miteko Miyo sinvar’aka, soovikana iya nyuwo munoovara.” Miyo koosuwela wira Mwene Yakopo oniira “suulupalexa,” masi khivaaweryaneya nyuwo wira hat’etthu yuulupalexa. Soowaatta saya! Owo aari mwa Mutthu mmosa okathi ule; Owo ori Mukereja mothene vano. Munnona? “Soovikana iya nyuwo munoovara, maana Miyo kinrowa w’Atithi Aka.”

398 Vakhala wira ola Mulipiheryo wa Neeraru, vano wookhala muteko muulupale ori ohoolo. Miyo nkisuwenle. Nkinwerya ohimya. Miyo—miyo nkisuwenle.

399 Nwehe. Mulipiheryo wa Neeraru, nrowe neemele vaavo, minutu mmosa. Mwa yoowoona, ovava woopacerya yaari axipalame axikhaani anamitthaka; owo waari okathi hiyo opacerya wene opaceny’ahu. Owo khunnuwa, mwa onvara mutthu ntata.

400 Ni nyuwo munnuupuwela etthu Owo aakihimenry’awe? “Mwakhalaru naxariya, enimwiiraneya wira nyuwo munoosuwela isiiri sa mmurimani mwaya.” Akavi anuupuwela yeeyo ohimmwa va, ni mulaponi mothene? [Muthukumano onira, “Amen.”—Mol.] Nto yaahiiiraneya? [“Amen.”] Voolikana. Nto

khwira, “Muhoove. Miyo kinookhala ni nyuwo.” Munnona? Ni enoorowa ohoole.

<sup>401</sup> Vano, Mulipiheryo Woopacerya yaari, axipalame akhaani; ovava iwe. Awo yaaroorowa wira ahiyelele okathi, ophwanya Orwa w’Apwiya; Mutthaka woopacerya.

<sup>402</sup> Emara ya Nenli, isiiri sa mmurimani. Omuvara mutthu ntata, ni weemela vale paahi n’uhimya etthu awo yaarin’aya; emara yootharelana, yaanuupulula itampi saya ni waahimeerya etthu yoowiira. Ni ma- . . . Eyo ekeekhai? [Muthukumano oniira, “Amen.”—Mol.] Nto, eyo yaahiraneya, voolikana, siiso ntoko Muluku saahimme awe. Ni nyuwo mwa anamoona, ni siiso olumwenku, ni siiso tho ekereja.

<sup>403</sup> Okathi miyo ohimme aka wira, “Kaahoono Nlaikha, ni Nlo naari Mooro wa esmeralta, nivarelaka,” athu khutheya khwira, “Billy, mwiitthikele.” Niitho na mekaanika na maakina eelatarato khukumiherya Nenlo. Miyo nkootha. Kaahimya Ekeekhaii: Muluku khulipiherya.

<sup>404</sup> Miyo khwira, “Epipi enookhuneela; eyo okhwaa, yooriipa. Nave *Nla* ti nooteela. Emosa Ekumii, ekina okhwaa.” Nto Nle nri vale, valataratoni ottuli *iwe*. Va . . .

<sup>405</sup> Ntoko George J. Lacy—Lacy khwira, “Niitho mekaanika na maakina ala khanikumiherya psikoloxia.” Munnikitthara? [Muthukumano onira, “Amen.”—Mol.]

<sup>406</sup> Nkawehani, ovava waamukhaani woopacerya; ntata. Wanenli waari wuulupalexa, wootteelexa, ipompa; Eroho Yowarya yuupululaka isiiri sa mmurimani. Nto ovava waneeraru yaari Malaikha (kahi axipalame), Malaikha; nto owo p’ukathi wa woomaleloni, ti yeeyo tu. Ola onookhala p’ukathi, munna? Ola t’uri okathi?

<sup>407</sup> Vano nwiriyane oratta-enexa, ni muhitaphulele voohiloka ela. Miyo kintthuna kookoheni etthu emosa.

<sup>408</sup> Nrowe nitthikele ottuli okathi vakhani. Ekereja ennisuwela wira ela ekeekhaii. Olumwenku wa siensiya onnisuwela wira ela ekeekhaii. Ni athu akilanthi va, ohiy’ula, ni anci-ene nlelo akumii, yaaphwanyeneya va omurathini okathi Nsu nle naalavunly’aya yeeyo, khwira, “Ntoko Yohani aarummwe awe ni mutthaka wa orwa woopacerya, siiso ola Mutthaka wanenli, wa Orwa wanenli.” Munnuupuwela? [Muthukumano oniira, “Amen.”—Mol.]

<sup>409</sup> Nto vakhala wira yoomaliheriwa, Yohani iirale exeni? Yohani aari ole iirale, “Mmoone, ole vale Mwapwittipwitthi a Muluku onittipiha soottheka s’athu. Ti Yowo.” Ola p’ukathi, woophiya, axinn’aka? Miyo nkinihimya wira woophiya. Miyo nkisuwenle. Masi, miyo kinookohani nyuwo. Miyo kintthuna nyuwo muupuwele. Wala, ola onrowa okhala okathi enrow’aya okhala tho, “Mmoone Mwapwittipwitthi a Muluku”?

410 Wala, okathi wa Malakhiya 4, “Orukunxa mirima s’ana otthikela Wamini w’axitithi ihu”? Onrowa okhala oruma yowo onrowa—yowo onrowa wira itthu iya sa ikuru, mpakha enrow’aya otthokiha Ekereja, enikhala evololaka ni ehinawerya osuwela sana miiriya sa Muluku, ni sikina? Awo yoonaru oruma iwe wa ikuru okwesa, onoorukunxa mirima saya otthikela wAtithi, ntoko Bibilia sihimmy’awe wira yaamwiira? Wala, ola waari Mutthaka, ovinre, waatthuneya wira wiire? Miyo nkisuwenle.

411 Ela ti ethoonyeryo y’okathi wa woomaleloni, mwaatthu. Wala, ela ethoonyeryo wira woomala? Eyo enikhala ntoko Yolempwa, wa miyo. Miyo nkisuwenle. Yaahikhala Malaikha ale. Waahikhala oruma, ntoko etari, waatikinye elapo yothene. Muluku onnisuwela wira kinihimya ekeekhai.

412 Muupuwele paahi, yookhala etthu enihalela wiiraneya. Miyo nkisuwenle exeni iyo. Masi vaamuweryaneya okhala yela? Ethu miyo enihimery’aka ela, mwiilikanyihe mmansinyu! Nivekele, (ovekela sai?) okuxa opuro ahu eriyari y’anakhotto a atthu Awe oowaamini, ni wiitthokiha mmansihu, maana pooti vaxiye-ene ovikana sinuupuwel’ahu.

413 Nyuwo munnikisuwela, ni nkinatoko woohimeeryani etthu yoowootha, nlelo, ntoko sinsuwel’aka. Ni ntoko Samuweli aahimenry’awe, “Kootoko woohimeeryani etthu, mwa Nsina n’Apwiya, woohikhala ele ekhumelenle?” Vano, miyo kinimooleelani vano. Miyo nkisuwenle ela exeni. Miyo nkinwerya ohimya wira ela exeni. Miyo nkisuwenle. Masi, kinrowa wooleelani Ekeekhai. Miyo kihoova. Ntoko munn’inyu, miyo kinikhala oowoova opacerya Esaapatu evinre.

414 Pooti okhanleene okathi wa woomaleloni. Pooti okhanleene okathi wa ikhweyi wiisoniherya osulu, ni olopola okhumaka wirimu, wiiraka, “Khivampisa tho.” Yaari yeeyo, nrowe niitthokihe, axipatthani, wira nikumane ni Muluku ahu. Ennikhala Yolya yoophiyerya ethukumanyiwe vano. Nrowe nirumeele Yeeyo. Nrowe nirumeele Yeeyo vano. Nto ni miyo, okhuma vaplataforma va, kinnimuvekela Muluku, “Pwiya Yesu, mukimorele ikharari!” Miyo kinniilipiha wira kikhaleke oratteene sinsuwel’aka. Miyo kinniilipiha wira kiruue Mitthaka mwa enamuna yooreerexa siniwery’aka, wa Masu a Muluku. Muluku onnisuwela murima aka.

415 Masi, okathi nikhuru nle na Malaikha naakwense aya nipuro nle, miyo kaaheemela. Nkaawerya nnakhala woona, okathi munci-ene. Koonne, vaviraly’aya okathi munci-ene, kitthunaka weetta okatthi, hata opacerya muthana aka, osulu ni vathi w’exiko aka, saari sookuuma vekeekhai, ntoko, woohikhala hata moonelo. Nkaawerya waapapela, mmatatani mwaka. Kaarina naaruuryu, nihiku nothene. Miyo—miyo kaaronwe okatthi paahi khukilaathi.

<sup>416</sup> Ttiminku, miyo khurwa va wira kilavule, nto miyo—miyo kaatthuna wiikumihha mwa yeeyo, kilavulaka. Esekunta, yaari vaavo tho. Ni eyo eri va vano.

<sup>417</sup> Ni miyo nkisuwenle. Miyo nkisuwenle, mwaatthu. Miyo ki naxariya paahi, ni nyuwo, ntoko axinn'aka. Miyo nkisuwenle. Ola pu—ola p'ukathi? Ola ti mute- . . . esiiri yothene yoomaliheriwa? Olavula wothene woomala? Iyo vekeekhai Itari iye Thanu na piili, sintthuna olavula etthu, wira nikhuru naamukhaani nithukumanne vamosa nnoorowa waakhela Wamini w'Okuxiwa, wira nirowe Mokuxiwani okathi Owo onirw'awe? "Maana hiyo ninrowa otatuxiwa," vowaakuvaxa okathi Malaikha ale anrw'aya, "okathi vakhani, waaphila wa niitho; nto ninrowa okuxiwa vamosa n'ale yaarumpe, wira nakumane n'Apwiya musulu."

Mavekelo aka t'ala:

<sup>418</sup> Muluku, vaari siiso, miyo nkisuwenle, Pwiya. Miyo kaahimeerya ekereja paahi. Vaari siiso, Pwiya, mutthokihe mirima sahu. Munikhalihe oolikana, Pwiya, mwaha w'okathi ule muulupale, wira wahala othene a okathi, maprofeta othene ni asuweli anniwehererya okathi yoowo. Pwiya, miyo nkinsuwela etthu yoohimya. Miyo kaamoova ohimya wira, "Muhirwe, Pwiya." Miyo kinnuuliwa muru mmansaka, kaawehaka ni woona olumwenku mwa mukhalelo, miyo nkiniira ovikana ele eniir'aka mwaha wa yeeyo. Miyo kinnuuliwa muru mmansaka. Nakhala nihiku na meelo, Pwiya, mureerihe murim'aka. Mukireerihe vancipalexha, Tithi, wira kiire sothene siniwery'aka, wira kaaruhe akina wa Nyuwo. Miyo k'Awinyu.

<sup>419</sup> Miyo kinoona ntoko Yesaya, mpaani m'olompa nihiku nle, okathi woonaly'awe Malaikha avavaka nno ni nno, ni mapupha owiitho Waya, ni munawoni Mwaya, ni avavaka ni mapupha, "Owarya, owarya, owarya!" Oh, moota profet'ole mmiravo aathukumenly'awe. Owo khupacerya wuuluvala vakhani. Nto voonaly'awe ele, enamwi aarina soowoona, owo aahikhuwela, "Kootakhaliwa miyo!"

<sup>420</sup> Tithi, khino miyo kinoona etthu ntoko yeeyo, voonaly'aka Malaikha ale ohiy'uwo, wala kiireke, voosiisu uwo. Kootakhaliwa miyo, maana ka mutthu a iyano sootakhala, ni kinikhala eriyari y'atthu ootakhala. Vano, Tithi, mukireerihe.

<sup>421</sup> Nto miyo kiri va. Mukirume, Pwiya, etthu p'itthu. Ni miyo keemenle vapulpitu va vaava vanikhal'aka mwa iyakha miloko miraru. Yaakhanleene etthu, Pwiya, Nyuwo entthun'anyu wira miyo kiire, miyo kiri va. Miyo koolikana, Pwiya. Masi, kiphwanye mahala vamaithoni Vanyu. Vowiiyeviha, miyo kinoovekela.

<sup>422</sup> Miyo kinvekelela nikhuru naamukhaani nenlo Eroho Yowarya ekikhalinhe aya mulipa-oowehexexa, wira kaalyihe. Ni miyo kinniira sothene sinsuwel'aka moota wo wira, Pwiya,

wira kaalyihe Yolya y'Ekumi. Ntoko mwa yoowoona ele, iyakha sinci-ene sivinre, vaavo ekuwo ele yuulupale yaary'aya Onikela nsuwa, ni mwako wa Yolya y'Ekumi; eliivuru yaamukhaani, "*Miyo Nkaahin'ye Wiiwelela Yoowoona Ya Wirimu.*" Nto va eyo yothene enimwiiraneya, yowuupululiwa witho wahu.

423 Nyuwo mwa Muluku, ni khaavo mukina oohikhala Nyuwo. Munaakhele, Pwiya. Munilevelele itampi sahu. Miyo kinoottharuwa ohaamini waka wothene, sootakhala saka sothene. Miyo kinvekela waltari wa Muluku.

424 Okathi onoorw'aka ohiy'ula, ni ekereja ela yaamukhaani ohoolo waka, mwa wamini hiyo ninneetta okhuma emp'ela, mwa okuxiwa, "ntoko sir'ayhu vamosa Wirimu," nirukurenryeene Ehice ya Muluku. Mirima sahu sinniniviha imara sinci-ene, mwa itthu hiyo siniwoon'ahuni Nyuwo mwiiraka, ni onitaphulela isiiri Sanyu hiyo. Masi, Pwiya, ohiy'ula, miyo kiri oowoceya othene. Kootakhaliwa miyo!

425 Ni—ni Yakope, okathi woonaly'awe Malaikha ale akhuruwelaka exikatta ni atthikaka, owo iirale, "Nla nipuro nooopiha, kehiyo etthu ekina woohikhala empa ya Muluku." Nto Betheli aahikhalihwa.

426 Muluku, atthu khansuwela sana eyo. Awo anoona wira waarowa okhala otthapa vanci-ene. Masi, Pwiya, moota ekhanly'aya etthu yooopiha ya mutthu okhala Ohoolo wa Mutthu muulupale, oowerya a Wirimu.

427 Miyo kinvekela oleveleliwa wa ekereja aka yaamukhaani va, Nyuwo mukirumme anyu we—we—we—we weettiha ni ohoolo. Mwaareerihe, Pwiya. Miyo kiirale ntoko soowoona ni soloha ni itthu sihimaly'aya, vano, vansuwelex'aka. Miyo koothukumanya Yolya yothene moota miyo ensuwel'aka, wa yawo, Pwiya. Etthu p'itthu, Pwiya, hiyo n'Awinyu. Hiyo ninniivahererya mmatatani Mwanyu, Pwiya. Munimorele ikharari. Munilevelele. Ni munihiye nikhale anamoona Anyu okathi wothene ory'ahu mulaponi. Vano, ekumi yamala, munaakhele mOmweneeni Mwanyu. Vano hiyo ninvekela mwa Nsina na Yesu. Amen.

428 Khula mmosa a nyuwo, murapihe murima anyu. Muhiye itthu sothene, khula muritti, mukumihe mphironi mwanyu. Muhihiye hat'etthu woohaaxani. Muhoove. Khekhanle hat'etthu yoowoova. Vakhala wira Yesu onimoorwa, etthu yo...Owo okathi olumwenku wothene oniipulel'aya ni oninlel'aya. Yaari etthu enikhumelela vano, wa o—orwa wa naanaano, orwa wa naanaano wa yoovaha esya wala etthu, enookhala yooreerexa. Vakhala wira onimoorwa okathi wuupululiwa wa Itari Thanu na piili sinrow'aya wuupululeliwa Ekereja, moota wo orowa, miyo nkisuwenle. Miyo kihimye paahi ele yonne aka. Oh, wulu, okathi xeni! Owo muupuwelo muulupale ni wa nttitimihho.

429 Ni vaakhanle wira waari okathi wa miyo orowa, miyo k'awinyu . . . Pwiya, miyo k'Awinyu. Nyuwo mwamaliha, murwe, Pwiya Yesu.

430 Vanakhaleru vatthu ti vatthu, wala okathi p'ukathi, miyo k'Awawe. Miyo nkinihimya wira kintthuna orowa; miyo nkinthuna. Miyo kookhalana emusi wira kilele. Kookhalana Ehapari yooreera wira kilaleerye. Masi, eyo eniireya ntoko otthuna Wawe, kahi wawaka. Iwo otthuna Wawe. Miyo nkisuwente.

431 Miyo kinoohimeeryani paahi ele ekhanle. Ele ekhanle, Muluku onimwiiraha. Masi miyo kinooleelani ele miyo konne aka ni ekhumelenle. Etthu yaahimy'aya, miyo nkinsuwela. Masi, mwaatthu, ele yaamukhala emalelo? Uh!

432 Atthu ari vaava vano, atthu athanu na mosa yaarina soloha iye. Kahi yootikiniha ohikhala thanu na piili? Kahi yootikinihaxa? wira thanu na mosa saahitthara ephiro, numala yoowoona ele, naanaanoru. Atthu ari vaava. Munna Jackson, va, aari mmosa a yawo; Munna Parnell aari mukina; Munna Collins aari mukina; Munna Steffy aari mukina; Munna Roberson aari mukina; ni Munna Beeler aari mukina. Ni Atithi a Wirimu annisuwela wira khaakhanle tho hata mmosa iira mpantha wa yeeyo. Nto woomaleloni wa yeeyo, yaneethanu na piili . . . yeeyo aari Munna Steffy, naanaanoru yoowoona khurwa. Munnona? Munnona etthu enikhumel'aka? Munnona etthu entthuney'aya wira kirowe? Kihaana wira.

433 Vano, apatthani, muhikiweheke miyo. Miyo ka munn'inyu. Muhikixikhe miyo, okhala wira miyo ka mutthu kinookhwa paahi. Miyo kihaana okhwa ntoko atthu othene akina. Muhikiwiriyaneyane miyo; masi nwiiriyane etthu enihimy'aka. Etthu enihimy'aka Mutthakaa. Muhimuxikheke namitthaka hata vakhani; nwehe Mutthaka. Muhele maitho anyu, kahi mwa namitthaka, masi vaMutthakani. Etthu Owo ohimaly'aya, eyo t'itthu yo oweha.

434 Ni Muluku anikhaliherye, ti mavekelo aka. Miyo okinanara . . . Miyo nkaatthuna orwa, woohimeeryani ila, masi nkaarowa woovitheryani hat'etthu nyuwo.

435 Vano, ntoko sinsuwel'aka, mukihye kooleeleni. Ntoko sinsuwel'aka, miyo kinookhuma mahiku manli wala mararu anoorwa, Namararu voosiisu, orowa . . . kirowaka oTucson. Miyo nkinrowa oTucson wira kalaleye. Nkinrowa iwe wira kalaleye. Kinrowa oTucson, wira kaahale amusi aka muxikola, nto vo kikhale namweettasa.

436 Miyo kinrowa oPhoenix, kakhallane mithukumano iye sikhani sootharelana, seiyo alakela sinrowa okhala Mitthaka mikhaani. Nto—nto vo, khino, miyo nki . . .

437 Miyo kinoona wira awo antthuna wira kilaleye vamuthukumanoni ohiyu umosa. Awo khanatoko ohimya

hat'ethu mwaha wa yeeyo, awo ahimnye paahi wira miyo kikhale iwe. Moone, eyo kheniweya oratteene, wa miyo.

<sup>438</sup> Nto miyo kookhalana nuulumo, SIISO ANIHIMYA T'APWIYA, wa Munna Shakarian, nave. Uh-huh. Miyo nkinsuwela etthu enrow'awe wira mwaha wa yeeyo, masi miyo kookhalana nuulumo n'omuleela. Miyo nkinsuwela etthu enrow'awe wira. Eyo ti yawawe. Nyuwo mooweha *Nsu* nookiserya? Entthuneya wira ohikhale mutthenkeso, masi awo yaahihimya eyaminelo aya. Mutthenkeso, nto miyo kinoohiya. Miyo kiri ota wa yeeyo.

<sup>439</sup> Vano, vowaanyiherya, Munna Arganbright ni Munna Role, tiplomata a oWashington vathi va maPresitente athanu nanli, ohaana okhala wAfrika. Nto Munna Role, ni miyo, ni Munna Arganbright, ninoorowa wAfrika naanaanoru, wira nakhalane mithukumano kamosa kamosa wAfrika do Sul ni oTanganyika, ni Munna Boze. Nto nirowaka, ni alakela mpakha Australia, ni ephiro yeeyo, nitthikaka, Apwiya yaahiire-ru etthu ekina yoovirikana. Masi, kihinatthi orowa, miyo kinootthikela wenno.

<sup>440</sup> Nto, miyo katthikaru kikhumaka wu, Muluku aahilavuleru ni miyo, enamuna ekina, kinrowa waakuxa amusi nirowe waattamela oAnchorage, Alaska. Ela epantte y'okusuni; ele enrowa okhala epantte onikela epheyo. Nto vo waahiya okhala weiwo okathi w'elimwe, okathi onikhal'aya woovihaxa oTucson mpakha onoopahaayani esapala. Miyo nkinoona wira awo yaamuwerya ovilela. Awo yaamukhala oowunkhela owaani ni oowooceya! Hiyo khanintumiha empa. Enookhala weiwe, ni ikaruma saya mpaani. Miyo nkinsuwela etthu yo wira.

<sup>441</sup> Vano, elimwe yavira, Apwiya yatthuna vale, kintthuna kikhume wAlaska, kikhuruwele mpakha vakhiviru w'oDenver, eriyari y'epantte onikela nsuwa; okuusini, onikela epheyo, eriyari y'epantte onikela nsuwa, kikhuwelaka, "O Pwiya, exeni Nyuwo murin'anyu wira miyo kiire?"

<sup>442</sup> Okathi uwo oviraka, khula Mutthaka, ntoko sinsuwel'aka, wira olaleeriwe, onookhala vaava va, etaperanakulu yeela. Va ti vatthu ifiita sinrow'aya okhala. Va ti vakhanle nipuro nuulupale.

<sup>443</sup> Ni miyo nkinthuna okhala, n'amusi aka, Onikela nsuwa. Kinrowa ophavela mpakha kisuwele etthu Muluku onthun'awe wira miyo kiire.

<sup>444</sup> Mwakha ola yaahikhalihawe, nto, mwaahiyu, kahirina maasi wala yolya, kinimweetta mothakoni, ni kinoolipelela mpakha Owo okiihana. Nkinwerya orowa ohoolo siisa. Mutthu ohaana okhala oovolola. Mutthu ohaana ophiya nipuro vaavo onthun'awe osuwela otthuna wa Muluku. Nto munwerya sai wira otthuna wawe muhisuwelaka otthuna wene?

<sup>445</sup> Miyo kinimwiivaha, mwaha wa mulipiheryo wa yoowoona ele, "Yeeyo mwiiraly'anyu." Munnona? Kirowaka ntoko

murummwa ni namalaleya, mpakha wiihana iwe orwa. Munnuupuwela ele yoopacerya, okathi ohenly'ahu nluku noolipiha? "Nvare muteko wa namalaleya," Owo khwira. Khiirale, "Nyuwo mwa namalaleya." Masi, "Nvare muteko wa namalaleya," alakela mpakha ophiya okathi w'etthu ekina, erukunxelo ekina ya muteko. Pooti okhala etthu yoovirikana. Miyo nkisuwenle.

<sup>446</sup> Nyuwo munnimphehta Owo? [Muthukumano onira, "Amen."—Mol.] Mukhale oolipa mwa yeeyo. Mukhale oolipa mwa yeeyo, ale anaaphenta Apwiya.

Ale anaawehererya Apwiya, animuncererya  
 ikuru saya,  
 Awo anoovava ni mapupha ntoko murumasi,  
 Awo anootthyawa khanooceya, animweetta  
 khankhulumuwa;  
 Oh, mukiixuttihe, Pwiya, mukiixuttihe, Pwiya,  
 owehererya.

Miyo kinnimphehta Owo. Miyo koosuwela wira nyuwo munnimphehta, nave. Vano, meelo ohiyu. . .

<sup>447</sup> Miyo kinoona wira kookhaliha eyo yowiiweya oratteene voophiyerya. Kookhaliha? [Muthukumano oniira, "Amen."—Mol.] Yowiiweya ntoko sinsuwel'aka moota wookhaliha, eyo ti yothene miyo ensuwel'aka. Eyo ti yothene miyo ensuwel'aka etthu yoohimya. Vano eyo kuupululeliwaru miyo, wa etthu, miyo kinimooleelani naanaanoru. Miyo koosuwela wira nyuwo munnicaliwa, wira musuwele. Miyo kinnicaliwa, wira kisuwele. Nkinsuwela etthu yaahimy'aya. Nkinsuwela otthu—otthu onrow'aka. Miyo—miyo nkinsuwela etthu enrowa okhumelela. Miyo—miyo paahi. . . Etthu emosa paahi ensuwel'aka, miyo kinoorowa paahi, ni mahala a Muluku. Nto, Owo onookileela kaphiyaru iwe, khino. Masi, epantte aka vano t'ila, orowa. Nto miyo pooti ohikhala iwe isumana piili, mpakha onrow'aka okhala nipuro nikina, ni pooti otthikela wenna. Eyo ekeekhahi. Miyo nkisuwenle. Masi miyo ki. . .

<sup>448</sup> Yoowoona eyo yaahikhala—mo amwaar'aka ni an'aka memmo. Nto etthu ene eyo yaari, miyo kaari mukarosani. Nto minutu yoowo okenly'aka mme, yaahikhala, miyo kaari mukaaroni mwaka. Nto eyo p'inamuna hiyo ninkhum'ahu, mahiku manli, nihisuwelaka otthu onrow'ahu, nihisuwelaka etthu enrow'ahu wira naphiyaru iwe, nirowaka paahi.

<sup>449</sup> Muluku t'otikiniha, wa hiyo, okhala wira iphiro Sawe ti soovikana muupuwelo. Owo onthuna wiiweleliwa.

"Munrowa woowi?"

"Owo kahi mwaha anyu. Muroweke paahi."

"Nyuwo munthuna wira kiire woowi, Pwiya?"



450 “Eyo kehiyo hat’ethhu wa nyuwo. Nyuwo, mukitthare, Miyo.”  
Uh-huh. Uh-huh. “Mweetteke paahi.”

“Kinrowa weemela vai?”

“Exeni iyo wa nyuwo? Mweetteke paahi.”

Vano, miyo kinoorowa, mwa Nsina na Yesu Kristu. Uh-huh. Amen.

Miyo kinnimpenta Owo, miyo kinnimpenta  
Owo

Okhala wira Owo t’opacenrye okiphenta miyo  
Nto oothuma woopowa waka  
Omwirini w’oKalvario.

Miyo . . . (Owo t’ikumi aka.) Miyo . . . (Sothene  
sinikhalel’aka!)

Okhala wira Owo t’opacenrye okiphenta miyo  
Nto oothuma woopowa waka  
Omwirini w’oKalvario.

451 Mwaatthu, ola p’ukathi? [Munna Branham ni muthukumano  
aniipa muhina-muhina mwaakhulelo woomalela, vamosa, *Miyo  
Kinnimpenta Owo*—Mol.] Nto niipaka yeeyo tho, muvahane  
mukhono ni mutthu vakhiviru ni nyuwo. Mwiire, “Munna,  
murokoraka, mukivekelele. Miyo kinimoovekelelani.”

Miyo . . .

452 [Munna Branham onoorukunuwa—Mol.] Mukivekelele,  
Munna Neville. [Munna Neville onira, “Miyo kinimwiira yeeyo,  
munna. Nyuwo mukivekelele, munna. Kooxukhuru.”] V’exariya-  
vo! [Mutthu mmosa onira, “Muluku ooreeriheni, Munna  
Branham.”] Mukivekelele, munna. Mukivekelele, murokor’aka.  
Mukivekelele.

. . . miyo

Nto ootu- . . .

453 Muvekele, mukivekelele, . . . ? . . . Mukivekelele, . . . ? . . .  
Mukivekelele, . . . ? . . . Mukivekelele.

. . . Mwirini w’oKalvario.

Maana miyo . . .

Nrowe ninvenxerye matat’ahu vano Yowo.

. . . miyo kinnimpenta . . . (Ophenta  
w’ekeekhai!)

Okhala wira Owo t’opacenrye okiphenta miyo  
Nto oothuma woopowa waka  
Omwirini w’oKalvario.

Ayo, miyo . . . (Ni murim’aka wothene!)

454 Nyuwo mutthariheke, Munna Neville. Miyo kinootthika.  
Muhimye okathi wa muthukumano. [Munna Neville  
noothikela aipaka ni muthukumano, *Miyo Kinnimpenta  
Owo*, ni olaxerya muteko—Mol.]



*NAPWIYA, TI YEELA ETHOONYERYO YA WOOMALELONI?* EMK62-1230E

(Is This The Sign Of The End, Sir?)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yettaka 30 mweri wa Dezembro, 1962, oBranham Tabernacle oJeffersonville, Indiana, w'Amerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)